

册府元龜卷第三百四十一

巡按福建監察御史臣李嗣京正

分守建南道左布政使臣胡維霖

知建陽縣事臣黃國琦

將帥部

佐命第二

漢王吸以中涓從起豐至霸上為騎郎將入漢以將

軍擊項籍封清河侯一作清陽三千二百戶

召歐以中涓從起沛至霸上為連敖入漢以騎將定

燕趙得燕將軍封廣嚴侯二千二百戶

册府元龜 將帥部 卷第三百四十一 一

薛歐以舍人從起豐至霸上為郎入漢以將軍擊項籍將鍾離昧封廣平侯四千五百戶

陳濞以舍人從碭以刺客將入漢以都尉擊項羽榮陽絕甬道殺追士卒封博陽侯

劉纏兵初起與諸侯共擊秦為楚左令尹漢王與項羽有隙於鴻門纏解難以破羽降漢封射陽侯

周昌以職志職志官名主旗幟也擊秦入漢出關以內史堅守敖倉以御史大夫封汾陰侯比清陽侯

武虎一作武儒以謁者從擊破秦入漢定三秦出關以將軍擊定諸侯比博陽侯二千八百戶封梁鄒侯

董濞一作董以舍人從擊秦為都尉入漢定三秦出關以將軍定諸侯比厭次侯二千八百戶封成侯

孔聚以執盾從起碭以左司馬入漢為將軍三以都尉擊項籍屬韓信此即楚漢春秋及史記所謂孔將軍居左者封蓼侯

陳豨以特將將卒五百人從起宛胸至霸上為游擊將軍別定代破臧荼封陽夏侯

陳賀以舍人從起碭以左司馬入漢用都尉屬韓信擊項籍為將軍定會稽浙江湖陵封費侯

周竈以卒從起碭以連敖入漢以長鉦都尉擊項籍連敖楚官左傳楚有連尹莫敖其後合為一長鉦官號長刃兵也為刀而劍形史記作長鉞鉞亦刀耳

封隆慮侯

丁復以越將從起薛至霸上以樓煩將入漢定三秦

屬周呂侯破龍且彭城為大司馬破項籍葉謂破楚葉縣也

為將軍忠臣侯再封陽都侯

郭蒙以戶衛從起薛屬周呂侯破秦軍扛里陷楊熊

軍曲遇入漢為城將定三秦以都尉堅守敖倉為將

軍破項籍封東武侯三千戶

嚴不職一作不言以舍人從起沛至霸上以騎將入漢還

擊項籍屬丞相甯功侯用將軍擊黥布封武彊侯

宣虎以河南將軍降晉陽以重將破臧荼重將者王將領別重

封南安侯

陳武以將軍將卒二千五百人起薛別救東阿至霸

上二年十月入漢擊齊歷下軍臨菑封棘蒲侯

朱軫以舍人從起沛以隊帥先降翟王虜章邯封都

昌侯

合傅胡害以越戶將從破秦入漢定三秦以都尉擊

項籍封貫侯六百戶功比臺侯

搖毋餘以越隊將從破秦入漢定三秦以都尉擊項

籍封海陽侯一千七百戶

蔡寅以魏太僕漢王三年初從以車騎將軍破龍且

及彭城封肥如侯千戶

蟲達以曲成戶將三十七人從起碭至霸上為執金

吾及為二隊屬周呂侯入漢定三秦以都尉破項籍

陳下封曲成一作曲城侯四千戶

陳涓以卒起碭從以二隊將入漢擊項籍得梁郎將

封河陽侯

彭跖以門尉起碭至霸上為定武君入漢還定三秦

為都尉擊項羽封芒侯

閻澤赤以執盾初起從入漢為河上守遷為殷相擊

項籍封敬市侯一作故市千戶比平定侯

戎賜以連敖從起薛以三隊將入漢定三秦以都尉

破項籍軍為將軍封柳丘侯八千戶

周止以舍人從起沛以郎中入漢為周信侯定三秦

以為騎郎將破項籍東城封魏其侯千戶

繒賀漢王三年以執盾從起以連敖擊項籍漢王敗

走賀擊楚追騎以故不得進漢王顧謂賀祁王戰彭

城斬項籍爭惡絕延壁謂之祁王者蓋嘉其功故寵號之許以為王也爭惡謂爭

惡地延壁壁壘之名也封祁侯

許惲漢三年用趙右林將初擊定諸侯林將言羽林之將也封

宋子侯

齊受以卒從起留以家車吏入漢以驍騎都尉擊項

籍得樓煩將家車吏王漢封平定敬侯

工師喜以舍人從擊破秦以郎中入漢以將軍定諸

侯守雒陽封平侯千三百戶

奚涓以舍人從起沛至咸陽為郎入漢以將軍定諸

侯封魯侯四千八百戶

尹恢以謁者從入漢以將軍擊定諸侯以右丞相備

守淮陽封城父侯二千戶

襄漢表失其姓執盾隊史從起碭破秦以治粟內史

入漢以上郡守擊定西魏地封棘丘侯

郭亭以連敖從起單父以塞路入漢主遮塞要路還

定三秦屬周呂侯以都尉擊項籍封河陵侯一作阿陵

單究一作單寧以舍人從以郎入漢定三秦以騎將軍擊

諸侯封昌武侯九百戶

丙猜以客從入漢定三秦以中尉破項籍封高宛侯

一作高苑千六百戶

丁義以卒從起留以騎將入漢定三秦破項籍軍榮

陽以郎騎將破鍾離昧軍固陵封宣曲侯六百七十

戶

華無害以越將起留入漢定三秦擊臧荼封終陵侯

一作七百四十戶

劉到一作劉到以舍人從起碭至霸上以二隊入漢定三

秦以都尉擊項籍破臧荼封東茅侯千戶

唐厲以舍人從起豐以左司馬入漢以亞將攻項籍

却敵為東部都尉破項籍封成武侯為中尉擊黥布

封斥丘侯千戶

戴野以舍人從起碭用隊帥入漢以都尉擊項籍封

臺侯

丁禮以中涓騎從起碭為騎將入漢定三秦為正奉

侯以都尉擊項籍屬灌嬰殺龍且更為樂成侯

鄂秋漢王三年以謁者從定諸侯有功封公平侯二

千戶

陳夫乞以卒從起杠里入漢以都尉擊項籍以將軍

定燕封高胡侯千戶

爰類以慎將謹慎為將也

從起留入漢以都尉守廣武封

厭次侯

陳胥以卒從起薛以將軍入漢以右司馬擊項籍封

復陽侯千戶

其石以中謁者從入漢以中郎騎從定諸侯封河陽

侯五百戶

許益以駢隣從起昌邑三馬曰駢隣並兩騎也以說衛入漢說

謂軍行舍少之時為衛也以中尉擊項籍封栢至侯千戶

呂馬童以郎騎將從好時以司馬擊龍且復共斬項

籍封中水侯千五百戶

王翥一作士醫以中郎騎從起下邳屬淮陰侯從灌嬰共

斬項籍封杜衍侯千七百戶

楊喜一作楊嘉以中郎騎從起杜屬淮陰侯從灌嬰共斬

項籍封赤泉侯千九百戶

華寄以舍人從起薛以連敖入漢以都尉擊項籍封

朝陽侯千戶

杜得臣以卒從起湖陵入漢以郎將迎左丞相軍擊

項籍封棘陽侯千戶

呂騰以騎士從出關以郎中共擊項籍封涅陽侯千

五百戶

林攀以客從起亢父斬章邯所置蜀守用燕相封平

棘侯千戶

趙將夕一作將夜以趙將屬淮陰侯定趙齊楚封深澤侯

七百戶

程黑以趙衛將軍從起盧奴擊項籍敖倉下為將軍

攻臧荼封歷侯一作磨侯千戶

將帥部

陳遼以舍人從起豐入漢以都尉擊項籍封猗氏侯

千一百戶

室中一作空中同以弩將初起從入漢以都尉擊項籍封

清侯千戶

留盼一作留勝以客吏初起從入漢以都尉擊項籍封疆

侯千戶

秦同以卒從起薛以弩將入漢以都尉擊項籍封彭

侯千戶

楊武以中郎騎將從起下邳擊陽夏以騎都尉擊項

籍封吳房侯七百戶

魏邀以舍人從起碭入漢以都尉擊臧荼封甯侯千

戶

張說以卒從起方與以執盾入漢以司馬擊項籍以

將軍定代封安丘侯二千戶

陳署以卒從起霸上以謁者擊項籍斬曹咎封龍陽

侯一作龍侯千戶

孫赤以中涓從起沛以郎入漢以將軍擊項籍封惠

侯坐守滎陽降楚免復來以郎擊項籍為上黨守擊

陳豨封堂陽侯八百戶

高色一作高邑以容從起齧桑以十隊將入漢以將軍擊

卬將部



魏太原井陘屬韓信嬰度軍破項籍封祝陽侯一作祝阿千八百戶

呂臣以舍人從起陳留以郎入漢破曹咎成臯為都尉擊陳豨封寧陵一作寧陵侯千戶

靳彊以中郎騎千人從起櫟陽擊項籍以中尉破鍾離昧封汾陽侯

祕彭祖以卒從起沛以卒開沛城門為太公僕以中廐令擊陳豨封戴侯千一百戶

周聚以卒從起豐以隊率入漢擊項籍成臯封博陽侯

冷耳以客從起沛入漢用兵擊破齊田解軍以楚丞相堅守彭城封下相侯二千戶

王虞一作王周以騎司馬從起廢丘以都尉破田橫龍且追項籍至東城封高陵侯九百戶

李必一作李必以騎都尉從起櫟陽攻破廢丘因擊項籍屬韓信破齊封戚侯千五百戶

奚意以魏郎初從起陽武擊項籍屬魏王豹封成陽侯六百戶

陳蒼以中涓從起豐以騎將入漢以將軍擊項籍封紀信侯七百戶

毛釋之以中涓從起豐以郎騎入漢還從擊諸侯封張侯七百戶

華朱以越連敖從起薛別以越將入漢擊諸侯以都尉封煇棗侯九百戶

朱濞以卒從起豐入漢以都尉擊項籍封鄆陵侯二千七百戶

後漢鄧禹字仲華南陽新野人光武安集河北即杖策北度追及於鄴號曰鄧將軍嘗宿止於中與定計

議及王郎起兵光武自薊至信都使禹發奔命得數千人令自將之別攻拔樂陽

樂陽縣屬 從至廣阿 東觀

帝率禹等擊王郎橫野將軍劉奉大破之帝過禹營禹進炙魚帝發啗勞勉吏士威嚴甚厲眾皆竊言劉公真天人光武使別將騎與蓋延等擊銅馬於清陽延等

先至戰不利還保城為賊所圍禹遂進與戰破之生獲其大將從光武追賊至滿陽連大克獲北州畧定

及赤眉西入關更始使定國上公王匡襄邑王成丹抗威將軍劉均及諸將分據河東弘農以拒之赤眉

眾大集王匡等莫能當光武籌赤眉必破長安欲乘釁并關中而方自事山東未知所寄以禹沈深有大

度故授以西討之略乃拜為前將軍持節中分麾下精兵二萬人遣西入關令自選偏裨以下可與俱者

於是以韓歆為軍師李文李春程慮為祭酒

慮字或為憲

馮楷為積弩將軍樊崇為驍騎將軍宗歆為車騎將

軍鄧尋為建威將軍耿訢為赤眉將軍左于為軍師

將軍引而西建武元年正月禹自箕關將入河東

在今王河東都尉守關不開禹攻十日破之獲輜重

千餘乘進圍安邑數月未能下更始大將軍樊參將

數萬人度大陽欲攻禹

大陽縣屬河東郡春秋秦伯伐晉自茅津渡河東大陽縣

是禹遣諸將逆擊於解南大破之斬參首

解縣屬河東郡於是王廙成丹劉均等合軍十餘萬復共擊禹禹軍不

利樊崇戰死會日暮戰罷軍師韓歆及諸將見兵勢

已摧皆勸禹夜去禹不聽明日癸亥王廙等以六甲

窮日不出禹因得更理兵勒衆明日廙等悉軍出攻

禹禹令軍中無得妄動既至營下因傳發諸將鼓而

竝進大破之廙等皆棄軍亡走禹率輕騎急追獲劉

均及河東太守楊寶持節中郎將弭疆皆斬之收得

節六印綬五百兵器不可勝數遂定河東承制拜李

文為河東太守悉更置屬縣令長以鎮撫之

馮異字公孫潁川人漢兵起異以郡掾監五縣與父

城長苗萌共城守為王莽拒漢光武畧地潁川攻父

城不下屯兵巾車鄉異間出行屬縣為漢兵所執時

將帥部

異從兄孝及同郡丁繚召晏並從光武因共薦異得  
 召見異曰異一夫之用不足為強弱有老母在城中  
 願歸據五城以効功報德光武曰善異歸謂苗萌曰  
 今諸將皆將士偏起多暴橫獨有劉將軍所到不虜  
 掠觀其言語舉止非庸人也可以歸身苗萌曰死生  
 同命敬從子計光武南還宛更始諸將攻父城者前  
 後十餘輩異堅守不下及光武為司隸較尉道經父  
 城異等即開門奉牛酒迎光武署異為主簿苗萌為  
 從事從至緱陽更始數欲遣光武徇河北諸將皆以  
 為不可是時左丞相曹竟子詡為尚書父子用事異

勸光武厚結納之及度河北詡有力焉異後因間進  
 說曰天下同苦王氏思漢久矣今更始諸將從橫暴  
 虐所至虜掠百姓失望無所依戴今公專命方面施  
 行恩德夫有桀紂之亂乃見湯武之功人久飢渴易  
 為充飽宐急分遣官屬徇行郡縣理冤結布惠澤光  
 武納之至邯鄲遣異乘傳撫循屬縣及王郎起光武  
 自薊東南馳至饒陽蕪萋亭亭名今在饒陽遇大風雨光武  
 引車入道傍空舍異抱薪爇火復進麥飯菟肩因復  
 渡漳沱河至信都使異別收河間襄還拜偏將軍從

破王郎封應侯

應國在城父縣西南

別擊破鐵脰於北平又降

匈奴于林關頓王匈奴王號因從平河北時更始遣李軾

因立朱鮪陳僑等僑一作喬將兵號三十萬與河南太守

武勃共守滎陽光武乃拜寇恂為河內太守異為孟

津將軍統二郡軍河上與恂合勢以拒朱鮪等北攻

天井關拔上黨兩城又南下河南成臯已東十三縣

及諸屯聚皆平之降者十餘萬武勃將萬餘人攻請

畔者異引軍渡河與勃戰於士鄉下士鄉亭名屬河南大破

斬勃獲首五千餘級勸光武即帝位異與諸將定議

上尊號建武二年春定封陽夏侯引擊陽翟賊嚴終

趙根破之時赤眉延岑暴亂三輔郡縣大姓各擁兵

衆大司徒鄧禹不能定乃遣異代禹討三輔既至

布威信弘農群盜稱將軍者十餘輩皆率衆降異

與赤眉遇於華陰相拒六十餘日戰數十合降其

劉始王宣等五千餘人三年春遣使者即拜異為征

西大將軍與鄧禹鄧弘等共攻赤眉大破於嶠底降

男女八萬人餘衆尚十餘萬東走宜陽延岑據藍田

王歆據下邳芳丹據新豐蔣震據霸陵張邯據長安

公孫守據長陵楊周據谷口呂鮪據陳倉角闕據沂

駱蓋延據盩厔任良據鄠汝章據槐里各稱將軍據

兵多者萬餘少者數千人轉相攻擊異且戰且行屯

軍上林苑中延岑旣破赤眉自稱武安王拜置牧守  
欲據關中張郃任良共攻異異擊破之斬首千餘級  
諸營保守附岑者皆來歸降異岑走攻折異遣復漢  
將軍鄧曄輔漢將軍于廙要擊岑大破之降其將蘇  
臣等八千餘人岑遂自武關走南陽詔拜南陽趙匡  
爲右扶風將兵助異乃稍誅擊豪傑不從令者褒賞  
降附有功勞者悉遣其將帥詣京師散其衆歸本業  
威行關中唯呂鮪張郃蔣震遣使降蜀其餘悉平  
吳漢字子顏南陽宛人王莽末亡命至漁陽更始立  
使使者韓鴻徇河北或謂鴻曰吳子顏奇士也可與  
計事鴻召見漢甚悅之遂承制拜爲安樂令會王郎  
起北州擾惑漢素聞光武長者獨欲歸心乃說太守  
彭寵曰漁陽上谷突騎天下所聞也君何不合二郡  
精銳附劉公擊邯鄲此一時之功也寵以爲然而官  
屬皆欲附王郎寵不能奪漢辭出止外亭念所以誦  
衆未知所出望見道中有一人似儒生者漢使人召  
見之爲具食問以所聞生因言劉公所過爲郡縣所  
歸邯鄲舉尊號者實非劉氏漢大喜卽詐爲光武書  
移檄漁陽使生齎以詣寵令具以所聞說之漢復隨  
後入寵甚然之於是遣漢將兵與上谷諸將并軍而

南所至擊斬王郎將帥及光武於廣阿拜漢為偏將軍既拔邯鄲賜號建策侯光武將發幽州兵鄧禹薦之拜大將軍持節北發十郡突騎更始幽州牧苗曾不肯應調漢乃將二十騎先馳至無終在今幽州斬曾而奪其軍北州震駭城邑莫不望風弭從弭服也遂悉發其兵引而南與光武會又與岑彭攻更始尚書令謝躬于邯鄲襲其城漢手擊殺躬其眾悉降光武北擊群賊謂銅馬高胡漢嘗將突騎五千為軍鋒數先登陷陣及河北平漢與諸將奉圖書上尊號光武即位拜為大司馬更封舞陽侯

賈復字君文南陽冠軍人王莽末為縣掾時下江新市兵起復亦聚眾數百人於羽山自號將軍更始立乃將其眾歸漢中王劉嘉以為較尉復見更始政亂諸將放縱乃說嘉曰臣聞圖堯舜之事而不能至者湯武是也圖湯武之事而不能至者桓文是也圖桓文之事而不能至者六國是也定六國之規欲安守之而不能至者亡六國是也今漢室中興大王以親戚為藩輔天下未定而安守所保得無不可保乎嘉曰卿言大非吾任也大司馬劉公在河北必能相施

第馳我書往施用也復遂辭嘉受書北渡河及光武

於柏人因鄧禹得召見光武奇之禹亦稱有將帥節  
於是署復破虜將軍督盜賊光武至信都以復為偏  
將軍及拔邯鄲遷都護將軍從擊青犢於射犬大戰  
復被羽先登所向皆靡賊乃敗走又北與五校戰於  
真定大破之光武卽位拜為執金吾封冠軍侯先渡  
河攻朱鮪於雒陽與陳僑戰連破降之建武二年益  
封穰朝陽二縣更始鄧王尹尊及諸大將在南方未  
降者尚多光武遣復與騎都尉陰識驍騎將軍劉植  
南度五社津擊鄧連破之月餘尹尊降盡定其地引  
東擊更始淮陽太守暴汜汜降屬縣悉定南擊召陵

新息平定之

新息今蔡州縣

明年遷左將軍別擊赤眉於新

城澠池間連破之與光武會安陽遂降赤眉

寇恂字子翼上谷昌平人初為郡功曹太守耿况甚  
重之會王郎起遣將狗上谷急况發兵恂與門下掾  
閔業共說况曰邯鄲拔起難可信向昔王莽時所難  
獨有劉伯升耳今聞大司馬劉公伯升母弟尊賢下  
士士多歸之可攀附也况曰邯鄲方盛力不能獨拒  
如何恂對曰今上谷完實控弦萬騎舉大郡之資可  
以詳擇去就恂請東約漁陽齊心合衆邯鄲不足圖  
也况然之乃遣恂到漁陽結謀彭寵恂還至昌平



擊耶鄆使者殺之奪其軍遂與况子弁等俱南及光武於廣阿拜恂為偏將軍號承義侯從破群賊數與鄧禹謀議禹奇之薦恂為河內太守行大將軍事會更始將朱鮪使討難將軍蘇茂副將賈彊將兵三萬餘人渡鞏河攻溫鞏溫皆縣名恂勒軍奔擊大破之追至維陽遂斬賈彊茂兵自投河死者數千生獲萬餘人光武大喜曰吾知寇子翼可任也諸將軍賀因上尊號於是卽位建武二年封雍奴侯邑萬戶

鄧晨字偉鄉南陽新野人初娶光武姊元王莽末穰人蔡少公學圖讖言劉秀當為天子或曰是國師公

劉秀光武戲曰何用知非僕耶坐者皆大笑晨心獨喜及光武與家屬避吏新野舍晨廬甚相親愛及漢兵起更始立以晨為偏將軍與光武畧地至潁川俱夜出昆陽城擊破王尋王邑又別徇陽翟以東至京

密皆下之京密二縣名京今鄭州滎陽縣東鄭之京邑也密今河南府縣更始北都

維陽以晨為幃山太守光武追銅馬高胡羣賊於冀

州晨發積射士千人積與迹同謂尋迹而射也又遣委輸給軍不

絕光武卽位封房子侯房子在今鄭州

蓋延字巨卿漁陽要陽人彭寵為太守召延署營尉行護軍及王郎起延與吳漢同謀歸光武延至廣阿

拜偏將軍號建功侯從平河北光武即位以延為虎牙將軍建武二年更封安平侯

陳俊字子昭南陽西鄂人

江夏有鄂故加西也其少城在今鄂州西城縣南

為郡吏更始立以宗室劉嘉為太嘗將軍俊為長史光武徇河北嘉遣書薦俊光武以為安集掾從擊銅馬於清陽進至滿陽拜彊弩將軍與五較戰於安次俊下馬手接短兵所向必破追奔二十餘里斬其渠帥而還五較引退入漁陽俊將輕騎馳出賊前親入保壁堅完者勅令固守放散在野者因掠取之賊至無所得遂散敗光武即位封為列侯建武三年春攻

長垣賊下四縣更封新處侯

新處縣名屬中山

耿弇字伯昭扶風茂陵人王莽末弇父况為朔調連帥及更始立諸將略地者前後多擅威權輒改易守令况自以王莽之所置懷不自安時弇年二十一乃辭况奉奏詣更始因齎貢獻以求自固之室及至宋子會王郎詐稱成帝子子輿起兵邯鄲弇從吏孫倉衛包於道共謀曰劉子輿成帝正統捨此不歸遠行安之弇按劍曰子輿弊賊卒為降虜耳我至長安與國家陳漁陽上谷兵馬之用還出太原代郡反覆數十日歸發突騎以犇烏合之眾

犇也

如摧枯折腐耳

觀公等不識去就族滅不久也倉包不從遂亡降王  
郎弇道聞光武在盧奴乃馳北上謁光武留署門下  
吏弇因說護軍朱祐求歸發兵以定邯鄲光武笑曰  
小兒曹乃有大意哉因數召見加恩慰弇因從光武  
北至薊聞邯鄲王郎兵方到光武將欲南歸召官屬  
計議弇曰今兵從南來不可南行漁陽太守彭寵公  
之邑人上谷太守卽弇父也發此兩郡控弦萬騎邯  
鄲不足慮也光武官屬腹心皆不肯曰死尙南首柰  
何北行入囊中光武指弇曰是我北道主人也會薊  
中亂光武遂南馳官屬各分散弇走昌平就况因說  
况使寇恂東約彭寵各發突騎二千匹步兵千人弇  
與景丹寇恂及漁陽兵合軍而南所過擊斬王郎大  
將九卿較射以下四百餘級得印綬百二十五節二  
斬首三萬餘級定涿郡中山鉅鹿清河河間凡二十  
二縣遂及光武於廣阿是時光武方攻王郎傳言二  
郡兵爲邯鄲來衆皆恐旣而悉詣營上謁光武見弇  
等說曰當與漁陽上谷士大夫共此大功乃皆以爲  
偏將軍使還領其兵加况大將軍興義侯得自置偏  
裨弇等遂從拔邯鄲時五較賊二十餘萬北寇上谷  
况與子破胡將軍舒連擊破之賊皆退走更始見光

武威聲日盛君臣疑慮乃遣使立光武爲蕭王令罷兵與諸將有功者還長安遣苗曾爲幽州牧韋順爲上谷太守蔡充爲漁陽太守竝北之部時光武居邯鄲宮晝臥溫明殿弁入造牀下請問因說曰今更始失政君臣淫亂諸將擅命於畿內貴戚縱橫於都内天子之命不出城門所在牧守輒自遷易百姓不知所從士人莫敢自安虜掠財物劫掠婦女懷金玉者至不生歸元元叩心更思莽朝又銅馬赤眉之屬數十輩輩數十百萬聖公不能辦也其敗不久公首事南陽被百萬之軍今定河北北據天府之地以義征

伐磔號響應天下可傳檄而定天下至重不可令它姓得之聞使者從西方來欲罷兵不可從也今更士死亡者多弁願歸幽州益發精兵以集其大計光武大說乃拜弁爲大將軍與吳漢北發幽州十郡兵弁到上谷收韋順蔡充斬之漢亦誅苗曾於是悉發幽州兵引而南從光武擊破銅馬高胡赤眉青犢又追尤來大捨五幡於元氏弁嘗將精騎爲軍鋒輒破走之光武乘勝戰慎水上追至容城小廣湯安次連戰破之光武還薊復遣弁與吳漢景丹蓋延朱祐邳彤耿純劉植岑彭祭遵堅鐔王霸陳俊馬武十三將軍

追賊至潞東及平谷再戰斬首三千餘級遂窮追於  
 右北平無終上垠之間至浚靡而還無終上垠浚靡  
 並縣名屬右北  
 平賊散入遼西遼東或為烏桓貊人所鈔擊畧盡光  
 武卽位拜弇為建威大將軍建武二年更封好畤侯

册府元龜卷第三百四十一

册府元龜

册府元龜卷第三百四十二

巡按福建監察御史臣李嗣京訂正

知長樂縣事 臣夏允彝參閱  
 知建陽縣事 臣黃國琦較釋

將帥部 三

佐命第三

後漢銚期字次况潁川邠人光武畧地潁川聞期志  
 義召畧賊曹掾賊曹王盜賊之  
 事比二百石從狗薊時薊中起兵

應王郎光武趨駕出百姓聚觀誼譁滿路遮道不得  
 行期奮戟瞋目大呼左右曰趨止行清道若  
 今警蹕也衆皆披

靡及至城城門已閉攻之得出行至信都以期為禪  
 將與傅寬呂晏俱屬鄧禹狗傍縣又發房子兵禹以  
 期為能獨拜偏將軍授兵二千人寬晏各數百人光  
 武使期別狗真定宋子攻拔樂陽豪肥樂陽豪今  
 豪城縣肥  
累胡肥子國從擊王郎將兒宏副劉奉於鉅鹿下期  
並屬真定  
 先登陷陣手殺五十餘人遂大破之王郎平拜期虎  
 牙大將軍乃因間說光武曰河北之地界接邊塞人  
 習兵戰號為精勇今更始失政大統危殆海內無所  
 歸往明公據河山之固擁精銳之眾以順萬人思漢  
 之心則天下誰敢不從光武笑曰卿欲遂前趨邪惟  
 天

子得稱

時銅馬數十萬眾入清陽博平

博平今  
博州縣

期與

諸將迎擊之連戰不利會光武救至遂大破之從擊  
 青犢赤眉於射犬賊襲期輜重期還擊之手殺傷數  
 十人身被三創而戰方力力苦遂破走之光武即位

封安成侯

屬汝南郡故城在  
今汝陽縣東南

食邑五千戶

王霸字伯元潁川潁陽人漢兵起光武過潁陽霸率  
 賓客上謁曰將軍興義兵竊不自量貪慕威德願克  
 行伍光武曰夢想賢士共成功業豈有二哉遂從擊  
 破王尋王邑於昆陽還休鄉里及光武為司隸校尉  
 道過潁陽霸請其父願從父曰吾老矣不任軍旅汝

往勉之霸從至雒陽及光武為大司馬以霸為功曹  
 令史從渡河北賓客從霸者數十人稍稍引去光武  
 謂霸曰潁川從我者皆逝而子獨留努力疾風知勁  
 草及王郎起光武即南馳下曲陽以霸為軍正爵關  
 內侯既至信都發兵攻拔邯鄲霸追斬王郎得其璽  
 綬封王鄉侯從平河北嘗與臧宮傅俊共營光武即  
 位以霸曉兵愛士可獨任拜為偏將軍并將宮俊兵  
 而以宮俊為騎都尉建武二年夏封富波侯富波縣名屬汝南  
 祭遵字弟孫潁川潁陽人光武破王尋等還過潁陽

遵以縣吏數進見光武愛其容儀署為門下史從征  
 河北為軍市令尋拜為偏將軍平河北以功封列侯  
 建武二年拜征虜將軍封潁陽侯

臧宮字君翁潁川邠人少為縣亭長游徼漢制十里一亭有長每鄉有游徼皆禁姦盜後率賓客入下江兵中為較尉因從光

武征戰諸將多稱其勇光武察宮勤力少言甚親納  
 之及至河北以為偏將軍從破羣賊數陷陣却敵光  
 武即位以為侍中騎都尉建武二年封成安侯屬潁川

明年將突騎與征虜將軍祭遵擊更始將左防韋顏韋顏一  
 作於沮陽酈悉降之後封期思侯屬汝南故城在今光州固始縣西北

任光字伯卿南陽宛人爲郡縣吏漢兵至宛軍人見光冠服鮮明令解衣將殺而奪之會光祿勳劉賜適至視光容貌長者乃救全之光因率黨與從賜爲安集掾拜偏將軍與光武破王尋王邑更始至雒陽以光爲信都太守及王郎起郡國皆降之光獨固守會光武自薊還狼狽不知所向傳聞信都獨爲漢拒邯鄲卽馳赴之光等孤城獨守恐不能全聞光武至大喜吏民皆稱萬歲卽時開門迎謁光武拜光爲左大將軍封武成侯使光將兵從入堂陽界堂陽今鎮州縣使騎各持炬火彌滿澤中光炎燭天地舉城莫不震驚惶怖其夜卽降旬日之間兵衆大盛因攻城邑遂屠邯鄲廼遣光歸郡光武卽位封光陽陵侯陽陵縣名屬涿郡食邑萬戶

李忠字仲都東萊黃人黃今登州縣故城在縣東南王莽末爲新

博屬長莽改信都國曰新博都尉曰屬長也更始立使使者行郡國卽

拜忠都尉官忠遂與太守任光同奉光武以爲右大

將軍封武固侯從攻下屬縣至苦陘苦陘縣名屬中山進圍

鉅鹿未下王郎遣將攻信都信都大姓馬寵等開城

內之會更始遣將攻信都因使忠還行太守事及任

光歸郡忠乃還復都尉建武二年夏封中水侯中水屬涿



郡故城在今瀛州樂壽縣西北

食邑三千戶

萬修字君游扶風茂陵人更始時為信都令與太守任光都尉李忠共城守迎光武拜為偏將軍封造義侯及破邯鄲拜右將軍從平河北建武二年夏封槐里侯

邳彤字偉君信都人初為王莽和成卒正

王莽分鉅鹿為和成

郡居下曲陽以彤為卒正也

光武徇河北至下曲陽彤舉城降復

以為太守留止數日光武北至薊會王郎兵起使其蕭蕭蕭地新到縣莫不奉迎唯和成信都堅守不下彤

聞光武從薊還失軍欲至信都乃先使五官掾張萬

督郵尹綏選精騎二千餘匹沿路迎光武軍彤尋與

光武會信都拜彤為後大將軍使將兵居前北至堂

陽堂陽已反屬王郎彤使張萬尹綏先曉諭吏民光

武夜至即開門出迎引兵擊破白奢賊於中山自此

嘗從戰攻及拔邯鄲封武義侯建武元年更封靈壽

侯靈壽縣名故城在今鎮州

劉植字伯先鉅鹿昌城人王郎起植與弟喜從兄歆

喜一作嘉字共仲歆字細君也

率宗族賓客聚兵數千人據昌城聞

光武從薊還廼開門迎光武以植為驍騎將軍喜歆

偏將軍皆為列侯時真定王劉楊起兵以附王郎眾

十餘萬光武遣植說楊楊廼降因得進兵拔邯鄲從平河北建武二年更封植為昌城侯

耿純字伯山鉅鹿宋子人初從李軼為騎都尉安集

趙魏會光武渡河至邯鄲純即謁見光武深接之純

退見官屬將兵法度不與宅將同遂求自結納獻馬

及縑帛數百疋光武北至中山留純邯鄲會王郎及

光武自薊東南馳純與從昆弟訢宿植共率宗族賓

客二千餘人奉迎於育

育縣名在冀州

拜純為前將軍封耿

鄉侯

郎水北有耿鄉俗謂之室安城在鎮州豪城縣西南

訢宿植皆偏將軍使

純居前鋒宋子從攻下曲陽及中山及至鄆光武止

傳舍鄆大姓蘇公反城開門內王郎將李暉純先覺

悉將兵逆與暉戰大破之從平邯鄲又破銅馬時赤

眉青犢上江大彤鐵脰五幡十餘萬眾並在射犬光

武引兵將擊之純軍在前去眾營數里賊忽夜攻純

雨射營中

雨射謂矢下如雨也

純勒部曲堅守不動選敢死二

千人俱持強弩各傅三矢使銜枚間行

傅著也

繞出賊

後齊聲呼譟強弩竝發賊眾驚走追擊破之光武即

位封高陽侯擊劉永於濟陰下定陶後封為東光侯

東光今滄州縣也

朱祐字仲先南陽宛人往來春陵光武與伯升皆親

愛之伯升拜大司徒以祐為護軍及伯升死光武為

大司馬討河北復以祐為護軍嘗力戰陷陣以為偏

將軍封安陽侯光武即位拜為建義大將軍建武二

年更封堵陽侯

堵陽縣名故城在今唐州方城縣

景丹字孫卿馮翊櫟陽人以言語為固德侯相遷朔

調連帥副貳

朔調上谷也

更始立遣使者徇上谷丹與連

率耿况降復為上谷長史王郎起丹與况共謀拒之

况使丹與子弇及寇恂等將兵南歸光武光武引見

丹等笑曰邯鄲將帥數言我發漁陽上谷兵吾聊應

言然王郎將帥數云欲發二郡兵以拒光武時

何意

二郡良為吾來

東觀記曰帝在廣河聞外有大兵自來登城勒兵在西門樓上問何等兵

丹等對自上谷漁陽兵帝曰為誰來乎對曰為劉公即請丹入人人勞勉恩意甚備

方與士大

夫共此功名耳拜丹為偏將軍號奉義侯從擊王郎

將猗宏等於南繚耶共迎戰漢軍退郤丹等縱突騎

擊大破之追奔十餘里死傷者縱橫遂從征河北光

武即位拜丹為驃騎大將軍建武二年定封櫟陽侯

與吳漢耿弇朱祐賈復馮異陳俊王嘗臧宮等從擊

破五較於葦陽

聚名

降其眾五萬人

王梁字君嚴漁陽安陽人為郡吏太守彭寵以梁守

狐奴令與蓋延吳漢俱將兵南及光武於廣阿拜偏

將軍野王令與河內太守寇恂南拒維陽北守天井關朱鮪等不敢出兵光武以為梁功及即位拜為大司空封武強侯

杜茂字諸公南陽冠軍人初歸光武於河北為中堅將軍嘗從征伐及即位拜大將軍封樂鄉侯

樂鄉屬信都

北擊五較於真定進降廣平建武二年更封苦陘侯與王梁擊五較賊於魏郡清河東郡悉平諸營保降其持節大將三十餘人

謂大將軍杜猛持節光祿大夫董敦等

三郡清

靜道路流通拜驃騎大將軍

馬成字君遷南陽棘陽人少為縣吏光武徇潁川以

成為安集掾調守邾令

邾縣名今汝州縣也

光武討河北成即

棄官步負追及於漁陽以成為期門從征伐及即位

再遷護軍都尉

劉隆字元伯南陽安衆侯之宗室更始拜為騎都尉

謁歸

謁請也謂請假歸也

迎妻子置維陽聞光武在河內即追

及於射犬以為騎都尉與馮異共拒朱鮪李軼等軼

遂殺隆妻子建武二年封元父侯

元父屬東城故城在今兗州王城縣南

傅俊字子衛潁川襄城人光武徇襄城俊以縣亭長

迎軍拜為轅尉襄城收其母弟宗族皆滅之從破王

尋等以為偏將軍別擊京密破之及光武討河北俊  
與賓客十餘人北追及於邯鄲光武使潁川兵嘗從  
征伐及即位以俊為侍中建武二年封昆陽侯

堅鐔字子假一作假潁川襄城人為郡縣吏光武討河

北以其吏能署主簿又拜偏將軍從平河北別擊破

大捨於盧奴及即位拜鐔揚化將軍封懸強侯潁川人

岑彭字君然南陽棘陽人王莽時守本縣長漢兵起

彭降更始封為歸德侯令屬伯升及伯升遇害彭遷

潁川太守會舂陵劉茂起兵略下潁川彭不得之官

乃與麾下數百人從河內太守韓歆會光武徇河內

彭勸歆迎降因進說曰今赤眉入關更始危殆權臣

放縱矯稱制詔道路阻塞四方蜂起群雄競逐百姓

無所歸命竊聞大王平河北開王業此誠皇天祐漢

士人之福也彭蒙司徒公所見全濟未有報德謂彭初降

諸將欲誅之伯升言不如封之以勸後旋被禍難永恨於心謂伯升為

今復遭遇願出身自效光武深接納之更始大將軍

呂植將兵屯淇園彭說降之於是拜彭為刺姦大將

軍使督察眾營授以當所持節從平河北光武即位

拜為廷尉行大將軍事與吳漢王梁朱祐萬脩賈復

劉植堅鐔侯進馮異祭遵王霸等圍雒陽數月朱鮪

等堅守不下光武令彭說降之建武二年使彭擊荆  
州下準葉等十餘城準縣名在今汝州魯山縣東南葉今汝州縣也後更封

為舞陰侯

馬武字子張南陽湖陽人更始初為侍郎與光武破

王尋等拜為振威將軍與尚書令謝躬共攻王郎及

光武拔邯鄲因從擊尤來五幡等敗於慎水武獨殿

還陷陣故賊不得追及殿鎮後也進至安定次小廣陽即廣

下亭也在今幽州范陽縣以有廣陽國故謂此亭為小廣陽武嘗為軍鋒力戰無

前諸將皆引而隨之故遂破賊窮追至平谷浚靡而

還平谷縣各屬漁陽郡浚靡亦縣各屬右北平郡光武即位以武為侍中騎

都尉封山都侯

朱浮沛國蕭人初從光武為大司馬主簿遷偏將軍

從破邯鄲光武遣吳漢誅更始幽州牧苗曾乃拜浮

為大將軍幽州牧守薊城遂討定北邊建武二年封

舞陽侯食三縣

魏夏侯惇字元讓沛國譙人太祖初起惇嘗為裨將

從征伐太祖行奮威將軍以惇為司馬別屯白馬遷

折衝較尉領東郡太守太祖自徐州還惇從征呂布

為流矢所中傷左目復領陳留濟陰太守封高安侯

領河南尹太祖平河北為大將軍後拒鄴破遷伏波

將軍累封至三千五百戶又從征孫權還使都督二十六軍魏國建諸將皆受魏官號惇獨漢官乃上疏自陳不當不臣之禮太祖曰吾聞太上師臣其次友臣夫臣者貴德之人也區區之魏而臣足以屈君乎惇固請乃拜爲前將軍文帝卽王位封惇大將軍

夏侯淵字妙才惇之族弟太祖起兵以別部司馬騎都尉從遷陳留潁川太守及與袁紹戰於官渡行督軍較尉昌稀反遣于禁擊之未拔復遣淵與禁并力擊稀遂降其十餘屯稀詣禁降淵還拜典軍較尉濟南樂安黃巾徐和司馬俱等攻城殺長吏淵將泰山

濟平原郡兵擊大破之斬和平諸縣太祖征孫權還使淵督諸將擊廬江叛者雷緒緒破又行征西護軍督徐晃擊太原賊攻下二十餘屯斬賊帥商曜屠其城從征韓遂等戰於渭南又督朱靈平隄糜汧氏與太祖會安定降楊秋太祖還鄴以淵行護軍將軍督朱靈路招等屯長安擊破南山賊劉雄降其衆還圍韓遂馬超餘黨梁興於鄠拔之斬興封博昌亭侯初抱罕宋建因涼州亂自號河首平漢王太祖使淵帥諸軍討建月餘拔之斬建及所置丞相巴下淵別遣張郃等平河關渡河入小湟中河西諸羌盡降隴右

平淵累封至八百戶從征張魯會魯降以淵行都護將軍督張郃徐晃等平巴郡太祖還鄴留淵守漢中拜征西將軍建安二十四年蜀先主軍陽平關淵拒之戰死

李通江夏平春人以俠聞於江汝之間郡人陳恭共起兵於朗陵衆多歸之後舉衆詣太祖恭許拜通振威中郎將屯汝南西界太祖討張繡劉表遣兵以助繡太祖軍不利通將兵夜詣太祖太祖得以復戰通爲先登大破繡軍拜裨將軍封建功侯又擊群賊瞿恭江宮沈成等皆破殘其衆送其首遂定淮汝之地

改封都亭侯拜汝南太守時賊張赤等五千餘家聚桃山攻破之

于禁泰山鉅平人黃巾起鮑信招合徒衆禁附從焉及太祖領兗州禁與其黨俱爲都伯屬將軍王朗朗異之薦禁才任大將軍太祖召見與語拜軍司馬使將兵詣徐州攻廣威拔之拜陷陣都尉討呂布於濮陽別破布二營於城南又別將破高雅於須昌從攻壽張定陶離狐圍張超於雍丘皆拔之從征黃巾劉辟黃邵等屯版梁邵等夜襲曹公營禁帥麾下擊破之斬辟邵等盡降其衆遷平虜較尉



鮑信少有大節寬厚愛人沈毅有謀漢末大將軍何進辟拜騎都尉遣歸募兵得千餘人還到成臯而進已遇害信至京師董卓亦始到信知卓必爲亂勸袁紹襲卓紹畏卓不敢發信引軍還鄉里收徒衆二萬騎七百輜重五千餘乘是歲太祖始起兵於巴吾信與弟韜以兵應太祖太祖與袁紹表信行破虜將軍韜裨將軍時紹衆最盛豪傑多向之信獨謂太祖曰夫畧不世出能摠英雄以撥亂反正者君也苟非其人雖強必斃君殆天之所啓遂深自結納太祖亦親異焉

龐晃字元顯少以良家子刺史杜達召補州都督太祖既有關中署晃大都督領親信兵常置左右晃因徙居關中

曹仁字子孝太祖從弟少好弓馬弋獵從太祖爲別部司馬行厲鋒較尉太祖之破袁術仁所斬獲頗多從征徐州仁嘗督騎爲軍前鋒別攻陶謙將呂繇破之還與大軍合彭城大破謙軍從攻費華卽墨開陽謙遣別將救諸縣仁以騎擊破之太祖征呂布仁別攻句陽拔之生獲布將劉何太祖平黃巾迎天子都許仁數有功以議郎督騎太祖征張繡仁別徇旁縣

虜其男女三千餘人太祖與袁紹久相持於官渡紹遣劉備狗彘彊諸縣多舉衆應之太祖使將騎擊備破走之盡復收諸叛縣而還紹遣別將韓荀鈔斷西道仁擊荀於雞籠山大破之封都亭侯從平荊州以仁行征南將軍留屯江陵拒吳將周瑜將數萬人來攻前鋒數千人始至仁登城望之乃募得三百人遣部曲將牛金逆與挑戰遂爲所圍仁將其麾下壯士數十騎直前衝入賊圍金等乃得解賊衆乃退轉封安平亭侯太祖討馬超以仁行安西將軍拒潼關道破超渭南蘇伯田欽反以仁行征南將軍假節屯樊鎮荊州侯音以宛叛畧傍縣衆數千人仁率諸軍攻破音斬其首還屯樊卽拜征南將軍關羽攻樊時漢水暴溢城不沒者數板會徐晃救至水亦稍減仁得潰圍而出文帝初卽王位拜仁爲車騎將軍都督荆揚益州諸軍事進封陳侯增邑至三千五百戶曹洪字子廉太祖從弟太祖起義兵討董卓至滎陽爲卓將徐榮所敗太祖失馬賊追甚武都迎曹洪等還屯陳倉文帝卽王位以洪爲前將軍曹真字子丹魏太祖族弟從操征伐屢建大勳文帝踐祚以真爲鎮西將軍假節都督雍涼州諸軍事進

封東鄉侯

張遼字文遠李傕殺王允遼從呂布東奔徐州領魯  
相太祖破呂布於下邳遼將其眾降拜中郎將賜爵  
關內侯數有戰功遷裨將軍袁紹破別定魯國諸縣  
與夏侯淵圍昌豨於東海降之從討袁譚袁尚於黎  
陽有功行中堅將軍從攻尚於鄴尚堅守不下太祖  
還許使遼與樂進拔陰安復從攻鄴鄴破別狗趙國  
檀山招降緣水諸賊及黑山孫輕等從攻袁譚譚破  
別狗海濱破遼東賊柳欽等還爲盪寇將軍復別擊  
荊州定江夏諸縣還屯臨潁封都亭侯從征袁尚於  
柳城擊斬單于蹋頓又陳蘭梅成以氐六縣叛遼督  
張郃朱蓋等討蘭成蘭轉入瀟山瀟山中有天柱山  
高峻二十餘里遼攻敗斬之太祖征孫權還使遼與  
樂進李典屯合肥權攻合肥十餘日城不可拔乃退  
遼率諸軍追擊幾復獲權太祖大壯之拜征東將軍  
還屯陳郡文帝卽王位轉前將軍孫權復叛遣遼還  
屯合肥進爵都鄉侯文帝踐祚封晉陽侯  
樂進字文謙以膽烈從太祖爲帳下吏遣募兵得千  
餘人還爲軍假司馬陷陣都尉從擊呂布於濮陽張  
超於雍丘橋鬪於苦皆先登有功封廣昌亭侯從征

張繡於安衆圍呂布於下邳別將擊眭固於射犬攻劉備於沛皆破之拜討寇校尉渡河攻獲嘉還從擊袁紹於官渡力戰斬紹將淳于瓊從擊譚尙於黎陽斬其大將嚴敬行游擊將軍別擊黃巾破之定樂安郡從圍鄴鄴定從擊袁譚於南皮先登入譚東門譚敗別攻雍奴破之太祖表漢帝爲盪寇將軍別征高幹從平荊州留屯襄陽擊關羽蘇非等皆走之又討劉備臨沮長杜普旌陽長梁太皆大破之後從征孫權假節屯合肥遷右將軍

張郃字儁乂初爲袁紹寧國中郎將後歸太祖拜偏將軍從攻鄴拔之又從擊袁譚於渤海別將軍圍雍奴大破之從討柳城與張遼俱爲軍鋒以功遷平狄將軍別征東萊討管承又與張遼討陳蘭梅成等破之從破馬超韓遂於渭南圍安定降楊秋與夏侯淵討鄜賊梁興及武都氐又破馬超平宋建太祖征張魯先遣命督諸軍討興和氏王寶茂太祖從散關入漢中又先使郃督步卒通路至陽平魯降太祖還留郃與夏侯淵等守漢中拒劉備郃別督諸軍降巴東巴西二郡淵戰殆諸軍推郃爲軍主太祖在長安遣使假郃節還屯陳倉文帝卽王位以郃爲左將軍進

爵都鄉侯及踐祚進封鄭侯

徐晃字公明初從車騎將軍楊奉討賊有功拜騎都尉後歸太祖太祖授晃兵使擊卷原武賊破之拜裨將軍從征呂布別降布將趙庶李鄒等與史渙斬眭固於河內從破劉備又從破顏良拔白馬進至延津破文醜拜偏將軍與曹洪擊滎彊賊祝臂破之又與史渙擊袁紹運車於故市功最多封都亭侯太祖既圍鄴又別討毛城設伏兵掩擊破三屯從破袁譚於南皮討平原叛賊克之從征蹋頓拜橫野將軍從征荊州別屯樊討中廬臨沮空城賊又與滿寵討關羽於漢津與曹仁擊周瑜於江陵又討太原反者圍太陵拔之斬賊帥商曜韓遂馬超等反關右遣晃屯汾陰以撫河東太祖破超等又使晃與夏侯淵平榆麋汧諸氐太祖還鄴使晃與夏侯淵拒劉備於陽平備遣陳式等十餘營絕馬鳴閣道晃別征破之復遣晃助曹仁討關羽屯宛會漢水暴溢于禁等沒羽圍仁於樊又圍將軍呂嘗於襄陽晃擊破之文帝卽王位以晃爲右將軍進封遂鄉侯及踐祚進封陽侯

許褚字仲康譙國人漢末聚少年及宗族數千家共堅壁以禦寇太祖狗淮汝褚以衆歸太祖太祖見而

壯之曰此吾樊噲也卽日拜都尉引入宿衛諸從褚  
俠客皆以爲虎士從征張繡先登斬首萬計遷較尉  
從討袁紹於官渡時常從士徐紉等謀爲逆以褚衷  
侍左右憚之不敢發伺褚休下日他等懷刀入褚至  
下舍心動卽還侍他等不知入帳見褚大驚愕他色  
變褚覺之卽擊殺他等太祖益親信之出入同行不  
離左右從圍鄴力戰有功賜爵關內侯從討韓遂馬  
超於潼關太祖將北渡臨濟河先渡兵獨與褚及虎  
士百餘人留南岸斷後超將步騎萬餘人來奔太祖  
軍矢下如雨褚白太祖賊來多今兵渡以盡宐去乃  
扶太祖上船賊戰急軍爭濟船重欲沒褚斬攀船者  
左手舉馬鞍蔽太祖船工爲流矢所中死褚右手並  
泝船乃僅得渡是日微褚幾危其後太祖與馬超等  
單馬會語左右皆不得從唯將褚超負其力陰欲前  
突太祖素聞褚勇疑從騎是褚乃問太祖曰公有虎  
侯者安在太祖顧指褚褚瞋目眦之超不敢動乃各  
罷後數日會戰大破超等褚身斬首級遷武衛中郎  
將武衛之號自此始也軍中以褚力如虎而癡故號  
曰虎癡是以超問虎侯至今天下稱焉皆謂其姓名  
後遷中堅將軍文帝踐祚進封萬亭侯

蜀關羽字雲長本字長生河東解人亡命奔涿郡先  
主於鄉里合徒衆而羽與張飛爲之禦侮先主爲平  
原相以羽飛爲別部司馬分統部曲先主與二人寢  
則同牀恩若兄弟而稠人廣坐侍立終日隨先主周  
旋不避艱險先主之襲殺徐州刺史車胄使羽守下  
邳城行太守事建安五年曹公東征擒羽以歸拜偏  
將軍曹公知羽無久留之意使張遼問之羽歎曰吾極  
知曹公待我厚然吾受劉將軍厚恩誓以同死不可  
背之及羽殺顏良乃奔先主會曹公定荊州先主自樊  
將南渡江別遣羽乘船數百艘會江陵曹公追至當  
陽長阪先主斜趣漢津適與羽船相值共至夏口孫  
權遣兵佐先主拒曹公曹公引軍退歸先主收江南  
諸郡乃封拜元勳以羽爲襄陽太守盪寇將軍駐江  
北先主西定益州拜羽董督荊州事二十四年先主  
爲漢中王拜羽爲前將軍假節鉞羽攻曹仁還至江  
陵爲吳逆擊斬之

張飛字翼德涿郡人少與關羽俱事先主又曹公入  
荊州先主奔江南曹公追之一日一夜及至當陽之  
長阪先主使飛將二千騎拒後飛據水斷橋瞋目橫  
矛曰身是張翼德也可來共決死敵皆無敢近者故

遂得免先主已定江南以飛為空都太守征虜將軍  
封新亭侯後轉在南郡先主入益州還攻劉璋飛與  
諸葛亮等泝流而上分定郡縣至江州今渝破璋將  
巴郡太守嚴顏所過戰克與先主會于成都領巴西  
太守曹公以夏侯淵張郃守漢川郡別督軍下巴西  
欲徙其民於漢中進軍宕渠蒙頭盪石與飛相拒五  
十餘日飛率精卒萬餘人從他道邀郃軍交戰郃棄  
馬緣山從間道退引軍還南鄭巴土獲安先主為漢  
中王拜飛為右將軍假節章武元年遷車騎將軍進  
封西鄉侯

馬超字孟起扶風茂陵人漢前將軍騰之子累遷徐  
州刺史諫議大夫及騰入宿衛以超為偏將軍使領  
騰營率諸戎以擊隴上郡縣殺涼州刺史韋康據冀  
城有其眾超自稱征西將軍領并州牧督涼州諸軍  
事康故吏楊阜姜敘梁寬趙衢等合謀擊超超出攻  
之不能下乃奔漢中間先主圍劉璋於成都密書請  
降先主遣人迎超超將兵徑到城下城中震怖璋即  
稽首先主聞超至喜曰我得益州矣乃使人止超而  
潛以兵資之超到令引軍屯城北未一旬而成  
以超為平西將軍督臨沮因為前都亭侯先主為  
漢中王拜超為左將軍假節既即位遷驃騎將軍領



涼州牧封豸鄉侯

黃忠字漢升南陽人荊州牧劉表以為中郎將與表從子磐共守長沙攸縣及曹公克荊州假行裨將軍仍就故任統屬長沙太守韓玄先主南定諸郡忠遂委質隨從入蜀自葭萌受任還攻劉璋忠嘗先登陷陣勇毅冠三軍益州既定拜為討虜將軍建安末於漢中定軍山擊夏侯淵淵軍大敗遷征西將軍先主為漢中王以忠為後將軍賜爵關內侯

趙雲字子龍桓山真定人本屬公孫瓚瓚遣先主為田楷拒袁紹雲遂隨從為先主主騎時先主亦依瓚

每接納雲雲得深自結託雲以兄喪辭瓚暫歸先主知其不反捉手而別雲辭曰終不背德也先主就袁

紹雲見於鄴先主與雲同牀眠臥密遣雲合募得數百人皆稱劉左將軍部曲紹不能知遂隨先主至荆

州及先主為曹公所追於當陽長阪棄妻子南走雲身抱弱子即後主也保護其夫人即後主母也皆得免難遷為

牙門將軍雲領留營司馬時孫夫人權之妹聞先主西征大遣舟船迎妹而夫人欲將後主還吳雲與

張飛勒兵截江乃得後主先主自葭萌還攻劉璋召諸葛亮亮率雲與張飛等泝江西上平定郡縣至江

州分遣雲從外水上江陽與亮會于成都成都既定以雲為翊軍將軍建興元年為中護軍封永昌亭侯

冊府元龜卷第三百四十三

冊府元龜

冊府元龜卷第三百四十三

巡按福建監察御史臣李嗣京訂正

知閩縣事臣曹鼎臣參閱

知建陽縣事臣黃國琦較釋

將帥部 四

佐命第四

吳張昭字子布彭城人漢末大亂徐方士民多避難揚土昭皆南渡江孫策創業命昭為長史撫軍中郎將升堂拜母如此肩之舊文武之事一以委昭後漢獻帝建安五年策臨亡以弟權託昭昭率羣僚立

將帥部

輔之策謂昭曰若仲謀不任事者君便自取之正權復不克捷緩步西歸亦無所慮仲謀權字也

哭未及息昭謂權曰孝廉此寧哭時耶且周公立法

而伯禽不師非欲違父時不得行也夫為人後者貴

能負荷先軌克昌堂構以成勳業也方今天下鼎沸

羣盜滿山孝廉何得寢伏哀戚肆匹夫之情哉乃身

自扶權上馬陳兵而出然後衆心知有所歸權乃上

表漢室下移屬城中外將較各令奉職昭復為權長

史權為吳王拜昭綏遠將軍封繇奉侯權既稱尊號

昭以老病上還官位及所統領更拜輔吳將軍班亞

三司改封婁侯食邑萬戶

周瑜字公瑾廬江舒人初孫堅興義兵討董卓徙家

於舒堅子策與瑜同年獨相友善瑜推道南大宅以

舍策升堂拜母有無通共收合士大夫江淮間人咸

向之江表傳曰堅為朱雋所表為佐軍留家年壽春策年十餘歲已交結知名聲譽發聞有周瑜者

與策同年亦英邁夙成聞策聲問自舒來造焉

便雅結分好義同斷金勸策徙居舒策從之瑜從

父尚為丹陽太守瑜往省之會策將東渡到歷陽馳

書報瑜瑜將兵迎策策大喜曰吾得卿諸也遂從攻

橫江當利皆拔之乃渡擊秣陵破笮融薛禮轉下湖

熟江乘勝入曲阿劉繇奔走而策之衆已數萬矣因

謂瑜曰吾以此衆取吳會平山越已足卿還鎮丹陽

瑜還頃之袁術遣從弟胤代尚爲太守而瑜與尚皆還壽春術欲以瑜爲將瑜觀術終無所成故求爲居巢長欲假塗東歸術聽之遂自居巢還吳是歲漢獻帝建安三年也策親自迎瑜授建威中郎將卽與兵二千人騎五十匹頃之策欲取荊州以瑜爲中護軍領江夏太守從攻皖拔之移進尋陽破劉勳討江夏遂定豫章廬陵留鎮巴丘會策薨權統軍瑜將兵赴喪遂留吳以中護軍與長史張昭共掌衆事十一年督孫瑜等討麻保二屯梟其渠帥囚俘萬餘口還備宮亭江夏太守黃祖遣將鄧龍將兵數千人入柴桑瑜追討擊生虜龍送吳曹公旣破荊州得其水軍船步兵數十萬議者皆欲迎之瑜請精兵二萬進住夏口遇之遂敗曹公于赤壁拜偏將軍領南郡太守以下雋漢昌瀏陽丹陵爲奉邑屯據江陵卒年三十六魯肅字子敬臨淮東城人與居巢長周瑜相親結瑜之東渡因與同行留家曲阿會祖母亡還奔東城劉子揚與肅友善遺肅書曰方今天下豪傑竝起吾子姿才尤宐今日急還迎老母無事滯於東城近鄭寶者今在巢湖擁衆萬餘處地肥饒廬江間人多依就之况吾子從乎觀其形勢又可博集時不可失足下

速之肅答然其計葬畢還曲阿欲北行會瑜已徙肅  
母到吳肅具以狀語瑜時孫策已薨權尚任吳瑜謂  
肅曰昔馬援答光武云當今之世非但君擇臣臣亦  
擇君今主人親賢貴士納奇錄異且吾聞先哲祕論  
承運代劉氏者必興於東南推步事勢當其歷數終  
構帝基以協天符是烈士攀龍附鳳馳騫之秋吾方  
達此足下不須以子揚之言介意也肅從其言瑜因  
薦肅才宜佐時當廣求其比以成功業不可令去也權  
卽見肅與語甚悅之衆賓罷退肅亦辭出乃獨還合  
榻對飲因密議曰今漢室傾危四方雲擾孤承父兄  
遺業思有桓文之功君旣惠顧何以佐之肅對曰昔  
高帝區區欲尊事義帝而不獲者以項羽爲害也今  
之曹操猶昔項羽將軍何繇得爲桓文乎肅竊料之  
漢室不可復興曹操不可卒除爲將軍計唯有鼎足  
江東以觀天下之釁規模如此亦自無嫌何者北方  
誠多務也因其多務勦除黃祖進伐劉表竟長江所  
極據而有之然後建號帝王以圖天下此高帝之業  
也權曰今盡力一方冀以輔漢耳此言非所及也會  
曹公破荊州將水軍船步兵數十萬水陸俱下權與  
諸將議皆勸迎之肅曰將軍迎曹操欲安所歸願早

定大計莫用衆人之議遂拒曹公任周瑜以行事以

肅爲贊軍較尉助畫方略曹公破走

赤壁之敗也

瑜病困

上疏乞以肅代卽拜肅奮武較尉代瑜領兵瑜士衆  
四千餘人奉邑四縣皆屬焉肅初住江陵後下屯陸  
口拜漢昌太守偏將軍從權破皖城轉橫江將軍後  
漢獻帝建安二十二年卒後權稱尊號臨壇顧謂公  
卿曰昔魯子敬嘗道此可謂明於事勢矣

呂蒙字子明汝南富陂人少南渡依姊夫鄧當當爲  
孫策將數討山越蒙年十五六竊隨當擊賊策召見  
奇之引置左右數歲鄧當死張詔薦蒙代當拜別部  
司馬策薨從權討丹陽所向有功拜平北都尉領廣  
德長從征黃祖以功爲橫野中郎將與周瑜程普等  
西破曹公於烏林圍曹仁於南郡仁退走遂據南郡  
撫定荊州還拜偏將軍領尋陽令後從權拒曹公於  
濡須數進奇計又勸權夾水口立塢所以備禦甚精  
曹公不能下而退蒙還尋陽未期而廬陵賊起令蒙  
討之誅其首惡時蜀先主令關羽鎮守荆土專有權  
命蒙西取長沙零桂三郡蒙移書二郡望風歸服惟  
零陵太守郝普城守不降會蜀先主請盟吳割湘水  
以零陵還之以尋陽陽新爲蒙奉邑後曹公又大出

濡須權以蒙爲督拒破之曹公引退拜蒙左護軍虎威將軍又拜漢昌太守食下雋瀏陽漢昌丹陵與關羽分土接境羽以兵圍曹仁於樊留傅士仁守公安蒙至南郡太守糜芳與士仁皆降遂入據城盡得羽及將士家屬皆撫慰之羽還吏士無鬪心會權至衆皆委羽而降荆州遂定以蒙爲南郡太守封孱陵侯以疾卒

賀齊字公苗會稽山陰人後漢獻帝建安元年孫策臨郡察齊孝廉領永寧長代韓晏領南郡都尉八年建安漢興南平亂齊進兵建安立都尉府遷新都太守加偏將軍十八年豫章東部民彭材李玉王海等起爲賊亂衆萬餘人齊討平之遷奮武將軍二十一年鄱陽民尤突受曹公印綬化民爲賊陵陽始安涇縣皆與突相應齊與陸遜討破突斬首數千餘黨震服丹陽三縣皆降料得精兵八千人拜安東將軍封山陰侯出鎮江上督扶州以上至皖黃武初魏以曹休來伐齊以道遠後至因在新市爲拒休等憚之引軍還遷後將軍領徐州牧初晉宗爲戲口將以衆叛如魏還爲蘄春太守圍襲安樂取其保質權以爲恥忿因軍初罷六月盛夏出其不意詔齊督糜芳鮮于

丹等襲斬春遂生虜宗

全琮字子璜吳郡錢塘人父柔為會稽東部都尉孫策至吳柔舉兵先附策表柔為丹陽都尉後為權車騎長史權又以琮為奮威校尉授兵數千人使討山越因開幕召得精兵萬餘人出屯牛渚稍遷偏將軍蜀將關羽圍樊襄陽琮上疏陳羽可討之計及禽羽權置酒公安顧琮曰君前陳此今日之捷抑亦君之功也封華亭侯黃武元年魏以舟軍大出洞口權使呂範督諸將拒之軍營相望敵數以輕船鈔擊琮嘗帶甲伏兵伺候不休頃之敵數千人出江中琮擊破

之梟其將軍尹盧遷琮綏南將軍

一云魏將曹休使

敢死萬人襲攻徐陵燒攻城車殺畧數十人

進封錢

將軍全琮徐臧追斬魏將尹盧殺獲數百

塘侯七年權至皖與輔國將軍陸遜擊曹休破之於石亭黃龍元年遷衛將軍左護軍徐州牧尚公主累加右大司馬左軍師

程普字德謀右北平土垠人初為郡吏從孫堅征伐討黃巾於宛鄧破董卓於陽人攻城野戰身被創夷堅薨復隨孫策在淮南從攻廬江拔之還俱東渡策到橫江當利破張英于麋等轉下秣陵湖熟句容曲阿普皆有功增兵二千騎五十匹進破烏程石木波



門陵傳餘杭普功爲多策入會稽以普爲吳郡都尉  
治錢塘後徙丹陽都尉居石城復討宣城涇安吳陵  
陽春穀諸賊皆破之策嘗攻祖郎大爲所圍普與一  
騎共蔽扞策驅馬疾呼以矛突賊賊披策因隨出後  
拜盪寇中郎將領零陵太守從討劉勳於尋陽進攻  
黃祖於沙羨還鎮石城策薨與張昭等共輔孫權遂  
周旋三郡平討不服又從征江夏還過豫章別討樂  
安樂安平定代太史慈備海昏與周瑜爲左右督破  
曹公於烏林又進攻南郡走曹仁拜裨將軍領江夏  
太守治沙羨食四縣周瑜卒代領南郡太守權分荆  
州與蜀普還領江夏遷盪寇將軍卒

諸葛瑾字子瑜瑯邪陽都人漢末避亂江東值孫策  
卒權姊婿曲阿弘咨見而異之薦之於權與魯肅等  
竝見賓待後爲權長史轉中司馬從討關羽封宣城  
侯以綏南將軍代呂蒙領南郡太守黃武元年遷左  
將軍督公安假節封宛陵侯魏將曹真夏侯尚等圍  
朱然等於江陵又分據中州瑾以大兵爲之救援瑾  
性弘緩推道理任計畫無應卒倚伏之術兵久不解  
權以此望之及春水生潘璋等作水城於上流瑾進  
攻浮橋真等退走權稱尊號拜瑾大將軍左都護領

豫州牧

黃蓋字公覆零陵泉陵人初辟公府孫堅舉義兵蓋從之破南山賊北走董卓拜別部司馬堅薨蓋隨策及權擐甲周旋蹈刃屠城諸山越不賓有寇難之縣輒用蓋爲守長後漢獻帝建安中隨周瑜拒曹公於赤壁以功拜武鋒中郎將武陵蠻夷反亂攻城邑乃以蓋領太守寇亂盡平後長沙益陽縣爲山賊所攻蓋又平討加偏將軍病卒

韓當字義公遼西令支人以便弓馬有膂力幸於孫堅從征伐周旋數犯危難陷敵擒虜爲別部司馬及孫策東渡從討三郡遷先登較尉授兵二千騎五十匹從征劉勳破黃祖還討鄱陽領樂安長山越畏服後以中郎將與周瑜等拒破曹公又與呂蒙襲取南郡遷偏將軍永昌太守宐都之役與陸遜朱然等共攻蜀軍於涿鄉大破之徙威烈將軍封都亭侯曹真攻南郡當保東南在外爲帥厲將士同心固守又敬重督司奉遵法令權善之黃武二年封石城侯遷昭武將軍領冠軍太守後又加都督之號將敢死及解煩兵萬人討丹陽賊破之會病卒

蔣欽字公奕九江壽春人孫策拜別部司馬授兵與

策周旋平定三郡又從定豫章累遷西部都尉會稽  
冶賊呂合秦狼等爲亂欽將兵討擊遂擒合狼五縣  
平定從討山越中郎將賀齊討黜賊欽督萬兵與齊  
并力黜賊平定從征合肥魏將張遼襲權於津北欽  
力戰有功遷盪寇將軍領濡須督征蜀關羽道病卒  
周泰字幼平九江下蔡人初隨孫策爲左右數戰有  
功策入會稽署別部司馬權愛其爲人請以自給權  
在宣城山賊數千人卒至權始得上馬而賊鋒刃已  
交於左右或斫中馬鞍衆莫能自定泰奮手騰身衝  
權是日無泰權幾危殆策深德之補春穀長後從攻  
皖討江夏皆有功後與周瑜程普拒曹公於赤壁攻  
曹仁於南郡荊州平定將兵屯岑曹公出濡須泰復  
赴擊拜平虜將軍後權破關羽欲進圖蜀拜泰漢中  
太守奮威將軍封陵陽侯

董襲字元代會稽餘姚人孫策入郡襲迎於高遷亭  
策見而偉之署門下賊曹時山陰宿賊黃龍羅周勃  
聚黨數千人策自出討襲身斬羅勃首還拜別部司  
馬授兵數千遷揚武都尉從策攻皖又討劉勳於尋  
陽伐黃祖於江夏策薨權統事鄱陽賊彭龍彭虎等  
衆數萬人襲與凌統步騭蔣欽等各別分討襲所向

輒破旬日盡平拜威越較尉遷偏將軍後漢獻帝建  
安十三年權討黃祖襲與凌統俱爲前部破斬之曹  
公出濡須襲從權赴之船敗死

其寧字興霸巴郡臨江人初依劉表因居南陽不見  
進用後轉託黃祖又以凡人畜之於是歸吳周瑜呂  
蒙竝共薦達孫權加異同於舊臣寧陳計破黃祖權  
遂西果擒祖盡獲其士衆乃授寧兵屯當口後隨周  
瑜拒破曹公於烏林攻曹仁於南郡又隨魯肅鎮益  
陽拒關羽以功拜西陵太守從攻皖爲外城督破獲  
朱光拜折衝將軍曹公出濡須寧爲前部督殺勅出  
斫敵敵驚動遂退

凌統字公績吳郡餘杭人父操從孫策征伐嘗冠軍  
履鋒及權統事從討江夏中流矢死統年十五左右  
多稱述者權亦以操死國事拜統別部司馬行破賊  
都尉使攝父兵後從破山賊權破保屯先還餘麻屯  
萬人統與督張異等留攻圍之統身當矢石所攻一  
面應時披壞諸將乘勝遂大破之後權復征江夏統  
爲前鋒先搏其城於是大獲拜承烈都尉與周瑜等  
拒破曹公於烏林遂攻曹仁遷爲較尉又從破皖拜  
盪寇中郎將領沛相與呂蒙等西取三郡反自益陽

從往合肥爲右部督拜偏將軍卒

徐盛字文嚮瑯邪莒人客於吳爲孫權別部司馬授兵五百人守柴桑拒黃祖以功遷較尉中郎將督較兵曹公出濡須從權禦之魏使邢貞拜權爲吳王權出都亭候貞貞有驕色張昭旣怒而盛忿憤顧謂同列曰盛等不能奮身出命爲國家并許雜吞巴蜀而令吾君與貞盟不亦辱乎因涕泣橫流貞聞之謂其旅曰江東將相如此非义下人者也後遷建武將軍封都亭侯領廬江太守賜臨城縣爲奉邑蜀先主次西陵盛攻取諸屯所向有功曹休出洞口盛與呂範

全琮渡江拒守以少禦多敵不能克各引軍退遷安東將軍封蕪湖侯

潘璋字文珪東郡發干人孫權爲陽羨長始往隨權因使召募得百餘人遂以爲將討山賊有功署別部司馬累遷武猛較尉偏將軍遂領百較屯半州權征關羽璋與朱然斷羽走道至臨沮在夾口璋部下司馬馬忠禽羽并羽子平都督趙累等權卽分安都至秭歸二縣爲固陵郡拜璋爲太守振威將軍封溧陽侯其寧卒又并其軍蜀先主出夷陵璋與陸遜并力拒之以功拜平北將軍襄陽太守權稱尊號拜右將

軍

朱治字君理丹陽故鄣人州辟從事隨孫堅征伐拜  
司馬從討長沙零桂等三郡賊周朝蘇馬等有功堅  
表治行都尉從破董卓於陽人會堅薨治扶翼策依  
就袁術後知術德政不立乃勸策還江東時太傅馬  
日磾在壽春辟治爲掾遷吳郡都尉策爲袁術攻廬  
江治使人於曲陽迎太妃及權兄弟策薨治與張昭  
等共尊奉權後漢獻帝建安七年權表治爲九真太  
守行扶義將軍割婁縣拳無錫毗陵爲奉邑置長吏  
征討夷越佐定東南禽截黃巾餘類陳敗萬秉等黃

武元年封毗陵侯二年拜安國將軍金印紫綬徙封  
故鄣

朱然字義封治之姊子本姓施氏初治未有子然年  
十三乃啓策乞以爲嗣然嘗與權同學書至權統事  
累遷山陰令臨川太守授兵二千人討平山賊曹公  
出濡須然備大塢及三關屯拜偏將軍後漢獻帝建  
安二十四年從討關羽別與潘璋到臨沮擒羽遷昭  
武將軍封西安鄉侯代呂蒙鎮江陵黃武元年蜀先  
主攻宐都然督五千人與陸遜并力拒之然別攻破  
其前鋒斷其後道遂破走之拜征北將軍封永安侯

魏遣曹真夏侯尚張郃等攻江陵起土山鑿地道立樓櫓臨城弓矢雨注凡六月不能克乃徹攻退還無是然名震於敵國改封當陽侯黃龍元年拜車騎將軍領兗州牧

呂範字子衡汝南細陽人避亂富春孫策見而異之範遂自委質將私客百人歸策從策攻廬江還俱東渡到橫江當利破張英於麋下小丹陽湖熟領湖熟相策定秣陵曲陽收笮融劉繇餘衆增範兵二千騎五十匹後領宛陵令討破丹陽賊還吳遷都督從攻祖卽於陵陽太史慈於身里七縣平定拜征虜中郎

將權征江夏範與周瑜等俱拒破之拜裨將軍領彭澤太守遷建威將軍封宛陵侯領丹陽太守治建業督扶州以下至海曹休領張遼臧霸等來伐範督徐盛全琮孫韶等以舟師拒休等於洞口遷前將軍封南昌侯黃武七年拜大司馬印綬未下疾卒

朱桓字休穆吳人孫權爲將軍桓給事幕府累遷邊寇較尉授兵二千人使部伍吳會二郡鳩合遺散期年之間得萬餘人後丹陽鄱陽山賊蜂起攻沒城郭殺畧長吏處處屯聚桓督領諸將周旋赴討應皆平定稍遷裨將軍代周泰爲濡須督黃武元年魏使大

司馬曹仁步騎數萬向濡須桓拒破之梟其將嘗糜生虜王雙送武昌以功封嘉興侯黃龍元年拜前將軍領青州牧

是儀字子羽北海營陵人本姓氏郡相孔融朝儀避言氏字民無上因改焉

亂會稽孫權承攝大業優文徵儀專典機密呂蒙圖襲關羽儀善其計從討羽拜忠義校尉既定荊州拜裨將軍封都亭侯遷侍中黃武中遣儀之皖就將軍劉邵欲誘致曹休休到大破之遷偏將軍進封都鄉侯

胡綜字偉則汝南固始人少孤將母避難江東孫策領會稽太守綜年十四為門下循行策薨權為討虜將軍以綜為金曹從事從討黃祖拜鄂長蜀先主下白帝權以見兵少使綜料諸縣得六千人立解煩兩部綜領右都督吳將晉宗叛歸魏為蘄春太守去江數百里數為寇害權使綜與賀齊輕行掩襲生虜得宗加建武中郎將權為吳王封綜為亭侯及都建業以綜為侍中兼領軍進封鄉侯

呂岱字定公廣陵海陵人為郡縣吏避亂南渡會孫權統事岱詣幕府累遷餘姚長召募精健得千餘人會稽東治五縣賊呂合秦狼等為亂權以岱為督軍校



尉與將軍蔣欽等將兵討之遂禽合狼五縣平定拜  
昭信中郎將後漢獻帝建安二十年督孫茂等十將  
取長沙三郡又安成攸永新茶陵四縣吏共入陰山  
城合衆拒岱攻圍卽降三郡克定權留岱鎮長沙安  
成長吳碭及中郎將袁龍等首尾關羽復爲反亂碭  
據攸縣龍在醴陵權遣橫江將軍魯肅攻攸縣碭突  
走岱攻醴陵遂擒斬龍遷廬陵郡太守時鬱林夷賊  
攻圍郡縣岱討破之是時桂陽賊王金合衆於南海  
界上首亂爲害權又詔岱討之生縛金傳送詣都斬  
首獲生凡萬餘人遷安南將軍岱既定交州復進討

九真斬獲以萬數又遣從事南宣國化暨徼外浹南  
林邑棠明諸王各遣使奉貢權嘉其功進拜鎮南將  
軍

張紘字子綱廣陵人避難江東孫策創業遂委質焉  
表爲正議較尉與張昭竝與參謀嘗令一人居守一  
人從征討紘從討丹陽策身臨行陣紘諫曰夫主將  
乃籌謀之所自出三軍之所繫命不宜輕脫自敵小  
寇願麾下重天授之姿副四海之望無令國內上下  
危懼後漢獻帝建安四年策遣紘奉章至許當曹公  
爲策薨欲因喪伐吳紘諫以爲乘人之喪旣非古義

若其不克成讎棄好不如因而厚之曹公從其言解表權為討虜將軍領會稽太守以紘為會稽東部較尉後權以紘為長史從征合肥合肥城不拔紘進計曰古之圍城開其一面以疑衆心今圍之甚密攻之又急誠懼并命戮力死戰之寇固難卒拔及救未至可以寬之以觀其變議者不同會殺騎至數至圍下馳驅挑戰權率輕騎將往突敵紘諫曰夫兵者凶器戰者危事今麾下恃壯盛之氣忽疆暴之虜三軍之衆莫不寒心雖斬將塞旗威震敵場此乃偏將之任非主將之宜也願抑賁育之勇懷霸王之計權納紘

言而止初權於羣臣多呼其字唯張昭曰張公紘曰

張東部

臣欽若等曰自晉宣帝至武帝四世專政乃受魏禪不以干戈創業故無將帥佐命元帝

渡江佐命唯王導已入宰輔門餘皆西晉舊臣固亦無將帥佐命

駱統會稽烏傷人也孫權以將軍領會稽太守統年

二十試為烏程相民戶過萬咸嘆其奮理權嘉之召

為功曹行騎都尉統志在補察苟所聞見夕不待旦

嘗勸權以尊賢接士勤求益損享賜之日可人人別

進問其燥濕加以密意誘諭使言察其志趣令皆感

恩戴義懷欲報之心權納用焉出為建中郎將領武

射吏三千人及凌統死復領其兵是時徵役繁數重

以疫癘民戶損耗統上疏權感統言深加意焉以請  
 陸遜破蜀軍於宜都遷偏將軍黃武初曹仁攻濡須  
 使別將嘗雕等襲中州統與嚴圭共拒破之封新陽  
 亭侯

册府元龜卷第三百四十三

十一月初七日

册府元龜卷第三百四十四

巡按福建監察御史臣李嗣京 訂正

知甌寧縣事 臣孫以敬 參閱

知建陽縣事 臣黃國琦 較釋

將帥部 五

佐命第五

宋朱齡石初為高祖叅軍盧循至石頭齡石領中軍  
 選敢死之士數千人上南岸高祖遣齡石領鮮卑步  
 稍過淮擊之齡石率厲將士皆殊死戰殺數百人賊  
 乃退齡石既有武幹又練吏職高祖甚親委之盧循

册府元龜

將帥部

卷之三十四

平以爲寧遠將軍寧蠻護軍西陽內史晉安帝義熙八年高祖西伐劉毅齡石從至江陵九年爲伐蜀元帥蜀平進號將軍封豐城縣侯十二年北伐爲左將軍十四年與桂陽公義真爲佛佛所殺

朱超石初歸高祖爲徐州主簿累遷中兵參軍寧朔將軍沛郡太守西伐劉毅高祖使超石率步騎出江陵未至而毅平及討司馬休之遣冠軍將軍檀道濟及超石步軍出大薄魯宗之聞超石且至自率軍攻之未戰而江陵平晉安帝義熙十二年北伐超石爲前鋒大軍進克蒲坂以超石爲河東太守及高祖自

長安來除中書侍郎封興平縣五等侯

檀韶字令孫世居京口初辟本州從事西曹主簿輔國司馬高祖建義韶及弟檀道濟等從平京城行參高祖建武將軍事都邑旣平爲鎮軍將軍加寧遠將軍東海太守進號建武將軍遷龍驤將軍秦郡太守北陳留內史以平桓玄功封巴丘縣侯食邑五百戶復參車騎將軍事加龍驤將軍遷騎將中軍諮議參軍加寧朔將軍從征廣固率向彌胡蕃等五十人攻臨朐城克之及圍廣固慕容超夜燒樓當韶圍分降號橫野將軍城陷之日韶率所領先登領北瑛邪太

守進號寧朔將軍瑯邪內史從討盧循於左里又有  
戰功并論廣固功更封空陽縣侯食邑七百戶降先  
封一等爲伯減戶之半二百五十戶賜次子臻坐六  
門內乘輿白衣領職晉安帝義熙七年號輔國將軍  
八年丁母憂起爲冠軍將軍明年復爲瑯邪內史淮  
安太守將軍如故鍾姑熟尋進號左將軍領本州大  
中正十二年遷督江州豫州之西陽新蔡二郡諸軍  
事江州刺史將軍如故有罪免官高祖受命以佐命  
功增八百戶并前千五百戶

檀道濟韶之弟也高祖創義道濟從入京城參武帝

建武軍事西討平魯山禽桓振累以義勳封吳興縣  
五等侯盧循寇逆羣盜互起以道濟爲揚武將軍天  
門太守討平之又從劉道規討桓謙荀林等率厲文  
武身先士卒所向摧破及徐道覆來逼道規親出拒  
戰道濟戰功居多高祖北伐道濟爲前鋒步自淮肥  
所至諸城戍望風降服進尅許昌凡拔城破壘俘四  
千餘人皆釋而遣之於是夷戎感悅相率歸之者甚  
衆進據潼關與諸將軍共破姚紹長安旣平以爲征  
虜將軍瑯邪內史高祖受命轉護軍領石頭戍聽直  
入殿尋以佐命功改封永修縣公

向靖字奉仁小字彌河內山陽人名與高祖同改稱小字世居京口與高祖少舊從平京城參建武軍事進平京邑板叅鎮軍事加寧遠將軍京邑雖平而羣寇互起彌與劉蕃孟龍符征破桓歆桓石康石綏於白茅攻壽陽尅之晉安帝義熙三年遷建武將軍秦郡太守北陳留內史戍堂邑以平京城功封山陽縣五等侯從征鮮卑大戰於臨朐累日不決彌與檀韶等分軍自間道攻臨朐城彌擐甲先登卽時陷潰斬其牙旗賊遂奔走攻拔廣固彌又先登盧循屯據蔡洲以親黨阮賜爲豫州刺史攻逼姑熟彌率譙國內史

趙恢討之時輔國將軍毛脩之戍姑熟告急

兼行進討破賜收其輜重除中軍諮議參軍將軍如故盧循退走高祖南征彌爲前鋒於南陵雷池左里三戰竝大捷軍還除太尉諮議參軍下邳太守將軍如故八年轉游擊將軍尋督馬頭淮西諸軍事龍驤將軍鎮蠻護軍安豐汝陰二郡太守梁國內史戍壽陽以平廣固盧循功封安南縣男食邑五百戶十年遷冠軍將軍高陽內史臨淮太守領石頭戍事高祖西征司馬休之以彌爲吳興太守將軍如故明年高祖北伐彌以本號侍從留戍礪礪進屯石門栢谷遷

向靖字奉仁小字彌河內山陽人名與高祖同改稱小字世居京口與高祖少舊從平京城參建武軍事進平京邑板叅鎮軍事加寧遠將軍京邑雖平而羣寇互起彌與劉蕃孟龍符征破桓歆桓石康石綏於白茅攻壽陽尅之晉安帝義熙三年遷建武將軍秦郡太守北陳留內史戍堂邑以平京城功封山陽縣五等侯從征鮮卑大戰於臨朐累日不決彌與檀韶等分軍自間道攻臨朐城彌擐甲先登卽時陷潰斬其牙旗賊遂奔走攻拔廣固彌又先登盧循屯據蔡洲以親黨阮賜爲豫州刺史攻逼姑熟彌率譙

趙恢討之時輔國將軍毛脩之戍姑熟告急續至彌兼行進討破賜收其輜重除中軍諮議參軍將軍如故盧循退走高祖南征彌爲前鋒於南陵雷池左里三戰竝大捷軍還除太尉諮議參軍下邳太守將軍如故八年轉游擊將軍尋督馬頭淮西諸軍事龍驤將軍鎮蠻護軍安豐汝陰二郡太守梁國內史戍壽陽以平廣固盧循功封安南縣男食邑五百戶十年遷冠軍將軍高陽內史臨淮太守領石頭戍事高祖西征司馬休之以彌爲吳興太守將軍如故明年高祖北伐彌以本號侍從留戍礪礪進屯石門栢谷遷

督北青州諸軍事北青州刺史將軍如故高祖受命以佐命功封曲江縣侯食邑千戶

劉懷慎始叅高祖鎮軍將軍事振威將軍彭城內史從征鮮卑每戰必身先士卒及克廣固懷慎率所領先登從高祖拒盧循於石頭屢戰克捷加輔國將軍晉安帝義熙八年以本號監北徐州諸軍事鎮彭城尋加徐州刺史爲政嚴猛境內振肅九年亡命王靈秀爲寇討平之十一年進北中郎將以平廣固盧循功封南城縣男食邑五百戶十三年高祖北伐以爲中領軍征虜將軍宿衛輦轂坐府內相殺免官宋臺

建召爲五兵尚書仍督江北淮南諸軍前將軍南晉州刺史復徵爲度支尚書加散騎嘗侍高祖遷都壽春留懷慎督北徐兗青淮北諸軍事前軍將軍徐州刺史以亡命入廣陵城降號征虜將軍永初元年以佐命功進爵爲侯增邑千戶進號平北將軍

劉懷肅初爲費令聞高祖起義奔縣來奔京邑平定振武將軍劉道規追桓玄以懷肅爲司馬玄留何澹之郭欽等戍桑落洲進擊破之玄旣死從子振大破義軍於楊林義軍退尋陽懷肅與江夏相張暢之攻澹之於西塞破之僞鎮東將軍馮該戍夏口東岸王



山圖據曾山城桓仙客守月壘皆連壁相望懷肅  
道規攻之躬擐甲胄陷二城馮該走石城生擒仙客  
晉安帝義熙元年正月振敗走道規遣懷肅平石城  
斬馮該及其子山靖三月振復襲江陵荊州刺史司  
馬休之出奔懷肅自雲杜馳赴晝夜兼行七日而至  
振勒兵三萬旗幟蔽野躍馬橫矛躬自突陣流矢傷  
懷肅額衆懼欲奔懷肅瞋目奮戈膽氣益壯於是士  
卒爭先臨陣斬振首江陵既平休之反鎮執懷肅手  
曰微子之力吾無所歸矣僞輔國將軍符嗣馬孫  
龍驤將軍金符靚樂志等屯結中夏懷肅又討之

樂志等道規懷肅督江夏九郡權鎮夏口除通直郎  
仍爲將軍淮南歷陽二郡太守二年又領劉毅撫軍  
司馬軍郡如故以義功封東興縣侯食邑千戶

劉粹字道冲粹家在京口少有志幹初爲州從事高  
祖克京城參建武軍事從平京邑轉參鎮軍事尋加  
建武將軍沛郡太守又領下邳太守復爲車騎將軍  
參軍從征廣固戰功居多以功封西安縣五等侯軍  
還轉中軍諮議參軍盧循逼京邑京口任重太祖時  
年四歲高祖使粹奉太祖鎮京城轉遊擊將軍遷建  
威將軍江夏相衛將軍毅粹族兄也粹盡心高祖不

與毅同高祖欲謀毅衆竝疑粹在夏口高祖愈信之及大軍至粹竭其誠力事平封灑縣男食邑五百戶母憂去職俄而高祖討司馬休之起粹爲寧朔將軍竟陵太守統水軍入河明年進號輔國將軍遷相國左司馬侍中中軍司馬冠軍將軍遷左衛將軍永初元年以佐命功改封建安縣侯食邑千戶

王鎮惡北海劇人也或薦於高祖卽召之旣至與語甚異焉以爲青州治中從事行叅中軍太尉軍事署前部賊曹拒盧循於查浦屢戰有功封博陸縣五等子後以討劉毅功封漢壽縣子食邑五百戶又討平

蠻帥向博柢根除游擊將軍高祖北伐鎮惡行龍驤將軍領前鋒鎮惡入賊境戰無不捷邵陵許昌望風奔散破虎牢及栢谷塢斬賊帥趙玄軍次雒陽僞陳留公姚洸歸順進次澠池遣司馬毛德祖攻僞弘農太守尹雅於蠡城生擒之仍行弘農太守方軌長驅徑據潼關僞大將軍姚紹率大衆拒險深溝高壘以自固鎮惡懸軍遠入轉輸不克與賊相持久將士乏食乃親到弘農督上民租百姓競送義粟軍食復振紹又病死僞撫軍將軍姚讚代紹守險衆力猶盛高祖至湖城讚引退大軍次潼關謀進取之計鎮惡率

衆水軍自河入渭僞鎮北將軍姚強屯兵涇上鎮惡遣毛德祖擊破之直至渭橋鎮惡所乘皆蒙衝小艦行船者悉在艦內羗見艦泝渭而進艦外不見有乘行船人北土素無舟楫莫不驚惋咸謂爲神鎮惡旣至令將士食畢便棄船登岸渭水流急倏忽間諸艦悉逐流去時姚泓屯軍在長安城下猶數萬人鎮惡乃身先士卒衆亦知無復退路莫不騰踊爭先泓衆一時奔潰卽陷長安城泓挺身逃走明日率妻子歸降城內夷晉六萬餘戶鎮惡宣揚國恩撫慰初附號令嚴肅百姓安堵高祖將至鎮惡於霸上奉迎高祖勞之曰成吾霸業者卿也進號征虜將軍

趙倫之字幼成高祖起兵以軍功封閬中縣五等侯累遷雍州刺史高祖北伐倫之遣順陽太守傅弘之扶風太守沈田子出嶢柳大破姚泓於藍田及高祖受命以佐命功封霄城縣侯安北將軍鎮襄陽到彥之字道豫彭城武原人高祖討孫恩以鄉里樂從每有戰功義旗將起彥之家在廣陵臨川武烈王道規尅桓弘彥之時近行聞事捷馳歸而道規已南渡江倉卒晚方獲濟及至京口武帝已向鄴孟昶居守留之及見高祖被責不自陳昶又不爲申理故不

加官晉安帝義熙元年補鎮軍行參軍六年盧循逼都彥之與檀道濟掩循輜重與循黨荀林戰敗免官後以軍功封狼山縣子爲太尉中兵參軍驃騎將軍道鄰鎮江陵以彥之爲驃騎諮議參軍尋遷司馬南郡太守又從文帝西鎮徐使持節南蠻叅尉高祖受命進爵爲侯

胡藩豫章人高祖召爲員外散騎侍郎參軍事從征鮮卑賊屯聚臨朐藩言於高祖曰賊屯軍城外內守必寡今往取其城而斬其旗幟此韓信所以克趙也高祖乃遣檀韶與藩等潛往旣至卽克其城賊見城

陷一時奔走還保廣固累月未拔之夜佐史竝集忽有鳥大如鵝蒼黑色飛入高祖帳裏衆皆駭愕以爲不祥藩起賀曰蒼黑者胡虜之色胡虜歸我大吉之祥也明旦攻城陷之從討盧循於左里頻戰有功封吳江縣五等子除正員郎尋轉寧遠將軍鄱陽太守從伐劉毅毅初當之荊州表求東道還京辭墓去都數十里不過拜闕高祖出倪塘會之藩勸於塵殺毅高祖不從至是謂藩曰吾從倪塘之謀無今舉也又從征司馬休之復爲參軍加建武將軍領遊軍於江津徐達一作走之敗沒高祖怒甚卽日於馬頭岸渡江

而江津岸峭壁立數丈休之臨岸置陳無繇可登高祖呼藩令上藩有疑色高祖奮怒命左右鑄來欲斬之藩不受命顧曰藩寧前死耳以刀頭穿岸劣容脚指於是至上隨之者稍多既得登岸殊死戰之賊不能當引退因而乘之一時奔潰高祖伐羌假藩寧朔將軍參太尉軍事統別軍至河東暴風飄輜重艦渡北岸虜牽得此艦取其器物藩氣厲心憤率左右十二人乘小船逕往河北賊騎五六百見藩來竝笑之藩素善射登岸射賊應弦而倒者十許人賊皆奔退悉收所失而反又遣藩及朱超石等破索虜於平城虜騎數重藩及超石所領皆割配新軍不盈五千率厲力戰大破之又與超石等擊姚業於蒲坂超石失利退還藩收超石所捨資實徐行而反業不敢追高祖還彭城參相國軍事時盧循餘黨與蘇淫等大相聚結以爲始興相論平司馬休之及廣固功封陽山縣男食邑五百戶

虞丘進東海郟人晉安帝隆安中從高祖征孫恩頻戰有功元興元年從高祖東征臨海於石步固與盧循相守二十餘日二年又從高祖至東陽破徐道覆其年又至臨松穴破賊追至永嘉千江又至安固累

戰皆有功三年從平京城定京邑除燕國內史義熙  
二年除龍驤將軍封龍川縣五等侯從高祖伐廣固  
於臨朐破賊盧循逼京邑孟昺諸葛長民等建議奉  
天子過江進廷議不可面折昺等高祖甚嘉之獻計  
伐樹樹柵石頭除鄱陽太守將軍如故統馬步十八  
隊於東道出鄱陽至五畝橋循遣將莫糾爲上饒令  
千餘人守故城進攻破之循又遣童敏之爲鄱陽太  
守據郡進從餘千步道趣鄱陽敏之退走追破之斬  
首數百復隨劉藩至始興討斬徐道覆八年除寧蠻  
護軍尋陽太守十年從征劉毅事平補太尉行參軍  
尋加振威將軍九年以前後功封望蔡縣男食邑五  
百戶加龍驤將軍討司馬休之又有戰功軍還除輔  
國將軍山陽太守宋臺令書除秦郡太守督陳留郡  
事將軍如故元熙二年宋王令書以爲高祖第四子  
義康右將軍司馬

孟懷玉世居京口高祖東伐孫恩以懷玉爲建武司  
馬豫義旗從平京城進定京邑以功封鄱陽縣侯食  
邑千戶高祖鎮京口以懷玉爲鎮軍參軍下邳太守  
晉安帝義熙三年出爲寧朔將軍西陽太守新蔡內  
史除中書侍郎轉輔國將軍領丹陽府兵戍石頭盧

循逼京邑懷玉於石頭岸連戰有功爲中軍諮議參  
軍賊帥徐道覆屢欲以精銳登岸畏懷玉不敢上及  
循南走懷玉與衆軍追躡直至嶺表徐道覆屯結始  
興懷玉攻圍之身當矢石旬月乃陷仍南追循循平  
又封陽豐縣男食邑二百五十戶復爲太尉諮議參  
軍征虜將軍

劉鍾彭城人晉安帝隆安中高祖伐孫恩鍾願從每  
戰有功自義旗將建校爲郡主簿從入京城將向京  
邑高祖命曰預是彭沛鄉人赴義者並可依劉主簿  
於是立爲義隊嘗在左右連戰皆捷明日桓謙屯于

東陵下範之屯覆舟山高祖疑賊有伏兵顧視左右  
正見鍾謂之曰此山下當有伏兵卿可率部下稍往  
撲之鍾應聲馳進果有伏兵數百一時奔走桓玄西  
奔其夕高祖止桓謙故營造鍾宿據東府轉鎮軍參  
軍督護桓歆寇歷陽遣鍾助豫州刺史魏詠之討之  
歆卽奔遊除南齊國內史封安丘縣五等侯從征廣  
固除振武將軍廣川太守盧循逼京邑鍾率麾下距  
柵身被重瘡賊不得入循南走鍾與輔國將軍王仲  
德追之循先留別帥范崇民以精兵高艦據南陵夾  
屯兩岸鍾自行覘賊天霧賊鉤得其舸鍾因率左右

攻艦戶賊遽閉戶拒之鍾乃徐還與仲德攻崇民崇民敗走鍾追討百里燒其船乘又隨劉藩追徐道覆於始興斬之補太尉行參軍寧朔將軍高祖討劉毅鍾率軍繼王鎮惡江陵平定與朱齡石伐蜀平之以廣固功封永新縣男恭帝元熙元年終右衛將軍褚叔度爲高祖諮議參軍署中兵加建威將軍從伐鮮卑盡其誠力盧循攻查浦叔度力戰有功循南走高祖板行廣州刺史領平越中郎將孫處字季高會稽永興人少任氣高祖東征孫恩季高隨高祖平定京邑以爲振武將軍封新夷縣五等侯廣固之役先登有功

傅弘之字仲度高祖義旗建輔國將軍劉道規以爲參軍寧遠將軍魏興太守盧循作亂桓石綏自上洛甲口自號荊州刺史徵陽令王天恩自號梁州刺史襲據西城時弘之父韶爲梁州遣弘之討石綏等竝斬之除太尉行參軍從征司馬休之署後部賊曹仍爲建威將軍順陽太守高祖北伐弘之與扶風太守沈田子等七軍自武關入僞上雒太守脫身奔走據藍田招懷戎晉晉人龐斌之戴養胡人康橫等各率部落歸化爲桂陽王義真雍州治中從事西戎司



馬寧朔將軍與義真同沒佛佛

齊薛淵汾陰人從父安都為宋徐州刺史以彭城降

魏親族皆入北太祖鎮淮陰淵遁來南委身自結果

幹有氣力太祖使領部曲備衛帳內從征伐宋後廢

帝元徽末以勳官至輔國將軍右軍將軍驍騎將軍

軍主封竟陵侯沈攸之難太祖入朝堂豫章王嶷代

守東府使淵領軍屯司徒左府分備京邑袁粲據石

頭豫章王嶷夜登西門遙呼淵驚起率軍赴難先至

石頭焚門攻戰事平明旦眾軍還集杜姥宅街路皆

滿官門不開太祖登南掖門樓處分眾軍各還本頓

至食後城門開淵方得入見太祖且喜且泣太祖即

位增邑為二千五百戶除淮南太守加寧朔將軍

陳顯達仕宋為羽林監濮陽太守隸太祖討桂陽王

休範舉兵至新亭壘宋劉劭大衍敗賊進杜姥宅及

休範死太祖欲還衛宮城或諫太祖曰桂陽雖死賊

黨猶熾人情難固不可輕動太祖乃止遣顯達率司

空參軍高敬祖自查浦渡淮緣石頭北道入承明門

屯東堂宮中恐動得顯達至乃稍定齊臺建為散騎

常侍左衛將軍領衛尉太祖即位遷中護軍增邑千

六百戶轉護軍將軍

將帥部

將帥部

戴僧靜少爲太祖撫畜嘗在左右魏軍圍角城遣僧靜戰盪數捷補帳內軍主隨還京師勳階至積射將軍羽林監沈攸之事太祖入朝堂僧靜爲軍主後袁粲據石頭太祖遣僧靜將腹心先至石頭時蘇烈據倉城僧靜將書與烈夜縱入城粲登城西南門列燭火乃分臺軍至射之火乃滅廻登東門其黨輔軍將軍孫曇瓘驍勇善戰每盪一合輒大殺傷官軍死者百餘人軍主王天生殊死拒戰故得相持自亥至丑有流星赤色照地墜城中僧靜率力攻倉門身先士卒率衆潰僧靜殺粲於是外軍燒門入僧靜以功除前

軍將軍寧朔將軍宋順帝昇明二年除游擊將軍攸之平論封諸將以僧靜爲興平縣侯邑千戶太祖卽位增邑千二百戶除南濟陰太守

荀伯玉初爲太祖冠軍刑獄參軍太祖爲明帝所疑及徵爲黃門郎深懷憂伯玉勸太祖遣數十騎入魏界安置標榜於是魏游數百里行界上太祖以聞猶懼不得留令玉卜伯玉斷卦不成行而宋明帝詔果復祖本任繇是親侍後爲太祖驃騎中兵參濟陽太守霸業旣建伯玉忠勤盡心嘗衛左右加前軍將軍隨太祖太尉府轉中兵將軍太守如故建元元年封

南豐縣子四百戶轉輔國將軍武陵王征虜司馬曹虎字士威宋明帝時太祖爲領軍補防殿隊主直西齋蒼梧廢明日虎欲出外避難遇太祖在東華中門問虎何之虎因曰故欲仰覓明公耳仍留直衛太祖鎮東府以虎與戴僧靜各領日直三百人累至屯騎較尉帶南城令豫平石頭封羅江縣男除前軍將軍太祖受禪增邑爲四百戶直閣將軍領仗主尋除寧朔將軍東莞太守

尹略淮南人少伏事太祖晚習騎射以便捷見使爲將宋順帝昇明中爲虎賁中郎將越騎較尉建元初封平固男三百戶

桓康北蘭陵承人也勇果驍悍宋孝武大明中隨太祖爲軍容從世祖在顛縣後爲世祖冠軍府參軍除殿中將軍武騎常侍出補襄賁令桂陽事起康棄縣還都就太祖會事已平除員外郎宋元徽五年七月六日夜少帝微行至領軍府帝左右人曰一府皆眠何不緣牆入帝曰我今夕欲一處作適待明日夜康與太祖所養健兒盧荒向黑於門間聽得其語明夕至敬則至扣府門康謂是變與荒黑夜上拔白欲出仍隨入宮太祖鎮東府除康武陵王中兵寧朔將軍

帶蘭陵太守嘗衛左右建元元年封吳平縣伯五百戶轉輔國將軍左軍將軍游擊將軍太守如故

周山圖為宋左中郎將時武陵王贊為郢州太守令山圖領兵衛送世祖與晉熙王燮自郢下以山圖為後防沈攸之事起世祖為西討都督啓山圖為軍副世祖留據茲城衆議以湓城城小難固不如還都山圖曰今據中流為四方勢援大衆致力川岳可為城隍小事不足難也世祖使城局參軍劉皆陳淵委山圖以處分事山圖斷取行旅船板以造樓櫓立木柵旬日皆辦世祖甚嘉之授前軍將軍加寧朔將軍進

號輔國將軍攸之攻郢城世祖令山圖量其勢山圖曰攸之見與鄰鄉承同征伐悉其為人性度險刻無以結國士心如頓兵堅城之下適所以為離散之漸耳攸之既敗平西將軍黃回乘輕舸從白服萬餘人在軍前下流緣叫湓城中恐頃方知是回凱歸乃安世祖謂山圖曰周公前言可謂明於見事矣還都太祖遣山圖領部曲鎮郢城鎮戍諸軍悉受節度遷游擊將軍輔國將軍如故建元元年封廣普縣男邑三百戶

梁沈約高祖在西邸與約有舊建康城平引為驃騎

司馬征虜將軍時高祖王業既就天人允屬約嘗扣其端高祖默而不應佗日又進曰今與古異不可以淳風期萬物士大夫攀龍附鳳者皆望有尺寸之功以保其福厥今童兒牧豎悉知齊祚已終莫不云明公其人也天文人事表革運之徵永元以來尤爲彰著讖云行中水作天子此又歷然在記天心不可違人情不可失苟是歷數所至雖欲謙光亦不可得已高祖曰吾方思之對曰初起兵樊沔此時應思今王業已就何所復思昔武王伐紂始人民便曰吾君武王不違民意亦無所思公自至京邑已移氣序比於周武遲速不同若不早定大業稽天人之望脫有一人立異便損威德且人非金石時事難保豈可以建安之封遺之子孫若天子還都公卿在位則君臣分定無復異心君明於上臣忠於下豈復有人方更同公作賊高祖然之約出高祖召范雲告之雲對畧同約旨高祖曰智者乃爾暗同卿明早將休文更來雲出語約約曰卿必待我雲諾許而約先期入高祖令草其事約乃出懷中詔書升諸選置高祖初無所改俄而雲自外來至殿門不得入徘徊壽光閣外但云咄咄約出問曰何以見處約舉手向左雲笑曰不乖

所望有頃高祖召范雲謂曰生平與沈休文羣居不覺有異人處今日才智縱橫可爲明識雲曰公今知約不異約今知公高祖曰我起兵於今三年矣功臣諸將實有其勞然成帝業者乃卿二人也

王茂爲雍州長史高祖以王佐許之事無大小皆詢焉人或譖茂帝弗之信譖者驟言之遣視其甲稍則蟲網焉乃誅言者或云茂與帝不睦帝諸腹心竝勸除之而茂少有驍名帝又惜其用曰將舉大事便害健將此非上策乃令腹心鄭紹叔往候之遇其臥因問疾茂曰我疾可耳紹叔曰都下殺害日甚使君家

門塗炭今欲起義長史那猶臥茂因擲枕起卽袴裙隨紹叔入見帝大喜下牀迎因結兄弟被推赤心遂得盡力發雍部遣茂爲前驅郢魯旣平從帝東下爲軍鋒師次秣陵東昏遣大將王珍國盛兵朱雀門衆號二十萬及戰帝軍引却茂下馬單刀直前外生章欣慶勇力絕人執鐵纏稍翼茂而進故大破之茂勳第一欣慶力也建康城平以茂爲護軍將軍遷侍中領軍將軍

張惠紹字德繼少有武幹初仕齊爲竟陵橫桑戍主母喪歸鄉里聞高祖起兵乃自歸累有戰功高祖踐

祚封石陽縣侯位驍騎將軍直閣左細仗主時東昏  
餘黨數百人竊入南北掖門夜燒神獸門害衛尉張  
弘策惠紹馳率所領赴戰賊乃敗走遷太子右衛率  
曹景宗字子震新野人高祖爲雍州刺史表爲冠軍  
將軍竟陵太守及義師起高祖至景陵以景宗與冠  
軍將軍王茂濟江圍郢城自二月至於七月城乃降  
復帥衆前驅至南州領馬步軍取建康道至江寧東  
昏將李居士以重兵屯新亭是日選精騎一千至江  
寧行頓景宗始至安營未立且師行日久器甲穿弊  
居士望而輕之因鼓噪前薄景宗景宗被甲馳戰短

兵裁接居士棄甲奔走景宗皆獲之因鼓而前徑至  
阜茨橋築壘景宗又與王茂呂僧珍犄角破王珍國  
於大航茂衝其中堅應時而陷復與衆軍長圍六門  
城平拜散騎嘗侍右衛將軍封湘西縣侯食邑一千  
六百戶

呂僧珍字元瑜高祖臨雍州爲中兵參軍委以心膂  
僧珍陰養死士歸之者甚衆高祖頗招武猛士庶響  
從會者萬餘人因命按行城西空地將起數千間屋  
以爲止舍多伐材竹沈於檀溪積茅蓋若山阜皆未  
之用僧珍獨悟其旨亦私具櫓數百張義兵起高祖

夜召僧珍及張弘策定議明旦乃會衆發兵悉取檀溪材竹裝爲艫艦葺之以茅竝立辦衆軍將發諸將果爭櫓僧珍乃出先所具每船付二張爭者乃息及建康城平高祖命僧珍率所領先入清宮與張弘策封籙府庫卽日以本官帶南彭城太守遷給事黃門侍郎領武賁中郎將高祖受禪以爲冠軍將軍前軍司馬封平固縣侯邑一千二百戶  
夏侯詳譙郡譙人也在齊爲司州刺史辭不之職高祖義兵起詳與蕭穎胄同創大舉西臺建以詳爲中領軍加散騎嘗侍南郡太守凡軍國大事穎胄多決

於詳及高祖圍郢城下穎胄遣衛尉席闡文如高祖軍詳獻議曰窮壁易守攻取勢難頓甲堅城兵家所忌誠宐大弘經畧詢納羣言軍主以下至於鄙夫皆令獻其所見盡其所懷擇善而從選能而用不以人廢言不以多問寡又須量我衆力度賊樵糧窺彼人情權其形勢若使賊人衆而食少故宐計日而守之食多而力衆故宐悉衆而攻之若使糧力俱足非攻守所屈便宐散金寶縱反間使彼智者不用愚者懷猜此魏武之所以定大業也若三事未可宐思變通觀於人情計我糧穀若德之所感萬里同符仁之所懷



遠邇歸義金帛素積糧道又充乃可以列圍寬守引以歲月此王翦之所以尅楚也若圍之不卒降攻之未可下間道不能行金粟無人積天下非一家人情難可豫此則安更思變計矣變計之道實資英斷謀之所深要難以紙宣輒布言於席衛尉特願垂採高祖嘉納焉天監元年徵為侍中車騎將軍論功封都縣侯邑二千戶

鄭紹叔字仲明滎陽人高祖臨司州命為中兵參軍領長流因是厚自結附高祖舉義兵以為驍騎將軍侍從東下江州留紹叔監州事督江湖二州糧運

關乏天監初入為衛尉卿封營道縣侯邑千戶加軍將軍以營道縣戶彫弊改封東興縣侯邑如故

自高祖臨司州為中兵參軍領長流因是厚自結附高祖罷州還京師謝遣賓客紹叔獨固請願留高祖謂曰卿才幸自有用我今未能相益空更思他途紹叔曰委質有在義無二心高祖固不許於是乃還壽陽及高祖為雍州刺史紹叔間道西歸補寧蠻長史扶風太守東昏既害朝宰疑高祖紹叔兄植為東昏直後東昏遣至雍州託以候紹叔實潛使為刺客紹叔知之密以告高祖植既至高祖於紹叔處置酒宴之戲植曰朝廷遣卿見圖今日間宴是見取良會也實主大笑令植登臨城隍周觀府署士卒器械舟楫戎馬莫不富實植退謂紹叔曰雍州實力未易圖也紹叔曰兄還具為天子言之若取雍州紹叔請以此眾一戰送兄於南

楊公則字君翼天水人為荊州西中郎參軍高祖舉

義師於雍州以爲西中郎諮議中兵參軍率衆東下  
時湘州行事張寶積發兵自守未知所附公則軍及  
巴陵仍迴師南討軍次白沙寶積懼釋甲以俟焉公  
則到州撫納之湘境遂定齊和帝卽位授持節都督  
湘州諸軍事湘州刺史高祖勒衆軍次于沔口增山  
城主孫樂祖郢州刺史張冲各據城未下公則率湘  
府之衆會于夏口時荊州諸軍悉受公則節度雖蕭  
穎達宗室之貴亦隸焉累進征虜將軍左衛將軍持  
節刺史如故郢城平高祖命衆軍卽日俱下公則受  
命先驅徑掩柴桑江州卽定連旌東下直造京邑公  
則號令嚴明秋毫不犯所在莫不賴焉天監元年進  
號平南將軍封寧都縣侯

柳慶遠爲高雍州別駕從事齊方多難慶遠謂所親  
曰方今天下將亂英雄畢起庇民定霸其吾君乎因  
盡誠協贊及義兵起慶遠嘗居帷幄爲謀主遷冠軍  
征東長史從軍東下身先士卒高祖行營壘見慶遠  
頓舍嚴整每嘆曰人人若是吾又何憂建康城平入  
爲侍中領前軍將軍城內常夜火禁中驚懼高祖時  
居宮中悉斂諸鑰問柳侍中何在慶遠至悉付之其  
見任如此霸府建以爲太尉從事中郎高祖受禪遷

散騎常侍右衛將軍加征虜將軍封重安侯食邑千戶

蕭穎達蘭陵人也爲西中郎外兵參軍高祖舉義爲冠軍將軍及楊公則等率師隨高祖曹景宗等圍郢城穎達會軍於漢口與王茂攻郢城陷之隨高祖平江州高祖進溧州使與曹景宗先率馬步進趨江寧破東昏將李居士又下東城建康城平高祖以穎達爲前軍將軍丹陽尹及大論功賞封穎達吳昌縣侯邑千五百戶

鄧元起字仲居南郡當陽人也爲平南中兵參軍高祖義師東下爲冠軍將軍率衆與高祖會于夏口高祖命王茂曹景宗及元起等圍郢城結壘九里刺史張冲屢戰輒大敗乃嬰城固守齊和帝卽位授節冠軍將軍平越中郎將廣州刺史遷給事黃門侍郎移鎮南堂摠西渚軍事中興元年七月郢城降以本號爲益州刺史仍爲前軍先定尋陽及大軍進至京邑元起築壘於建陽門與王茂曹景宗等合長圍身當鋒鏑建康城平進號征虜將軍天監初封當陽縣侯食邑一千二百戶

庾域字司大高祖舉義兵以爲寧朔將軍領行選從

高祖東下師次陽口齊和帝遣御史中丞宗史銜命勞軍域乃諷史曰黃鉞未加非所以摠率侯伯史反西臺郎授高祖黃鉞蕭穎胃既都督中外諸軍事論者謂高祖應致賤域爭不聽乃止郢城平城及張弘策議與高祖意同郎命衆軍便下每獻謀畫多被納用天監初封廣牧縣子

張弘策爲高祖雍州錄事參軍帶襄陽令高祖觀海內方亂有拯濟之心密爲儲備謀猷所及唯弘策而已及義師將起高祖夜召弘策呂僧珍入宅定議旦乃發兵以弘策爲輔國將軍軍主領萬人督後部軍事西臺建爲步兵較尉遷車騎諮議參軍及郢城平蕭穎達楊公則諸將皆欲頓軍夏口高祖以爲空乘勢長驅直指京邑以計語弘策與高祖意合又訪寧朔將軍庾域域又同乃命衆軍卽日上道沿江至建康凡磯浦村落軍行宿次立頓處所弘策逆爲圖測皆在日中義師至新林王茂曹景宗等於大航方戰高祖遣弘策持節勞勉衆咸奮厲是日仍破朱雀軍高祖入頓石頭城弘策屯門禁衛引接士類多所全免天監初加散騎嘗侍洮陽縣侯邑一千二百戶

弘策  
文獻皇后從父弟齊明帝建武末從高祖宿酒酣徙  
席生下語及時事弘策因問高祖曰緯象云何國家

故當無恙高祖曰其可言乎弘策因曰請言其兆高祖曰漢北有失地氣浙東有急兵祥今冬初魏必動若動則亡漢北帝今以疾多異議上下同憂諸部且乘機而作是妖無成徒驅除耳明年都邑有大亂死人過於亂麻齊之曆數自茲亡矣梁楚樊漢富有英雄與弘策曰英雄今何在為已富貴為草茅高祖笑曰光武有云安知非僕弘策起曰今夜言是天意也請定君臣之分高祖曰舅欲效邵長乎是冬魏軍寇新野高祖將兵為援且受密旨仍代曹武為雍州弘策聞之心喜謂高祖曰夜中之言獨當驗矣高祖笑曰且勿多言弘策從高祖西行仍參帷幄身親勞役不憚辛苦及為高祖雍州錄事參軍時長沙宣武王罷益州還仍為西中郎長史行郢州事高祖使弘策陳計於宣武王弘策因說王曰昔周室既衰諸侯力爭齊桓蓋中人耳遂能一匡九合于今稱之齊德告微四海方亂蒼生之命會應有主以郢州居中流之要雍部有戎馬之饒卿兄弟英武當今無敵虎據兩州三分天下糾合義兵為百姓請命廢昏立明易于掌握如此則桓文之業可成不世之功可建無為堅子所敗取笑身後雍州揣之已熟願圖之天頗不憚而無以拒也

蔡道恭字懷儉齊和帝鎮荊州以為西中郎中兵參軍輔國將軍高祖舉義師于雍州蕭穎胄以道恭為將素著威略專相委任遷冠軍將軍西中郎諮議參軍仍轉司馬中興元年遷右衛將軍天監初論功封漢壽縣伯邑七百戶

冊府元龜卷第三百四十四

軍輔

蔡嶺恭

而琳以

册府元龜卷第三百四十五

巡按福建監察御史臣李嗣京訂正

新建縣舉人臣戴國士參閱

知建陽縣事臣黃國琦較釋

將帥部 六

佐命第六

陳杜僧明字弘昭廣陵人梁大同中與周文育並爲廣州南江督護盧安興啓與俱行後安興死高祖在高安引爲主帥侯景之亂隨高祖入援京師高祖於始興破蘭裕爲前鋒擒裕斬之又與蔡路養戰於南

野僧明馬被傷高祖馳往救之以所乘馬授僧明僧  
明乘馬與數十人復進衆皆披靡因而乘之大敗路  
養高州刺史李遷仕又據大臯入贛石以逼高祖高  
祖遣周文育爲前軍與僧明擊走之遷仕與寧都人  
劉孝尙併力將襲南康高祖又令僧明與文育等拒  
之相持連戰百餘合卒擒遷仕送于高祖軍及高祖  
下南康留僧明頓西昌督安成廬陵二郡軍事梁元  
帝承制授假節陵野將軍新州刺史臨江縣子邑三  
百戶侯景遣于慶等寇南江高祖頓豫章命僧明爲  
前驅所向尅捷高祖表僧明爲長史仍隨東討軍至  
蔡州僧明率麾下燒賊水門大艦及景平以功除員  
外散騎嘗侍明威將軍南兖州刺史進爵爲侯增邑  
并前五百戶仍領晉陵太守承聖二年從高祖北圍  
廣陵加使持節遷通直散騎嘗侍平北將軍餘如故  
荊州陷高祖使僧明率吳明徹等隨侯瑱西援于江  
州病卒

周文育字景德義興陽羨人也廣州監州王勸以爲  
長流令勸被代文育與勸俱下至大庾嶺文育辭勸  
勸遣之高祖時高祖在高要聞其還也大喜遣人迎  
之厚加賞賜分麾下配焉高祖之討侯景文育與杜

僧明爲前軍克蘭裕援歐陽頗皆有功高祖破蔡路  
養承南野文育爲路養所圍四面數重矢石雨下所  
乘馬死文育右手搏戰左手解鞍潰圍而出因與杜  
僧明等相得兵力復進遂大敗之高祖乃表文育爲  
府司馬李遷仕之據大臯遣其將杜平虜入贛石魚  
梁作城高祖命文育擊之平虜棄城走文育據其城  
遷仕聞平虜敗留老弱於大臯悉選精兵自將以攻  
文育其鋒甚銳軍人憚之文育與戰遷仕稍却相持  
未解會高祖遣杜僧明來援別破遷仕水軍遷仕衆  
潰不敢過大臯直走新淦梁元帝授文育假節雄信

將軍義州刺史遷仕又與劉孝尙謀拒義軍高祖遣  
文育與侯安都杜僧明徐度杜稜築城於白口拒之  
文育頻出與戰遂擒遷仕高祖發自南康遣文育將  
兵五千開通江路侯景將王伯醜據豫章文育擊走  
之遂據其城累前後功除游騎將軍員外散騎嘗侍  
封東遷縣侯邑五百戶高祖軍至白茅灣命文育與  
杜僧明嘗爲軍鋒平南陵鵲頭城諸城及至姑熟與  
景將侯子鑒戰破之景平授通直散騎嘗侍改封南  
移縣侯邑一千戶拜信義太守累遷南丹陽蘭陵晉  
陵太守智武將軍散騎嘗侍高祖誅王僧辨命文育



督衆軍會世祖於吳興圍杜龕尅之又濟江襲會稽太守張彪得其郡城及世祖爲彪所襲文育時頓城北香巖寺世祖夜往趨之因共立柵頂之彪又來攻之文育悉力苦戰彪不能克旣破平彪高祖以侯瑱據江州命文育討之仍除都督南豫州諸軍事嚴威將軍南豫州刺史率兵襲湓城未尅徐嗣徽引齊寇渡江據蕪湖詔徵文育還京嗣徽等列艦於青墩至於七磯以斷文育歸路及夕文育鼓噪而發嗣徽等不能制至旦反攻嗣徽驍將鮑碎獨以小艦殿軍文育乘單舡艫與戰跳入碎艦斬碎仍牽其艦而還賊

衆大駭因留船蕪湖自丹陽步上時高祖拒嗣徽於白城適與文育相會將戰風急高祖曰兵不逆風文育曰事急矣當決之何用古法抽槳上馬馳而進衆軍從之風亦尋轉殺傷數百人嗣徽等移營幕府山文育從頓對之頻戰功最加平西將軍進爵壽昌縣公并給鼓吹一部

侯安都字成師始興曲江人梁始興內史蕭子範辟爲主簿侯景之亂招集兵甲至三千人高祖援京邑安都引兵從高祖攻蔡路養破李遷任尅平侯景並力戰有功梁元帝授猛烈將軍通直散騎嘗侍富川

縣子邑三百戶隨高祖鎮京口除蘭陵太守高祖謀襲王僧辨諸將莫知者唯與安都定計仍使安都率水軍自京口趨石頭高祖自率馬步從江城羅落會之安都至石頭北棄舟登岸僧辨勿之覺也石頭城北接岡阜雉堞不甚危峻安都被甲帶長刀軍人捧之投于女垣內衆隨而入進逼僧辨臥室高祖大軍亦至與僧辨戰于廳事前安都自內閣出腹背擊之遂擒僧辨敬帝紹泰元年以功授使持節散騎嘗侍都督南徐州諸軍事仁威將軍南徐州刺史高祖東討杜龕安都留臺居守徐嗣徽任約等引齊寇入據石頭安都與戰大敗之及高祖至以安都爲水軍于中流斷賊糧運又襲秦郡破嗣徽柵收其家口并馬驢輜重得嗣徽所彈琵琶及所養鷹遣信餉之曰昨至第任處得此令以相還嗣徽等見之大懼尋而請和高祖聽其還北及嗣徽等濟江齊之餘軍猶據采石守備甚嚴又遣安都攻之多所俘獲及爲平南將軍都督水軍出豫章助豫州刺史周文育討蕭勃安都未至文育已斬勃并擒其將歐陽顥傅泰等唯余孝頃與勃子孜猶據豫章之石頭作兩城孝頃與夜各據其一又多設船艦夾水陣安都至乃銜枚夜燒

其艦文育率水軍安都領步騎登岸結陣孝頃俄斷後路安都乃令軍士多伐松木豎柵列營漸進頻戰屢尅孜乃降孝頃奔歸新吳請入子爲質許之師還以功進號鎮北將軍加開府儀同三司後爲都督南豫州諸軍事鎮西將軍南豫州刺史令繼周文育攻余孝勵及王琳將曹慶嘗衆愛等安都自宮亭湖出松門躡衆愛後文育爲熊曇朗所害安都廻取大艦值琳將周紹周協南歸與戰破之生擒紹協孝勵弟猷率部下四千家欲就王琳遇周紹敗乃詣安都又進軍於禽奇洲破曹慶等焚其船艦衆愛奔干廬山爲村人所殺餘衆悉平

吳明徹字通昭秦郡人高祖鎮京口深相要結明徹乃詣高祖高祖爲之降階執手卽席與論當世之務明徹亦微涉書史經傳就汝南周弘正學天文孤虛遁甲略通其妙頗以英雄自許高祖深奇之梁元帝承聖二年授戎昭將軍安州刺史紹泰初隨周文育討杜龕張彪等東道平授使持節散騎嘗侍安東將軍南兖州刺史封安吳縣侯高祖受禪拜安南將軍胡穎字方秀吳興東遷人也其先寓居吳興土斷爲民穎偉姿容性寬厚梁世仕至武陵國侍郎東宮直

前出番禺征討任廣州西江都護高祖在廣州穎仍自結高祖高祖與其同郡接遇甚隆及南征交趾穎從行役餘諸將帥皆出其下及平李賁高祖旋師穎隸在西江出兵多以穎留守侯景之亂高祖尅元景仲仍度嶺援臺平蔡路養李遷仕穎皆有功歷平固遂興二縣令高祖進軍頓西昌以穎爲巴丘縣令鎮大臯督糧運下至豫章以穎監豫章郡高祖率衆與王僧辨會於白茅灣同討侯景以穎知留府事梁承聖初元帝授穎假節鐵騎將軍羅州刺史封漢陽縣侯邑五百戶尋除豫章內史隨高祖鎮京口齊遣郭

元建出關都督侯瑱率師禦之高祖選府內驍勇三千人配穎令隨瑱於東關大破之建元三年高祖圍廣陵齊人東方老據宿預請降以穎爲五原太守隨杜僧明援老不尅退還除曲阿令尋領馬軍從高祖襲王僧辨又隨周文育於吳興討杜龕梁敬帝紹泰元年除假節都督南豫州諸軍事輕車將軍南豫州刺史太平元年除持節散騎嘗侍仁威將軍尋兼丹陽尹高祖受禪兼左衛將軍餘如故

徐度字孝先安陸人也世居京師少倜儻不拘小節及長姿貌瓌偉嗜酒好博嘗使僮僕屠酤爲事梁始

興內史蕭介赴郡度從之將領士卒征諸山洞以曉  
勇聞高祖征交趾厚禮招之度乃委質侯景之亂高  
祖尅定廣州定蔡路養破李遷任計畫多出於度兼  
統兵甲每戰有功歸至白茅灣梁元帝授寧朔將軍  
合州刺史侯景平後追錄前後戰功加通直散騎嘗  
侍封廣德縣侯邑五百戶遷散騎嘗侍高祖鎮朱方  
除信武將軍蘭陵太守高祖遣衡陽獻王平荊州刺  
史度率所領從焉江陵陷間行東歸高祖平王僧辨度與  
侯安都爲水軍敬帝紹泰元年高祖東討杜龕奉敬  
帝幸京口以度領宿衛并知留府事徐嗣徽任約等  
來寇高祖與敬帝還都時賊已據石頭城市廛居民  
竝在南路去臺遙遠恐爲賊所乘乃使度將兵鎮干  
冶城寺築壘以斷之賊悉衆來攻不能尅高祖亦救  
之尋大敗約等明年嗣徽等又引齊寇濟江度隨衆  
軍破之于郊壇以功除信威將軍郢州刺史兼領吳  
興太守尋遷右將軍領軍將軍徐州沿江諸軍事鎮北將  
軍南徐州刺史給鼓吹一部

歐陽頎爲臨賀內史當侯景構逆高祖入援京邑將  
至始興頎深自結託蘭裕遣兵攻頎高祖援之裕敗  
高祖以王懷明爲衡州刺史遷頎爲始興內史高祖

之討蔡路養李遷仕也願率兵度嶺以助高祖及養等平願有功梁元帝承制以始興郡爲東衡州以願爲持節通直散騎嘗侍都督東衡州諸軍事雲麾將軍東衡州刺史新豐縣伯邑四百戶

北齊段榮五原人也高祖建義山東榮贊成大策爲大行臺右丞西北道慰喻大使巡方曉喻所在下之高祖南討鄴留榮鎮信都仍授鎮北將軍定州刺史時攻鄴未克所領軍資榮轉輸無闕高祖入雒論功封姑臧縣侯邑八百戶

斛律金初從後魏爾朱榮爲別將頗有戰功爲鎮南大將軍及爾朱兆等逆亂高祖密懷興復之計金與婁昭庫狄干等贊成大謀仍從舉義高祖南攻鄴留金守信都領恒雲燕朔顯五州大都督委以從事別討李循破之加右光祿大夫會高祖於鄴仍從平晉陽追滅爾朱兆西魏武帝太昌初爲汾州刺史進爵爲侯

孫騰初爲高祖晉州長史及起義信都騰以誠款嘗預謀策又以朝廷隔絕號令無所歸不權有所立則衆將沮散苦請於高祖從之遂立中興主除侍中尋加使持節六州流民大都督北道大行臺騰以高祖

腹心入居門下與斛斯椿同掌機密椿既生異端觸塗乖謬騰深見猜忌慮禍及已遂潛將十餘騎馳赴晉陽高祖入討斛斯椿留騰行并州事又使騰爲冀相殷定滄瀛幽安八州行臺僕射行冀州事復行相州事天平初入爲尚書左僕射內外之事騰咸知之兼司空尚書令時西魏遣將寇南兗詔騰爲南道行臺率諸將討之騰性懦怯無威畧卽失利而還又除司徒遷太保騰早依高祖契闊艱危勤力恭儉深見信待及高祖置之魏朝寄以心腹東魏孝靜武定六年薨文宣天保初以騰佐命詔祭告其墓昭帝皇建

中配享高祖廟庭

王懷爲第一領民酋長高祖東出懷率其部人三千餘家隨高祖于冀州義旗建高祖以爲大都督從討爾朱兆于廣阿破之除安北將軍蔚州刺史又隨高祖攻鄴克之從破四胡于韓陵進爵爲侯仍從入維拜車騎將軍又從高祖襲尅西夏州還爲大都督鎮下館除儀同三司

張保羅初仕後魏爲揚烈將軍奉車都尉後隸高祖爲都督從討步蕃及高祖起義保羅爲帳內從破爾朱兆於廣阿尋遷右將軍中散大夫仍以帳內從高

祖圍鄴城既拔除平南將軍光祿大夫從破爾朱兆等於韓陵因隨高祖入雒加安東將軍從高祖破周文帝於邙山圍玉壁攻龍門還留鎮晉州文襄嗣位以保羅爲左廂大都督

薛孤延爲都督從高祖起義破爾朱兆於廣阿因從平鄴以功轉大都督從破四胡於韓陵加金紫光祿大夫從追爾朱兆於赤嶺除第一領民會長累加車騎將軍從征玉壁轉鎮州刺史從破周文帝於邙山進爵爲縣公又從高祖討破山胡西攻玉壁入爲左衛將軍改封平秦郡公延性好酒率多昏醉而以

勇決善戰每大軍征討嘗爲前鋒故與彭劉韓潘同

列

臣欽若等曰彭樂劉貴韓軌潘樂

尉長命太安狄郡人性和厚有器識扶陽之亂寄居太原及高祖將建大義長命參計策從高祖破四胡於韓陵拜安南將軍樊子鵠據兗州反除東南道都督與諸軍討平之轉鎮范陽城就拜幽州刺史督安平二州事

莫多婁貸文太安狄郡人也驍果有膽氣從高祖舉義擊爾朱兆於廣阿又從破四胡於韓陵後從平爾朱兆於赤嶺兆窮迫自經貸文獲其屍遷左廂大



都督

高昂字敖曹後魏末爲冀州刺史大都督率衆從高祖破爾朱兆于廣阿又隨高祖討兆於韓陵昂自領鄉人部曲王桃湯東方老呼延族等三千人高祖曰高都督純將漢兒恐不濟事今當割鮮卑兵千餘人共相參雜於意如何昂對曰敖曹所將部曲練習已久前後戰鬪不減鮮卑今若雜之情不相協勝則爭功退則推罪願自領漢軍不煩更配高祖然之及戰高祖小却兆等方乘之高岳韓匈奴等以五百騎衝其前斛律敦收散卒躡其後昂與蔡雋以千騎自栗

園出橫擊兆軍兆衆竄是大敗是日微昂等高祖幾殆尋加侍中開府進爵爲侯邑七百戶

韓軌字伯年太安狄郡人少有志操性深沉喜怒不形于色高祖鎮晉州引爲鎮城都督及起兵于信都軌贊成大策從破爾朱兆於廣阿又從破韓陵封平昌縣侯仍督中軍從破爾朱兆于赤碭嶺

後周于謹自太祖初臨夏州爲防城大都督夏州長史及賀拔岳被害太祖赴平涼謹乃言于太祖曰魏祚陵遲權臣擅命羣盜蜂起黔首嗷然明公仗超世之資懷濟時之畧四方遠近咸所歸心願早建良圖

以副衆望太祖曰何以言之對曰關中秦漢舊都昔稱天府將士驍勇厥壤膏腴西有巴蜀之饒北有羊馬之利今若據其要害招集英雄養卒勸農足觀時變且天子在維逼迫羣兇若陳明公之懇誠筭時事之利害請都關右帝必喜而遷然後挾天子而令諸侯奉王命以討暴亂桓公之業千載一時也太祖大悅會有勅追謹爲門內大都督帝西遷從太祖征潼關破廻雜城授北雍州刺史進封藍田公後拜驃騎大將軍開府又從太祖拔弘農破沙苑又從戰河橋又從攻邛山

侯莫陳崇字尚樂武川人初爲建威將軍隨賀拔岳入關討万俟醜奴及岳被害崇與諸將同謀迎太祖從平侯莫陳悅累進驃騎大將軍開府從擒竇泰復弘農破沙苑從戰河橋崇功居多進位柱國六宮建拜大司空孝閔踐祚進封梁國公邑萬戶獨孤信武川人與太祖鄉里少相友善後爲驃騎大將軍從太祖復弘農破沙苑以功除隴右十一州大都督

楊薦爲驃騎大將軍初太祖臨夏州補薦帳內都督及平侯莫陳悅使薦入雜請事魏孝武授太祖關西

大行臺仍除薦直閣將軍馮翊長公主嬖居孝武授  
意欲歸諸太祖乃令武衛元毗喻旨薦歸白太祖又  
遣薦人雒陽請之孝武卽許焉孝武欲向關中薦贊  
成其計孝武曰卿歸語行臺迎我太祖又遣薦與長  
史宇文測出關候接孝武至長安進爵清水縣子  
趙貴武川人初爲太祖司馬車騎大將軍從太祖復  
弘農戰沙苑拜侍中驃騎大將軍開府又從戰河橋  
又從拔玉壁又從戰邠山拜柱國大將軍賜姓乙弗  
氏

蔡祐字承先爲都督時太祖初臨夏州及侯莫陳悅

害賀拔岳諸將遣使迎太祖將赴之夏州首望彌姐  
元進等陰有異計太祖微知之先與祐議執元進祐  
曰狼子野心會當反噬今若執縛不如殺之太祖曰  
汝大快也於是召元進等入計事太祖口隴賊逆亂  
與諸人戮力討之觀諸人輩似有不同者太祖微以  
此言動之因目祐祐卽出外衣甲持刀入瞋目叱諸  
人曰與人朝謀夕異豈是人也蔡祐今日必斬二人  
之頭因按劍臨之舉坐皆叩頭曰願有簡擇祐乃坐  
元進而斬之并其黨竝伏誅一坐皆戰慄莫敢仰視  
於是與諸將結盟同心誅悅太祖以此知重之謂祐

日吾今以爾爲子爾其父事我後從討悅破之又從迎魏孝武於潼關以前後功封長鄉縣伯邑五百戶李穆字顯慶風神警俊侷儻有奇節太祖首建義旗便委質釋褐統軍西魏武帝永熙末奉迎魏武帝授都督封永平縣子邑二百戶又領鄉兵累以軍功進爵爲伯從太祖擊齊師於邙山太祖臨陣墮馬穆突圍而進授以從騎潰圍俱出以故得免旣而與穆相對泣顧左右曰成我事者其此人乎

隋元胄數從周齊王憲征伐官至大將軍高祖被召入將受顧命先呼胄次命陶澄竝委以心腹嘗宿臥

內及爲丞相每典軍在禁中又引弟威等俱入侍衛周趙王招知高祖將遷周鼎乃要高祖就第趙王引高祖入寢室左右不得從唯楊弘與胄兄弟坐於戶側趙王謂其二子員貫曰汝當進瓜我因刺殺之及酒酣趙王欲生變以佩刀子刺瓜連啗高祖將爲不利胄進曰相府有事不可久留趙王呵之曰我與丞相言汝何爲者叱之使却胄瞋目憤氣抽刀入衛趙王問其姓名胄以實對趙王曰汝非昔事齊王者乎誠壯士也因賜之酒曰吾豈有不善之事意赫卿何猜警如是趙王僞吐將入後閣胄恐其爲變扶令上

座如此者再三趙王稱喉乾命胄就厨取飲胄不動會滕王迥後至高祖降階迎之胄與高祖耳語曰事勢大異可速去高祖猶不悟謂曰彼無兵馬復何能為胄曰兵馬悉他家物一先下手大事便去胄不辭死何益耶高祖入座胄聞屋後披甲聲遽請曰相府事殷公何得如此因扶高祖下牀趨而去趙王將追之胄以身蔽戶王不得出高祖及門胄自後而至趙王恨不時發彈指出血及誅趙王賞賜不可勝計高祖受禪進位上柱國封武陵郡公邑三千戶拜左衛將軍尋遷右衛大將軍高祖從容曰保護朕躬成此基業元胄功也

李圓通自高祖爲相時爲帥都督委以心膂圓通多力勁捷長於武用周氏諸王素憚高祖每伺高祖之隙圖爲不利賴圓通獲免者數矣高祖深感之繇是參預政事

唐劉弘基在隋以父廕爲右勳侍大業末亡命至大原會高祖鎮太原因自結託又察太宗有非嘗之度尤委心焉及太宗將圖義舉弘基遂募得二千人王威高君雅欲爲變高祖伏弘基及長孫順德於廳事之後威雅旣及弘基麾左右執之又從義師下西河

進攻霍邑隋將宋老生率衆陣於城外弘基從太宗擊之老生敗走棄馬投塹弘基麾下斬其首師至河東弘基以兵八千人先濟河進下馮翊爲渭北道大使得便宐從事殷開山爲副西畧地扶風有衆六萬南渡渭水屯于長安故城威聲大振耀軍金光門衛文昇遣兵來戰弘基逆擊走之擒甲士千餘人馬數百匹高祖大悅賜馬二十匹及平京城功第一從太宗擊薛舉于扶風破之追奔至隴山而反累拜右領都督封河間郡公又從太宗經畧東都戰于瓔珞澗外破之師旋弘基爲殿隋將段達張志陣于三王陵弘基擊敗之武德元年拜右驍衛大將軍以元謀之勳恕其一死又從太宗平夏縣進封任國公尋從擊劉黑闥于絳州師旋授并鉞將軍又以佐命功賜眞食九百戶

盛彥卿隋末爲澄城長義師至汾陰率賓客千餘人濟河上謁高祖拜銀青光祿大夫行軍總管從平京城俄與史萬寶鎮宐陽以拒東寇

盧士良瀛州刺史士叡之弟仕隋爲右親衛大業末見天下已亂不求仕進潛結英豪及義師西上與兄士叡同舉兵得百人來謁高祖於汾陰甚蒙接遇以

爲軍頭擊桑顯和牙飲馬泉敗屈突通于潼關俱有戰功位柱國

錢九隴善騎射高祖信愛之嘗置左右義兵起以軍功授金紫光祿大夫及尅平城拜左監門郎將

任瓌字瑋廬州合肥人隋仁壽中爲韓城尉俄又罷職及高祖討捕於汾晉瓌謁高祖於轅門承制爲河

東縣戶曹高祖將之晉陽留隱太子建成以託於瓌義師起瓌至龍門謁見高祖謂之曰隋氏失馭天下

沸騰吾忝以外戚屬當重寄不可坐觀時變晉陽是用武之地士馬精強今率驍雄以輔國難卿將家子

深有智謀觀吾此舉將爲濟否瓌曰後主殘酷無道征役不息天下惘惘思聞拯亂天縱神武親舉義師

所下城邑秋毫無犯軍令嚴明將士用命關中所在蜂起惟待義兵仗大順從衆欲何憂不濟瓌在馮翊

積年人情諳練願爲一介之使銜命入關同州已東必當款伏于梁山船濟直指韓城進逼郃陽分取朝

邑且蕭造文吏本無武畧仰懼威靈理當自下孫華諸賊未有適從必當相率而至然後鼓行整衆入據

承豐雖未得京城關中故已定矣高祖曰是吾心也迺授銀青光祿大夫遣陳演壽史大柰領步騎六千

趨梁山渡河使瓌及薛獻爲招慰大使高祖謂演壽曰聞外之事宜與任瓌籌之孫華白玄度等聞兵且至果競來降并具舟于河師遂利涉瓌說下韓城縣與諸將進擊飲馬泉破之拜左光祿大夫留守永豐倉高祖卽位改授穀州刺史王世充數率衆攻新安瓌拒戰破之以功累封管國公

姜謨秦州上邽人隋大業末爲晉陽長會高祖留守太原見謨深器之謨退謂所親曰隋祚將亡必有命世大才以應圖籙唐公有霸王之才必爲撥亂之主繇是深自結納及大將軍府建引爲司功將軍從平

霍邑拔絳郡監督大軍濟河時兵士爭渡謨部勒諸軍自昏至曉大軍畢濟高祖稱嘆之平京城除相國兵曹參軍封長道縣公時薛舉寇秦隴以謨西州之望詔於隴右安撫承制以便空從事謨將行奏曰天人之望誠有所歸願早膺圖籙以寧兆庶老夫犬馬暮齒恐先朝露得一覩昇紫殿死無所恨高祖大悅謨與竇軌出散關下河池漢陽二郡軍次長道與薛舉相遇軌輕敵爲舉所敗徵謨還京拜員外散騎嘗侍及平薛仁杲拜謨秦州刺史

柴紹矯捷有勇力尙武任俠聞于關中高祖龍潛時



妻之次女即平陽公主也初太宗見隋大亂陰懷濟  
 天下之心以紹親戚有武用告其志事紹遂間行出  
 河東與隱太子建成會既知起義兵建成謀於紹曰  
 追書甚急恐已起事隋郡縣連城相接千有餘里中  
 間偷路勢必不全今欲且投小賊權以自濟紹曰不  
 可追書既急宜其速去雖稍辛苦終當獲全若投小  
 盜知君唐公之子執以為功徒然死耳建成從之遂  
 相與走太原入雀鼠谷已知起義于是相賀以紹之  
 計為得太宗拜右軍大都督以紹為長史加銀青光  
 祿大夫及破霍邑下臨汾平絳郡竝先登陷陣既入

關平陽公主以司竹之軍來會命紹及馬三寶分統

其眾

時隋將桑顯和來擊孫華率精騎渡河以授之  
紹引軍直掩其背與史大柰合勢擊之顯和大

舉破宋金剛于雀鼠谷攻王世充於雒陽平竇建德

于武牢竝有戰功

馬三寶本柴紹之家僮性狡猾善調鷹犬及紹尚平  
 陽公主三寶給使于皇家義兵之起也三寶奉平陽  
 公主遁于司竹投賊帥何潘仁潘仁謁公主以百兵  
 為主衛三寶自稱總管以主之命綏輯羣盜多來歸  
 欵略地鄆杜有近兵一萬號為娘子軍及義兵濟河

授左光祿大夫太宗至竹林宮三寶以衆數萬詣軍門進謁從平京師拜大監門率

何潘仁西城胡人父渾邪通商中國隋初始居盤屋家富於財潘仁厚自奉養引致賓客煬帝時爲募士鬱鬱不得志後嘗犯法懼罪遂亡入司竹園中鳩集亡命衆至數萬執隋前尙書左丞李剛爲長史長安以西城邑多爲所破及義兵起求得平陽公主而奉之以應義師高祖入關卽授上柱國封盤屋縣公潘仁馳來謁見高祖大悅

姜寶誼天水人隋末以軍功致位通議大夫鷹揚郡將以其府兵從高祖討捕于太原及義兵起授左統軍平西河下霍邑皆有功焉累轉光祿大夫封永安郡公武德初拜武衛大將軍

劉政會初仕隋爲鷹揚府司馬在太原與晉陽令劉文靜敦敘宗室亟相往來及高祖行軍于太原政會率兵隸於麾下太宗與文靜謀圖起義募人旣集王威等懷貳于我後數日將大會於晉陽威及高君雅等謀危高祖有人以白太宗旣知迫急欲先事誅之因遣政會爲急變之書執詣留守所告威君雅二人相與謀反是日高祖在衙中須臾二人及裴寂相次

竝集俱坐視事文靜引政會入至庭中云有密狀知人欲反高祖指威等令取狀看之政會不肯與曰所告者是副留守事惟唐公得看之爾高祖佯驚曰豈有是乎撫政會進覽狀訖謂二人曰此人告公事如何君雅起牀前攘袂大吼曰此是反人欲殺我也時太宗已布列兵馬圍遶周遍王威知事不免因曰他人誣告只得聽推逐爾文靜遂叱左右引之而下就拘于別室既囚威等竟得舉兵政會之功也及大將軍府建引爲戶曹參軍從平長安以佐命元勳蒙歷任委

竇琮有武幹初仕隋佐親衛大業末犯法亡命之太原依于高祖時太宗方收英傑與琮有舊親敬彌篤出入臥內將義舉琮協贊大謀大將軍府建以爲統軍從平西河破霍邑拜金紫光祿大夫封扶風郡公邑二千戶尋從劉文靜擊屈突通于潼關通遣裨將桑顯和來逼文靜義軍不利琮與段志玄等力戰久之隋軍大潰通道走琮率輕騎追至稠桑獲通而返進兵東略下陝縣拔太原倉拜右領軍大將軍賜物五百段

武士護初爲晉陽宮留守府司鏡參軍事義兵將起

高祖陰募勇敢士遣劉弘基長孫順德等分統之爾  
留守王威高君雅謂士護曰弘基等皆從征三衛所犯  
不輕吾欲禁身推覈士護曰此竝唐公客也若爾便  
太紛紜威等繇是疑而不發高祖先令士護密伏兵  
於宮城東門外以防不虞留守司兵田德平知之方  
欲白王威等士護遽與德平論利害之機曰當分討  
捕之兵摠隸唐公城中募人皆劉晉陽之所統也高  
君雅等寄坐耳須發卽起彼何能爲德平遂止及高  
祖舉義執王威君雅等士護以功授正護大夫大將  
軍府司錄參軍并賜物等武德初勅宴元勳人等於  
含章殿賜酒作樂散金銀錢頗羅等任取多少仍有  
詔與長孫順德等合怨一死以彰元勳累遷工部尙  
書歷揚州都督賜實封八百戶

楊屯初仕隋爲鷹揚郎將遇高祖討捕于太原屯領  
部兵于麾下性謹直勇於攻戰高祖甚愛寵之遇起  
義以爲統軍從太宗擊西河平霍邑竝功居最以佐  
命元勳約免一死歷諸衛大將軍甚蒙遇任

長孫順德初仕隋爲右勳衛避遼東之役逃匿于太  
原深爲高祖太宗所親委時群盜竝起郡縣各募兵  
爲備太宗外以討賊爲名因令順德與劉弘基等名

趨梁山渡河使瓌及薛獻爲招慰大使高祖謂演壽曰闔外之事宜與任瓌籌之孫華白玄度等聞兵且至果競來降并具舟于河師遂利涉瓌說下韓城縣與諸將進擊飲馬泉破之拜左光祿大夫留守永豐倉高祖卽位改授穀州刺史王世充數率衆攻新安瓌拒戰破之以功累封管國公

姜謨秦州上邽人隋大業末爲晉陽長會高祖留守太原見謨深器之謨退謂所親曰隋祚將亡必有命世大才以應圖籙唐公有霸王之才必爲撥亂之主繇是深自結納及大將軍府建引爲司功將軍從平

霍邑拔絳郡監督大軍濟河時兵士爭渡謨部勒諸軍自昏至曉大軍畢濟高祖稱嘆之平京城除相國兵曹參軍封長道縣公時薛舉寇秦隴以謨西州之望詔於隴右安撫承制以便宐從事謨將行奏曰天人之望誠有所歸願早膺圖籙以寧兆庶老夫犬馬暮齒恐先朝露得一覩昇紫殿死無所恨高祖大悅謨與竇軌出散關下河池漢陽二郡軍次長道與薛舉相遇軌輕敵爲舉所敗徵謨還京拜員外散騎常侍及平薛仁杲拜謨秦州刺史

柴紹矯捷有勇力尙武任俠聞于關中高祖龍潛時

妻之次女即平陽公主也初太宗見隋大亂陰懷濟  
 天下之心以紹親戚有武用告其志事紹遂間行出  
 河東與隱太子建成會既知起義兵建成謀於紹曰  
 追書甚急恐已起事隋郡縣連城相接千有餘里中  
 間偷路勢必不全今欲且投小賊權以自濟紹曰不  
 可追書既急宜其速去雖稍辛苦終當獲全若投小  
 盜知君唐公之子執以為功徒然死耳建成從之遂  
 相與走太原入雀鼠谷已知起義于是相賀以紹之  
 計為得太宗拜右軍大都督以紹為長史加銀青光  
 祿大夫及破霍邑下臨汾平絳郡並先登陷陣既入

關平陽公主以司竹之軍來會命紹及馬三寶分統

其眾

時隋將桑顯和來擊孫華率精騎渡河以授之  
紹引軍直掩其背與史大柰合勢擊之顯和大

敗因與諸將  
進下京城

高祖受禪拜左衛大將軍從太宗平薛

舉破宋金剛于雀鼠谷攻王世充於雒陽平竇建德

于武牢並有戰功

馬三寶本柴紹之家僮性狡猾善調鷹犬及紹尚平

陽公主三寶給使承皇家義兵之起也三寶奉平陽

公主遁于司竹投賊帥何潘仁潘仁謁公主以百兵

為主衛三寶自稱摠管以主之命綏輯羣盜多來歸

欵略地鄆杜有近兵一萬號為娘子軍及義兵濟河

授左光祿大夫太宗至竹林宮三寶以衆數萬詣軍門進謁從平京師拜大監門率

何潘仁西城胡人父渾邪通商中國隋初始居盤屋家富於財潘仁厚自奉養引致賓客煬帝時爲幕士鬱鬱不得志後嘗犯法懼罪遂亡入司竹園中鳩集亡命衆至數萬執隋前尙書左丞李剛爲長史長安以西城邑多爲所破及義兵起求得平陽公主而奉之以應義師高祖入關卽授上柱國封盤屋縣公潘仁馳來謁見高祖大悅

姜寶詮天水人隋末以軍功致位通議大夫鷹揚郎將以其府兵從高祖討捕于太原及義兵起授左統軍平西河下霍邑皆有功焉累轉光祿大夫封永安郡公武德初拜武衛大將軍

劉政會初仕隋爲鷹揚府司馬在太原與晉陽令劉文靜敦敘宗室亟相往來及高祖行軍并太原政會率兵隸於麾下太宗與文靜謀圖起義募人旣集王威等懷貳于我後數日將大會於晉陽威及高君雅等謀危高祖有人以白太宗旣知迫急欲先事誅之因遣政會爲急變之書執詣留守所告威君雅二人相與謀反是日高祖在衙中須臾二人及裴寂相次

竝集俱坐視事文靜引政會入至庭中云有密狀知人欲反高祖指威等令取狀看之政會不肯與曰所告者是副留守事惟唐公得看之爾高祖佯驚曰豈有是乎搗政會進覽狀訖謂二人曰此人告公事如何君雅起牀前攘袂大吼曰此是反人欲殺我也時太宗已布列兵馬圍遼周遍王威知事不免因曰他人誣告只得聽推逐爾文靜遂叱左右引之而下就拘于別室既囚威等竟得舉兵政會之功也及大將軍府建引爲戶曹參軍從平長安以佐命元勳蒙歷任委

寶琮有武幹初仕隋佐親衛大業末犯法亡命之太原依于高祖時太宗方收英傑與琮有舊親敬彌篤出入臥內將義舉琮協贊大謀大將軍府建以爲統軍從平西河破霍邑拜金紫光祿大夫封扶風郡公邑二千戶尋從劉文靜擊屈突通于潼關通遣裨將桑顯和來逼文靜義軍不利琮與段志玄等力戰久之隋軍大潰通道走琮率輕騎追至稠桑獲通而返進兵東略下陝縣拔太原倉拜右領軍大將軍賜物五百段

武士護初爲晉陽宮留守府司鏡參軍事義兵將起



高祖陰募勇敢士遣劉弘基長孫順德等分統之  
留守王威高君雅謂士護曰此竝唐公客也若爾便  
不輕吾欲禁身推覈士護曰此竝唐公客也若爾便  
太紛紜威等辭是疑而不發高祖先令士護密伏兵  
於宮城東門外以防不虞留守司兵田德平知之方  
欲白王威等士護遽與德平論利害之機曰嘗分討  
捕之兵摠隸唐公城中募人皆劉晉陽之所統也高  
君雅等寄坐耳須發卽起彼何能爲德平遂止及高  
祖舉義執王威君雅等士護以功授正護大夫大將  
軍府司錄參軍并賜物等武德初勅宴元勳人等於  
含章殿賜酒作樂散金銀錢頗羅等任取多少仍有  
詔與長孫順德等各恕一死以彰元勳累遷工部尙  
書歷揚州都督賜實封八百戶  
楊屯初仕隋爲鷹揚郎將遇高祖討捕柔太原屯領  
部兵柔麾下性謹直勇於攻戰高祖甚愛寵之遇起  
義以爲統軍從太宗擊西河平霍邑竝功居最以佐  
命元勳約免一死歷諸衛大將軍甚蒙遇任  
長孫順德初仕隋爲右勳衛避遼東之役逃匿于太  
原深爲高祖太宗所親委時群盜竝起郡縣各募兵  
爲備太宗外以討賊爲名因令順德與劉弘基等名

募旬日之間衆至萬餘人結營於都下遂誅王威高君雅等義兵起拜統軍從平霍邑破臨汾下絳郡俱有戰功尋與劉文靜擊屈突通於潼關每戰摧鋒及通將奔雒陽順德追及桃林執通歸京師仍畧定陝縣高祖卽位拜左驍衛大將軍封薛國公  
殷嶠初仕隋爲大谷長義兵起召補大將軍府掾參預謀畧授心腹之寄累以軍功拜光祿大夫從隱太子攻尅西河太宗爲渭北道元帥引爲長史時關中群盜往往聚結衆無適從令嶠招慰之所至皆下又與統軍劉弘基率兵六萬屯長安故城隋將衛孝節自金光門出戰嶠與弘基擊破之京城平賜爵陳郡段志玄父偃師隋末爲太原郡書佐志玄從父在太原甚爲太宗所接待義兵起志玄募得千餘人授石頭大都督府軍頭從平霍邑下絳郡攻永豐倉皆爲先鋒歷遷光祿大夫後遷鎮軍大將軍卒  
馬元規安陸人也初以隊正從高祖征討因建義舉乃仗節山南下浙南陽二郡及其屬縣得兵萬餘人

冊府元龜

巡按福建監察御史臣李嗣京 訂正

分守建南道左布政使臣胡維霖 參閱

知建陽縣事臣黃國琦較釋

將帥部 七

佐命第七

梁龐師古曹州南華人初以中涓從太祖性端愿未嘗離左右及太祖鎮汴樹置戎伍始得馬五百匹卽以師古爲偏將軍援陳破蔡累有戰功及朱珍以罪誅遂用師古爲都指揮使乃渡淮餉軍于廬壽攻滁

州破天長下高郵沿淮轉戰所至克捷尋伐朱友裕  
領軍攻下徐州斬時溥首以獻遂移軍伐兗入中都  
寨于梁山敗朱瑄之衆襲至壘下又破朱瑾于清河  
從討汝陽與朱瑄朱瑾及晉將史儼兒戰于故樂亭  
大捷而回唐昭宗乾寧四年正月復統諸軍伐鄆拔  
之擒其帥朱瑄以獻始表爲天平節度留後尋以功  
授徐州節度使後與淮人戰沒于陣

霍存昭州曲周縣人性驍勇善騎射在黃巢中已爲  
將領唐僖宗中和四年太祖大破巢軍于王藩渡時  
存與葛從周張歸霸皆自巢軍來降太祖宥而納之  
其後破王夏寨擊殷鐵林並在戰中尋佐朱珍取滑  
臺攻淄州趙傳昌皆預戰立功蔡賊張郢在汴北存  
以三千人夕犯其營破之用本部騎兵敗秦賢軍殺  
五千人連破四寨盡得其輜重從討盧塘張郢殪萬  
餘人存功居多我軍之圍濮州也有賊升眺樓大詬  
太祖怒甚召存射之矢一發而屍殞其下賞賚甚厚  
復佐朱珍擒石璠破魏師敗徐戎又佐龐師古至呂  
梁敗時溥二千餘衆以是累遷官初王師渡淮乏食  
不甚利唯存軍戰有功淮賊乃引退太祖之討宿州  
也葛從周以水壞其垣丁會以師乘其墉存戰壘外

敗其軍宿人乃降明年佐柳王友裕擊時溥于碭山破之獲蕃將石君和等五十人是歲復與晉軍戰于馬牢川始入爲前鋒出則後拒虜不敢逼乃渡河襲淇門殺三十餘人曹州刺史郭紹賓之來歸也存以師援之遂代其任始朱友裕以大軍伐鄆臨其壁旣而師陷圍中以急來告存領二百騎馳赴擊退之太祖喜拔爲諸軍都指揮使後與徐兗之衆合戰於石佛山下中流矢而卒

張存敬譙郡人也性剛直有膽勇臨危無所畏憚唐僖宗中和中從太祖赴汴以其壯節頗見親昵首爲右騎都尉從討巢蔡凡歷百戰多於危蹙之間顯有奇畧繇是頻立殊効光啓中李罕之會晉軍圍張崇爽於盟津太祖遣丁會葛從周及存敬同往馳救存敬引騎軍先犯虜騎諸軍翼之虜騎大敗乃解河南之圍昭宗大順二年爲諸軍都虞候佐霍存董大軍收宿州以功奏加簡較兵部尙書太祖東征徐兗存敬屢有俘斬之功凡受指顧皆與機會矢石所及必以身先太祖尤加優異以爲行營都指揮使後累以戰功除護國將軍留後移宋州刺史將之任卒寇彥卿大梁人也祖瑄父裔皆宣武軍牙較太祖值

汴以彥卿將家子擢在左右弱冠選爲通贊官太祖爲元帥府押牙領維州刺史羅紹威將殺牙軍遣使告于太祖太祖命彥卿使于魏密與紹威謀之竟成其事彥卿之力也彥卿身長八尺隆準方面語音如鐘善騎射好書史復善伺太祖之旨凡所作爲動皆玄合太祖每言曰敬翔劉捍寇彥卿蓋爲我而生其見重如此太祖有所乘馬號一丈烏嘗以賜彥卿唐天復中太祖迎昭宗于鳳翔累與岐軍對陣時彥卿爲諸道馬步軍都排陣使嘗躬擐甲胄乘其所賜烏馬騁于陣前太祖目之曰真神王也昭宗還京賜迎鑾毅勇功臣改邢州刺史尋遷亳州團練使太祖受禪授華州節度使

葛從周濮州鄆城人從周少器達有智畧初入黃巢軍漸至軍較唐僖宗中和四年三月太祖大破黃巢於王藩渡從周與霍存張歸霸昆弟相率來降七月從太祖屯兵於西華破蔡賊王夏寨太祖臨陣馬踏賊衆來追甚急從周扶太祖上馬與賊軍格鬪傷面矢中于肱身被數鎗奮命以衛太祖賴張延壽回馬轉鬪從周與太祖俱免退軍澗水諸將竝削職唯擢從周延壽爲大較其後入長葛靈井大敗蔡賊至斤

溝澠河殺鐵林三千人獲九寨都虞候王涓太祖遣郭言募兵於陝州有黃花子賊據於溫谷從周擊破之又破秦賢之衆於滎陽尋佐朱珍收兵於淄青間時兗州齊克讓軍於任城從周破之擒其將呂全真淄人不受制復與之戰獲其驍將鞏約會青州以步騎萬餘人列三寨于金嶺以阨要害從周與朱珍戰大殲其衆虜其將楊昭範五人而還至太原不解甲徑至板橋擊蔡賊破盧塘寨塘自溺而死又于赤岡殺蔡軍二萬餘人從討謝殷于亳州擒之廻襲曹州虜刺史丘弘禮以歸與兗鄆軍遇於臨濮之劉橋間殺數萬人朱瑄朱瑾僅以身免擒都將鄒務卿以下五千人從太祖至范縣復與朱瑄戰虜尹萬榮等三人遂平濮州未幾與朱珍擊蔡賊於陳亳間獲都將石璠文德元年魏博軍亂樂從訓來告急從太祖渡河拔黎陽李固臨河等鎮至內黃破魏軍萬餘衆獲其將周儒等十人李罕之引并人圍張全義於河陽從周與丁會張存敬牛存節率兵赴援大破并軍殺蕃漢二萬人解河陽之圍以功表授簡較工部尚書從朱珍討徐州拔豐縣敗時溥於吳康得其輜重加簡較刑部尚書佐龐師古討孫儒於淮南略地至盧

壽滌等州下天長高郵破邵伯堰迴軍攻濠州殺刺史魏勳得餉船十艘昭宗大順元年八月并師圍潞州太祖遣從周率敢死之士夜銜枚犯圍而入會王師不利於馬牢川卽棄上黨而歸其年十二月與丁會諸將討魏州連收十邑明年正月大破魏軍于永定橋魏軍五敗斬首萬餘級十月佐丁會攻宿州從周壅水灌其城刺史張筠以郡降從討兖州破朱瑾之軍於馬溝景福二年二月與諸將大破徐兗之兵於石佛山八月與龐師古同攻兖州乾寧元年三月軍至新太縣朱瑾令都將張約李胡椒帥三千人來拒戰師古遣從周張存敬掩襲生擒張約李胡椒等都將數十人二年十月圍兖州兗人不出從周詐揚言并人鄆人來救卽引軍趨高吳夜半潛却歸寨朱瑾果出兵攻外壕我軍士突出掩殺千餘人生擒都將孫漢筠從周累立戰功自懷州刺史歷曹宿二州刺史累遷簡較左僕射三年五月并師以大軍侵魏遣其子落落率二千騎屯洹水從周以馬步二千人擊之殺戮大盡擒落落于陣并師號泣而去遂自洹水與龐師古渡河擊鄆四年正月下之從周乘勝伐兖州朱瑾出師在徐境其將康懷英以城降以功授



兖州留後簡較司空復領兵萬餘人渡淮討楊行密  
至濠州聞龐師古清口之敗遽班師光化元年四月  
率師經畧山東時并帥以大軍屯邢洛從周至鉅鹿  
與并軍相遇大破之并帥遁走我軍追襲至青山口  
數日之內邢洛磁三州連下斬首二萬級獲將吏一  
百五十人卽以從周兼領邢州留後十月復破并軍  
五千騎于張公橋晉將李嗣昭急攻邢州陣于城外  
從周大破之擒蕃將賁金鐵慕容騰等百餘人二年  
春幽州劉仁恭率軍十萬寇魏州屠其郡從周自邢  
臺馳入魏州燕軍突上水關攻館陶門從周與賀德  
倫率五百騎出戰謂門者曰前有敵不可返顧令闔  
其門從周等極力死戰大破燕人擒都將薛突厥王  
郇郎等翊日破其入寨追擊至臨清劉仁恭走滄州  
從周受宣義軍司馬五月并人討李罕之於潞州太  
祖以丁會代罕之令從周馳入上黨七月并人陷澤  
州太祖召從周令賀德倫守潞州德倫等尋棄城而  
歸三年四月領軍討滄州先攻德州下之及進攻浮  
陽幽州劉仁恭大舉來援時都監蔣玄暉謂諸將曰  
吳王命我護軍志存攻取今燕師來赴不可外戰當  
縱其入壁聚食困廩力屈糧盡可取也從周對曰兵

在機機在上將非督護所言也乃令張存敬氏叔宗  
守其寨從周逆戰于乾寧軍老鴉堤大破燕軍斬首  
三萬獲將佐馬慎交已下百餘人奪馬三千匹八月  
并人攻邢洛從太祖破之從周追襲至青山口斬首  
五千級獲其將王郃郎楊師悅等得馬千匹表授簡  
較太保兼徐州兩使留後尋爲兗州節度使天復元  
年三月與氏叔琮討太原從周以兗鄆之衆自土門  
路入與諸軍會於晉陽城下以糧運不給班師頃之  
從周染疾會青山將劉鄩陷兗州太祖命從周討之  
遂力疾臨戎三年十一月鄩舉城降以功授簡較太  
傅後致仕

張歸霸清河人歸霸少倜儻好兵術唐僖宗乾符中  
寇盜蜂起歸霸率昆弟三人棄家投黃巢頗以勇畧  
聞巢陷長安遂署爲左蕃功臣中和中巢領徒走宛  
丘時太祖在汴奉詔南討巢黨日尅歸霸昆仲與其  
從周李讜等相率來降尋補宣武軍劇職光啓二年  
與蔡將張存戰于盧氏三年夏又與蔡將盧塘戰于  
雙丘復與秦宗賢戰于萬勝皆敗而殲之翌日秦宗  
權遣將張邳來寇列寨於赤堦一日出騎將較勝歸  
霸爲飛弋所中卽拔馬却逸控弦一發賊洞頸而

遂兼騎而還太祖時于高丘下瞰備見其狀面加賞  
激厚以金帛及所獲馬錫之又嘗被命以控弦之士  
五百人伏于壕內太祖統數百騎稍逼其寨蔡人果  
以銳士麾壘來追歸霸發伏兵掩殺千餘人奪馬數  
十匹尋奏授簡較左散騎嘗侍其後從太祖伐鄆副  
李唐賓渡淮咸著奇績文德初大軍臨蔡州賊將蕭  
顯來斫寨歸霸與徐懷玉各以所領兵自東南二扉  
分出合勢殺賊蔡人大敗及高祖整衆離營寇塵已  
息太祖召至賞之曰昔耿弇不俟光武擊張步言不  
以賊遺君父弇之功爾其二焉昭宗大順中郭紹宣  
拔曹州歸霸提兵數千守之俄而朱瑾統大軍自至  
歸霸與丁會逆擊之于金鄉瑾大敗擒賊將宋江等  
七十餘人曹州以寧明年破濮州生擒刺史邵儒又  
佐葛從周與晉軍戰于洹水生擒克用愛子落落復  
與燕人戰於內黃殺仁恭兵三萬餘衆戎績超特居  
諸將之右累官至簡較左僕射光化二年權知邢州  
事明年春李嗣昭以蕃漢五萬來寇歸霸堅壁設備  
晉軍不敢顧其城遂移軍攻洛州陷焉時太祖在滑  
頗慮邢之失守及葛從周復洛水嗣昭北遁歸霸出  
兵襲之殺二萬餘衆捷至賞賜殊等旋以功奏加簡

較司空天祐初遷萊州刺史秩滿授左衛上將軍又除曹州刺史其秋加簡較司徒副劉知俊禦邠鳳之寇敗之太祖受禪拜右龍虎統軍

楊師厚潁川斤溝人也初爲李罕之部將以猛決聞光善騎射及罕之敗退保澤州師厚與李鐸何綱等來降太祖署爲忠武軍牙將繼歷軍職累遷簡較右僕射表授曹州刺史唐昭宗天復二年從太祖迎昭宗於岐下李茂真以勁兵出戰爲師厚所敗及王師範以青州叛太祖遣師厚率兵東討時淮賊王景仁以衆二萬來援師範師厚逆擊破之追至輔唐縣斬首數百級授齊州刺史將之任太祖急召見於鄆西境遣師厚率步騎屯于臨朐而聲言欲東援密川留輜重於臨朐師範果出兵來擊師厚設伏於野追擊至聖王山殺萬餘衆擒都將八十人未幾萊州刺史王師誨以兵救師範又大敗之自是師範不復敢戰師厚移軍寨於城下師範力屈竟降三年二月加簡較司徒徐州節度使天祐元年加諸軍行營馬步都指揮使二年八月太祖討趙凝於襄陽命師厚統前軍以進趙凝嚴兵以備師厚至穀城西童山刊木造浮橋引軍過漢水一戰趙凝敗散携妻子沿漢遁去

翌日表師厚爲山南東道節度留後卽令南討荊州留後趙明亦棄軍上峽不浹旬併下兩鎮乃正授襄州節度使太祖受禪加簡較太保同平章事

牛存節青州博昌人也本名禮太祖改而字之少以雄勇自負唐僖宗乾符末鄉人諸葛爽爲河陽節度使存節往從之爽卒存節謂同輩曰天下汹汹當釋英主事之以圖富貴遂歸于太祖初授宣義軍小將屬蔡寇至金堤驛犯酸棗靈昌存節日與之鬪凡二十餘往每往必執俘而還前後斬首二千餘級獲孳畜甚衆太祖擊蔡賊于板橋赤堋酸棗門封禪寺枯河北存節皆預其行與諸將於濮州南劉橋范縣大破鄆衆自此浮爲太祖獎遇文德元年夏李罕之以兵圍張宗奭於河陽太祖遣存節率軍赴之屬歲歉饑饉不至村民有儲乾樵者存節以器用錢帛易之以給軍食大破賊於淇河罕之引衆北走又預計徐宿有功及討河北存節前鋒下黎陽收臨河至內黃四以兵千餘人當魏人萬二千衆大破其陣僵仆蔽野太祖深所歎激謂有神兵之助昭宗大順元年攻滑州左右廂牢城使諸將討時溥累破賊軍景福元年秋攻遏後都指揮使攻濮之後領軍先登遂拔其

壘二年四月下徐州梟時溥存節力戰其功居多乾  
寧三年夏太祖東討鄆州存節領軍次故樂亭扼其  
要路都指揮使龐師古屯馬頰存節密與都將王言  
謀入鄆壘十二月存節遣王言夜伏勇士於州西北  
以船踰濠舉梯登陴旣而王言不克入存節獨率伏  
軍負梯踵破其西壘城奪其濠橋諸軍俱進四年正  
月陷其城尋與葛從周降下兗州其年秋大舉以伐  
淮南至濠州東聞前軍失利于青口諸軍退至泅河  
無復隊伍存節遇其後與諸將大騎步鬪諸軍稍得  
濟收合所部并敗兵共八千餘人至于淮渙時不食  
已四日矣存節訓勵部分以禦追寇遂得旋師五年  
除濠州刺史俄遷宣武軍都指揮使改宿州刺史明  
年淮賊大至彭城存節乃以部下兵夜發直趣彭門  
淮人訝其神速震恐而退諸將服其智識光化二年  
罷歸復爲左衛都將兼馬步教練使天復元年授潯  
州馬步都指揮使法令之整士庶安之及追赴行在  
士卒泣送者不絕於道加金紫光祿大夫簡較司空  
改滑州左衛步軍指揮使知邢州軍州事天祐元年  
授邢州團練使時州兵未及二百人晉人知之以大  
軍來寇太祖在鄴發長直兵二千人赴援存節率壯

健出門以家財賞激戰士并軍急攻之七日不能克而去太祖召至勞慰久之厚賚金帛鞍馬冬罷郡署爲元帥府左都押牙四年太祖受禪除右千牛衛上將軍

王彥章鄆州壽張縣人也彥章少從軍隸太祖帳下以虓勇聞稍遷軍職累典禁兵從太祖征討所至有功嘗持鐵槍衝堅陷陣敵人畏之目之爲王鐵槍開平二年十月自開封府押牙左親從指揮使授左龍天軍使三年轉左監門衛上將軍依前左龍驤軍使徐懷玉本名琮亳州雋夷縣人少以雄傑自任隨太

祖起軍唐僖宗中和末從赴大梁光啓初蔡寇屯金堤驛懷玉將輕騎連破之繇是累遷親從副將改左長劔都虞候又從破蔡賊於板橋收秦宗權入寨文德初同諸將解河陽之圍復從破徐宿乾寧中太祖賜名懷玉又破朱瑾於金鄉南擒宋江以獻龐師古失利于清口懷玉獨完軍以退光化初轉滑州右都押牙兼右步軍指揮使俄奏授沂州刺史頃之王師範以青州叛屢出兵侵軼懷玉擊退之天復三年轉齊州防禦使從大軍迎駕于岐下歸署華州觀察留後一年復領所部兵戍雍州尋召赴河中補晉絳同

華五州馬步都指揮使天祐三年授左羽林統軍  
右龍虎統軍領六軍之士赴澤州尋爲晉軍所攻晝  
夜衝擊穴地而入之王率親兵逆殺於隧中晉人遂  
退開平元年授曹州刺史

劉捍開封人少爲牙職太祖初鎮夷門以捍聰敏擢  
副典客唐僖宗中和四年夏太祖以朱珍爲淄州刺  
史令收兵於淄青間命捍監其兵路逢大敵皆破之  
入博昌獲精兵三萬以歸四月合大軍敗蔡賊秦宗  
賢數萬衆於汴西文德元年十一月蔡將申叢折宗  
權足納款于太祖使捍奏其事加兼察御史大夫光

化三年六月太祖北伐鎮定至恒山而王鎔危懼送  
款於太祖命捍入壁門傳諭時兩軍未整守門者戈  
戟千匝捍馳騎而入竟達其命又移師次中山至懷  
德驛大破定人五萬衆王處直乞降捍復單馬入州  
安撫而迴太祖迎昭宗于岐下以捍爲親事指揮使  
天復三年正旦宋文通令客將郭啓奇使於太祖命  
捍復命昭宗聞其至卽召見詢東兵之事仍以錦服  
銀鞍勒馬賜之翌日授登州刺史昭宗還京改嘗州  
刺史賜號迎鑾毅勇功臣四月太祖伐王師範於青  
州改左右長直都指揮使天祐三年正月授宋州刺



史太祖受禪授左龍虎統軍兼元從親軍馬步都虞  
侯

朱珍徐州豐縣雍鳳里人也太祖初起兵珍與龐師  
古許唐李暉丁會氏叔琮鄧季筠王武等八十餘人  
以中涓從摧堅陷陣所向盪決及太祖鎮汴領招討  
使署珍爲宣武右職唐僖宗光啓元年署諸軍都指  
揮使始爲上將太祖令珍募兵至乾封與淄人戰于  
白草口敗之青人以步騎三萬列三寨於金嶺驛珍  
與戰連破之殲其師盡獲軍器戎馬是夕攻博昌大  
獲兵衆而還其後破盧塘張郢及朱琮朱瑾之衆平  
定曹濮未嘗不在戰中梁山之救珍以踏白騎士入  
陳毫間以邀蔡人遂南至斤溝破淮西石璠之師三  
萬人虜璠以獻珍旋師自毫北趨靜戎濟舟于滑破  
黎陽臨河李固三鎮軍于內黃敗樂從訓萬餘人分  
命聶金范居實畧澶州與魏師遇于內黃魏軍有豹  
子軍二千人戮之無噍類威振河朔復攻淮西至上  
蔡夾河而寨敗將蕭皓之衆皆擁于河溺死之進軍  
蔡州營其西旣破羊馬垣遇雨班師珍以兵援劉贊  
赴楚州至襄山南遇徐戎扼其路珍乃攻豐下之時  
溥乃以全師會戰于豐南吳康里珍敗其三萬餘衆

及蔡賊平珍比諸將功居多昭宗龍紀初與諸將屯於蕭縣以禦時溥及太祖往蕭縣珍率將較迎謁氏叔琮尉氏人唐末應募爲騎軍初隸于龐師古爲伍長叔琮壯勇沉毅膽力過人太祖討巢蔡於陳許間叔琮奮擊首出諸較太祖壯之自行伍間擢爲後院馬軍都將時東伐徐鄆多歷年所叔琮身當矢石奮不顧命觀者許焉累遷爲指揮使尋奏授宿州刺史簡較左僕射

鄧季筠宋州下邑人也少入巢軍隸于太祖麾下及太祖鎮汴首署爲牙將主騎軍伐鄆之役生擒排陣將劉矯以獻

康懷英兗州人太祖素聞其名得之甚喜尋署爲軍較唐昭宗光化元年秋從氏叔琮伐襄漢懷英以一軍攻下鄧州三年從征河朔佐張存敬敗燕軍于易水之上天復元年冬太祖率師迎昭宗于鳳翔時李茂真遣大將符道昭領兵萬餘屯武功以拒太祖太祖命諸將擊之以懷英爲前鋒領衆先登一鼓而大破之虜甲士六千餘人奪馬二千匹翌日太祖方至顧左右曰邑名武功今首盪逆黨真武功也乃召懷英大加獎激仍以駿馬珍器賜之二年四月符道昭

復領大軍屯於虢縣之莫谷其建寨之所前臨巨澗後倚峻阜險不可升太祖遣懷英提騎數千急擊之道昭以懷英兵寡有俯視之意乃率甲士萬人絕澗以挑戰懷英始以千騎交關戰酣發伏以擊之岐軍大敗秋八月鄜帥李周彝屯軍於三原以援鳳翔太祖命懷英討之周彝拔軍而遁追至黎園因攻下翟州擒其守來獻俄而岐軍屯奉天太祖令懷英寨于岐軍之東北以備敵人一夕岐軍大至急攻其營懷英以夜中不可驚動諸軍獨以三千餘人抗數萬之衆自乙夜至四鼓身被十餘槍岐軍不勝而退昭宗還京賜迎繼毅勇功臣是歲淮人聞青兗之叛遣兵數萬以寇宿州太祖命懷英馳騎以救之淮人遁去卽以懷英爲權知宿州刺史天祐三年冬佐劉知俊破邠鳳之衆五萬于美原收十五餘寨乘勝引軍攻下鄜州以功授陝州節度使太祖受禪加簡較太保郭言太原人也家于南陽新野少以力穡養親鄉里稱之唐僖宗廣明中黃巢擁衆西犯秦雍言爲巢黨所執後從太祖赴汴初爲騎軍繼有戰功後擢爲神較言性剛直有權畧勤于戎事或以家財分給將士之貧者繇是頗得士心屢將兵與蔡寇戰于浚邲每

以少擊衆出必勝歸太祖嘉其勇果謂賓佐曰言乃吾之虎侯也時秦宗權支黨數十萬太祖兵不過數千每恨其寡與之不敵一日命言董數千人越河維趨陝虢招召丁壯以實部伍言夏往冬旋得銳士萬餘遂遷步軍都將自是隨太祖掩襲蔡寇斬獲掠奪不可勝計宗權以茲敗北太祖盡收其地因命言將兵導達貢奉以安郵傳自汴鄭迄於潼關去奸恤弱甚得其所光啓中僖宗以太祖兵威日振命兼領揚州節度使太祖遣幕吏李璠領兵赴淮揚以制置爲名時言爲李璠前鋒深入淮甸破盱眙而還梁祖東伐徐鄆言將偏師畧地千里頻逢寇敵言出奇決戰所向皆捷大挫東人之銳太祖錄其績以排陣斬斫之號委之尋表爲宿州刺史簡較右僕射于時徐宿兵鋒日夕相接控扼偵邏以言爲首

劉康又壽昌安封縣人也以農桑爲業唐僖宗乾符中關東羣盜竝起江淮間徧罹其酷因爲巢黨所掠康又沈默有膂力善用矛槊然不樂爲暴中和三年從太祖赴鎮委以心腹康又枕戈擐甲夷險無憚其後累典親軍襲巢破蔡斬獲尤多累以戰功遷元從都將從太祖連年攻討徐兗鄆所向多捷尤善於營

壘充諸軍壕寨使及太祖盡下三鎮議其功奏加備  
較右僕射兼領軍衛

范居實絳州翼城人事太祖初爲隊將軍從討巢蔡  
有功又從朱珍收滑州改左廂都虞侯預破兗鄆功  
遷感義都頭鄭州馬軍指揮使幽州劉仁恭舉衆南  
下寇魏郡北圍居實與葛從周張存敬率兵救魏大  
破幽滄之衆於內黃太祖迎昭宗於岐下以居實爲  
河中馬軍都指揮使及昭宗還京賜迎鑾毅勇功臣  
遙領綿州刺史又遷左龍驤馬軍都指揮使從征淮  
南迴改登州刺史轉左神勇軍使開平元年用軍於  
潞州命居實統軍以解州之圍授耀州刺史令以郡  
兵屯固鎮尋除澤州刺史居實拳勇善戰頗立軍功

册府元龜 卷之三百四十六 佐命七

册府元龜

巡按福建監察御史臣李嗣京 訂正

分守建南道左布政使臣胡維霖 叅閱

知建陽縣事臣黃國琦較釋

將帥部 八

佐命第八

後唐李嗣昭武皇母弟代州刺史克柔之假子也小字進通不知族姓所出少從征伐精練軍機唐昭宗乾寧四年為內衙都將援河中敗汴軍於胡壁堡擒汴將滑禮及王珂請婚於武皇武皇以女妻之珂赴

册府元龜 卷之三百四十六 將帥部 一

禮會於太原以嗣昭權典河中留事李罕之襲我潞州也嗣昭率師攻潞與汴將丁會戰于舍口俘獲三千執其將蔡延恭代李君慶爲蕃漢馬步行營都將進攻潞州遣李存質李嗣本以兵扼天井關汴將澤州刺史劉玘棄城而遁乃以李存璋爲刺史梁祖聞嗣昭之師大至召葛從周謂曰并人若在高平當圍而取之先須野戰勿以潞州爲敵及聞嗣昭軍韓店梁祖曰進通扼入議路此賊決與我鬪公等臨事制機勿落奸便賀德倫閉壁不出嗣昭日以鐵騎環城汴人不敢芻牧援路斷絕八月德倫張歸厚棄城遁去遂復取潞州三年汴人攻滄州劉仁恭求救遣嗣昭出師邢洛以應之嗣昭遇汴軍於沙河擊敗之獲其將胡禮進攻洛州下之獲其郡將朱紹宗九月梁祖自率軍三萬至臨洛葛從周設伏於青山口嗣昭聞梁祖斂軍而退從周伏兵發爲其所敗偏將王郃郎楊師悅等被擒十月汴人大寇鎮定王郃告急於武皇乃遣嗣昭出師下太行擊懷孟汴將侯言守河陽不意嗣昭之師至旣無守備驅市人登城嗣昭攻其北門破其外垣俄而汴將閻寶救軍至乃退天復元年河中王珂爲汴軍所虜河中晉絳諸郡皆陷四

月汾州刺史李瑋謀叛納款於汴嗣昭討之三日而  
拔斬瑋是月汴人初得蒲絳乃大舉諸道之師來逼  
太原汴將葛從周陷承天軍氏叔琮營洞渦驛太原  
四面汴軍雲合武皇憂迫計無從出嗣昭朝夕選精  
騎分出諸門掩擊汴營左將右斬或燔或擊汴軍疲  
於奔命又屬霖雨軍多腫痢糧運不繼五月氏叔琮  
引退嗣昭以精騎追之汴軍乃棄輜重兵仗萬計六  
月嗣昭出師陰地攻慈隰降其刺史唐禮張瓌是時  
天子在鳳翔汴人攻圍有密詔徵兵十一月嗣昭出  
師晉絳屯吉上堡與汴將王反遇於平陽一戰擒之  
明年正月嗣昭進營蒲縣十八日汴將朱友寧氏叔  
琮將兵十萬來拒二十八日梁祖自率大軍至平陽  
嗣昭之衆大恐三月十一日有白虹貫周德威之營  
候者云不利宜班師翌日氏叔琮犯德威之營汴軍  
十餘萬列陳四合德威嗣昭血戰解之乃保軍而退  
汴軍因乘之時諸將潰散無復部伍德威引騎軍循  
西山而遁朱友寧乘勝陷慈隰汾等州武皇聞其敗  
也遣李存信率牙兵至清源應接復爲汴軍所擊汴  
軍營於晉祠嗣昭德威收合餘衆登城拒守汴人治  
攻具於西北隅四面營柵相望時鎮定河中皆爲梁



有孤城無援師旅敗亡武皇晝夜登城憂不遑食召諸將謀欲出保雲州嗣昭曰王勿爲此謀兒等苟存必能城守李存信曰事勢危急不如且入北蕃別圖進取朱溫兵師百萬天下無敵關東河北受他指揮今獨守危城兵亡地蹙儻彼築室反耕環塹深固則亡無日矣武皇將從之嗣昭亟爭不可猶豫未決賴劉太妃極言於內武皇且止數日亡散之衆復集嗣昭晝夜分兵四出斬將搴旗汴軍保守不暇二十一日朱友寧燒營退去嗣昭追擊復收汾慈隰等州五月雲州都將王敬暉據城叛振武石善友亦爲部將契苾讓所逐嗣昭皆討平之天祐三年汴人攻滄景劉仁恭遣使求援十一月嗣昭爲昭義節度使五年五月莊宗敗汴軍破夾城嗣昭知武皇棄世哀慟幾絕時大兵攻圍歷年城中士民飢死大半廛里蕭條嗣昭緩法寬租勸農務穡一二年間軍城完集三面隣於敵境寇鈔縱橫設法枝梧邊鄙不聳胡柳之戰周德威戰沒師無行列至晚方集汴人四五萬登無石山莊宗之軍懼形於色或請收軍保營詰旦復戰嗣昭曰賊無營壘去臨濮地遠日已晡晚皆有歸心但以精騎撓之無令返旆晡後追擊破之必矣我若

收軍拔寨賊入臨濮俟彼整齊復來卽勝負未決莊宗曰非兒言幾敗吾事軍較王建及又陳方畧嗣昭與建及分兵於土山南北爲犄角汴軍懼下山因縱軍擊之俘斬三萬級繇是莊宗帳餞於戚城莊宗酒酣泣而言曰河朔生靈十年饋輓引領鶴望候破汴軍今兵賦不充寇孽猶在坐食軍賦有愧蒸民嗣昭曰臣忝急難之地每一念此寢不安席大王且持重謹守惠養士民臣歸本藩簡料兵賦歲末春首卽舉衆復來莊宗離席拜送如家人禮是月汴將劉鄩攻同州朱友謙告急嗣昭與李存審援之九月破汴軍於馮劫乃班師十九年莊宗親征張文禮於鎮州冬契丹三十萬奄至嗣昭從莊宗擊虜於新城阿保機在望都莊宗深入親與虜鬪虜騎圍之數十重良久不解嗣昭號泣赴之引三百騎橫擊虜圍馳突出沒者數十合虜退翼莊宗而還是時閻寶爲鎮人所敗退保趙州莊宗命嗣昭代寶攻真定七月二十四日王處球之兵出至九門嗣昭設伏於故營賊至發伏擊之殆盡餘三人匿於牆墟間嗣昭環馬而射之爲賊矢中腦嗣昭箠中矢盡拔賊矢於腦射賊一發而殪之嗣昭日暮還營所傷流血不止是夜卒莊宗卽

位贈太師隴西郡王長興中詔配饗莊宗廟庭

李嗣本本姓張少事武皇爲帳中紀綱漸立戰功得補軍較唐昭宗乾寧初從征李儔爲前鋒與燕人戰得居庸關以功爲義兒軍使因賜姓名從討王行瑜授簡較刑部尚書改威遠寧塞等軍使五年討羅弘信於魏州嗣本爲前鋒師還改馬軍都將從李嗣昭討王暉於雲州論功加簡較司空汴將李思安之圍潞州也從周德威軍餘吾嗣本率騎軍日與汴人轉關前後獻俘千計遷代州刺史六年從攻晉絳爲蕃漢副都較後爲振武節度使莊宗定魏博劉鄩據莘縣命嗣本入太原巡守都城又從破劉鄩於故元城收洛磁衛等三郡乃還鎮振武

李嗣恩本姓駱年十五能騎射侍武皇於振武及鎮太原補鐵林軍小較從征王行瑜奉表獻捷加簡較散騎嘗侍漸轉突陣指揮使賜姓名天祐四年逐康懷英於西河解汾州之圍加簡較司空充左廂馬軍都將戰王景仁有功加簡較司徒天祐十二年從莊宗入魏擊劉鄩有功轉天雄軍馬步軍都指揮使劉鄩之北趨樂平也嗣恩襲之倍程先入晉陽時城中無備得嗣恩兵至人百其勇鄩聞其先過乃遁莘之

戰以功轉代州刺史充石嶺關已北都知兵馬使稍遷振武節度使十五年追赴行在卒於太原

李存信本姓張從武皇入關平賊始補軍職爲蕃漢都較從討李儔降赫連鐸白義誠以功加簡較左僕射從入關討王行瑜加簡較司空領柳州刺史

李存孝給事武皇帳中嘗將騎爲先鋒從武皇救陳許逐黃寇及遇難上源每戰無不克捷後收潞之師圍張濬於平陽營於趙城華州韓建遣壯士三百夜犯其營存孝謀知設伏以擊之盡殪晉壓晉州西門獲賊三千自是關壁不出存孝引軍攻絳州其刺史張行恭棄城而去張濬韓建亦繇合口而遁存孝收晉絳以功授汾州刺史

李存進振武人事武皇從入關還鎮太原署牙職從討王行瑜以功授簡較掌侍與李嗣昭同破王珙於河中唐昭宗光化三年契丹犯塞寇雲中改永安軍使鴈門已北都知兵馬使天復初破氏叔琮前軍於洞渦三年授石州刺史莊宗初嗣位入爲步軍右都較簡較司空師出井陘授行營馬步都虞侯破汴軍於栢鄉論功授汾州刺史轉簡較司徒俄兼西南面行營招討使出師收慈州授慈沁二州刺史

李存璋雲中人武皇初起雲中存璋與康君立薛志勤等爲奔走之交從入關以功授國子祭酒累管萬勝雄威等軍從討李儔改義兒軍使唐昭宗光化二年授澤州刺史入爲牢城使從李嗣昭討雲州叛將王暉平之改敎練使五年武皇疾篤召張承業與存璋授遺詔存璋爰立莊宗夷內難頗有力焉改河東馬步都虞侯從破汴軍於夾城轉簡較司徒栢鄉之役爲三鎮排陣使十一年從盟朱友謙于猗氏授汾州刺史汴將尹皓攻慈州逆戰敗之十三年王檀逼太原存璋率汾州之軍入城固守授大同軍防禦使應蔚朔等州都知兵馬使秋契丹寇蔚州陷之阿保機遣使馳木書求賂存璋斬其使虜逼雲州存璋拒守城中有古鐵車乃鎔爲兵仗以給軍事虜退以功授簡較太傅同軍節度雲應等州觀察

康君立蔚州興唐人世爲邊豪唐僖宗乾符中爲雲州牙較事防禦使段文楚時羣盜起河南天下將亂代北仍歲阻饑諸部豪傑咸有嘯聚邀功之志會文楚稍削軍人儲給戍兵谷怨君立與薛鐵山程懷信王行審李存璋等謀曰段公儒人難與共事方今四方雲擾皇威不振丈夫不能於此時立功立事非人

豪也吾等雖權部衆然以雄勁聞於時者莫若沙陀部復又李振武父子勇冠諸軍吾等合勢推之則代北之地旬月可定功名富貴事無不濟也君立等乃夜謁武皇言曰方今天下大亂天子付將臣以邊事歲偶饑荒便削儲給我等邊人焉能守死公家父子素以威惠及五部當共除虐帥以謝邊人孰敢異議者武皇曰明天子在上舉事當有朝典公等勿輕議予家尊遠在振武萬一相迫俟予稟命君立等曰事機已泄遲則變生曷俟千里咨稟衆因聚譟擁武皇比及雲州衆且萬人師營鬪雞臺城中械文楚以應武皇之軍旣收城推武皇爲大同軍防禦留後衆狀以聞朝廷不悅詔徵兵來討俄而獻祖失振武武皇失雲州朝廷命招討使李鈞幽州李舉加兵於武皇攻武皇於蔚州君立從擊鈞舉之師屢敗及獻祖入韃靼君立保感義軍武皇授鴈門節度以君立爲左都押牙從入關逐黃孽收長安武皇還鎮太原授簡較工部尙書先鋒軍使文德初李罕之旣失河陽來歸於武皇且求援焉乃以君立充南面招討使李存孝副之帥師二萬助罕之攻取河陽三月與汴將丁會牛存節戰於沈河臨戰之次騎將安休休叛入汴

軍君立引退八月授汾州刺史昭宗大順元年潞州小較安居受反武皇遣君立討平之授簡較左僕射昭義節度使

薛志勤蔚州奉誠人小字鐵山初爲獻祖帳中親信唐僖宗乾符中與康君立共推武皇定雲中以功授右牙都較從入韃靼武皇授節鴈門志勤領代北軍使從入關收京城以功簡較工部尙書河東右都押牙先鋒右軍使從武皇救陳平黃巢武皇遇難於上源驛汴將楊彥洪連車樹柵遮絕巷陌時騎從皆醉宴席旣闌汴軍四面攻傳舍志勤虓勇冠絕復酒膽激壯因獨登驛樓大呼曰朱僕射負恩無行邀我司空圖之吾三百人足以濟事因彎弧發射矢無虛發汴人斃者數十志勤私謂武皇曰事急矣如至五鼓吾屬無類矣可速行因扶武皇而去雷雨暴猛汴人扼橋志勤以其屬血戰擊敗之得侍武皇還營繇是恩顧益厚昭宗大順初張濬以天子之師來侵太原十月天軍入陰地志勤與李承嗣率騎三千抗之敗韓建之軍於蒙坑進收晉絳以功授忻州刺史二年從討鎮州收天長臨城志勤皆先登陷陣勇敢無前王暉據雲州叛討平之以志勤爲大同軍防禦使簡

較司空乾寧初代康君立爲昭義節度使  
李承嗣代州鴈門人承嗣少仕郡補右職唐僖宗中  
和二年從武皇討賊關輔爲前鋒王師之攻華陰黃  
巢令僞客省使王汀會軍機於黃揆承嗣擒之以獻  
賊平以功授汾州司馬改榆次鎮將光啓初從討蔡  
賊于陳許上源之難遣承嗣奉表行在陳訴其事觀  
軍容田令孜館而慰譬令達情於武皇姑務協和仍  
授以左散騎嘗侍朱攻之亂遣承嗣率軍萬人援鄜  
州至渭橋迎扈車駕王行瑜旣殺朱攻承嗣會鄜夏  
之師入定京城獲僞相裴徹鄭昌圖函送朱攻襄王  
首獻于行在駕還宮賜號迎鑾功臣簡轂工部尙書  
守嵐州刺史賜犒軍錢二萬貫時車駕初還三輔多  
盜承嗣按兵警邏輦轂义安及還屯於鄜留別將馬  
嘉福五百騎宿衛孟方立之襲遼州也武皇遣承嗣  
設伏於榆社以待之邢人旣至承嗣發伏擊其歸兵  
大敗之獲其將奚忠信以功授洛州刺史及張濬之  
加兵於太原也時鳳翔軍營霍邑承嗣帥一軍攻之  
岐人夜遁追擊至趙城合大軍攻平陽旬有三日而  
拔師旋改教練使簡較司徒昭宗乾寧二年充鄆爲  
汴人所攻勢漸危賊遣使乞師於武皇武皇遣承嗣



帥三千騎假道於魏度河援之時李存信屯于莘縣  
既而羅弘信背盟掩擊王師因茲隔絕及朱瑄朱瑾  
失守承嗣朱瑾史儼同入淮南承嗣史儼皆驍將也  
淮人得之軍聲大振武皇深惜之如失左右手乃遣  
趙岳間道使于淮南請歸承嗣等楊行密許之遣使  
陳令存修好于武皇其年九月汴將龐師古葛從周  
出師將收淮南朱瑾率淮軍三萬與承嗣設伏於清  
口大敗汴人生獲龐師古行密嘉其雄才留而不遣  
仍奏授簡較太尉領鎮江軍節度使

史儼代州鴈門人以便騎射給事於武皇為帳中親  
將驍果絕衆善擒生設伏望塵揣敵所向皆捷自武  
皇入定三輔誅黃巢每出師皆從唐昭宗乾寧中從  
討王行瑜師次渭北遣儼率五百騎護駕石門時京  
城大擾士庶奔迸散布南山儼分騎警衛比駕還京  
盜賊不作以功授簡較右散騎嘗侍屯三橋者累月  
史建塘鴈門人武皇節制鴈門建塘為九府都督從  
入關定京師及鎮太原為裨將唐僖宗中和四年從  
援陳許為前鋒敗黃巢於汴上追賊至徐兗嘗將騎  
挺身酣戰勇冠諸軍是時天下之師雲集軍中無不  
推伏

蓋寓蔚州人祖祚父慶世爲州之牙較武皇起雲中  
寓與康君立等推轂佐佑之因爲腹心武皇節制厲  
門署職爲都押牙領嵐州刺史洎移鎮太原改左都  
押牙簡較左僕射武皇與之決事言無不從凡出征  
行靡不衛從唐昭宗乾寧二年從入關討王行瑜特  
授簡較太保開國侯邑千戶領容管觀察經畧使光  
化初車駕還京授簡較太傅封成陽郡公寓性通黠  
多智數善揣人主情武皇性嚴急左右難事無委遇  
者小有違忤卽寘於法唯寓承顏希旨規其趣向婉  
辭順意以盡參禪武皇或暴怒將吏事將不測寓欲  
救止必佯佐其怒以責之武皇怡然釋之有所諫諍  
必徵近事以爲喻自武皇鎮撫太原最推親信中外  
將吏無不景附朝廷藩隣信使結託先及武皇次入  
寓門旣總軍中大柄其名振主梁祖亦使姦人離間  
暴揚於天下言蓋寓已代李克用聞者寒心武皇略  
無疑問初武皇旣平王行瑜旋師渭北暴雨六十日  
諸將或請入覲且云天顏咫尺安得不行覲禮武皇  
意未決寓白曰車駕自石門還京寢未安席比爲行  
瑜兄弟驚駭乘輿今京師未寧姦宄流議大王移兵  
渡渭必恐復動宸情君臣始終不在朝覲但歸藩守

姑務勤王是忠之道也武皇笑曰蓋寓尙阻吾入觀  
况下人哉卽日班師

周德威小字楊五朔州馬邑人也初事武皇爲帳中  
騎督唐昭宗乾寧中爲鐵林軍使從武皇討王行瑜  
以功授簡較左僕射移內衙軍副天復中武皇之師  
不利於蒲縣汴將朱友寧氏叔琮來逼晉陽時諸軍  
未集城中大恐德威與李嗣昭選募銳兵分出諸門  
以攻其壘擒生斬馘汴人枝梧不暇乃退天祐三年  
與李嗣昭合燕軍攻潞州降丁會後爲蕃漢都將李  
思安之寇潞也德威軍於餘吾時汴人十萬築夾城  
圍潞州內外斷絕德威以精騎薄之屢敗汴人進營  
高河令遊騎邀其芻牧汴軍閉壁不出乃自東南山  
口築埽道樹柵以通夾城德威之騎軍倒牆堦墜日  
數十戰首後俘馘不可勝紀梁有驍將黃角鷹房骨  
崙皆生致之五年四月命德威班師時莊宗初立德  
威外握兵柄頗有浮議內外憂之德威旣至單騎入  
謁繇是羣情釋然是月二十四日從莊宗再援潞州  
二十九日德威前軍營橫碾距潞四十五里五月朔  
晨霧晦暝王師伏於三垂岡下翌日直趨夾城斬關  
破壘梁人大敗解潞州之圍初德威與李嗣昭有私

憾武皇臨終顧謂莊宗曰進通忠孝不負我重圍累年似與德威有隙以吾命諭之若不解重圍歿有遺恨莊宗達遺旨德威感泣繇是勵力堅戰竟破彊敵與嗣昭歡愛如初以功加同平章事振武節度使七年岐人攻靈夏遣使來求助德威渡河以應之師還授蕃漢馬步總管十一月汴人據深冀汴將王景仁軍八萬次栢鄉鎮州節度使王鎰來告難帝遣德威率前軍出井陘屯於趙州十二月帝親征二十五日進薄汴營距栢鄉五里營於野河北汴將韓勅率精兵三萬鎧甲皆被繒綺金銀炫曜望之森然我軍懼形於色德威謂李存璋曰賊結陣而來觀其形勢志不在戰欲以兵甲耀威耳我軍人乍見其來謂其鋒不可當此時不挫其銳吾軍不振矣乃遣存璋諭諸軍曰爾見此賊軍否是汴州天武健兒皆屠沽傭販虛有其表徒被精甲十不當一擒獲足以爲貨德威自率精騎擊其兩偏左馳右決出沒數四是日獲賊一百餘人賊渡河而退德威謂莊宗曰賊驕氣尤盛宜按兵以待其衰莊宗曰我提孤軍救難解紛三鎮烏合之衆利在速戰卿欲持重吾懼其不可使也德威曰鎮定之士長於守城列陣野戰素非便習我師

破賊惟恃騎軍平田廣野易爲施巧今壓賊營令彼見我虛實則勝負未可必也莊宗不悅退臥帳中德威患之謂監軍張承業曰王欲速戰將烏合之徒欲當劇賊所謂不量力也去賊咫尺限此一渠水彼若早夜以略約渡之吾族其爲俘矣若退軍高邑引賊離營彼出則歸彼歸則出復以輕騎掠其芻餉不踰月敗賊必矣承業入言莊宗亦釋然德威得降人問之曰景仁下令造浮橋數百果如德威所料二十七日乃退軍保高邑八年正月二日德威率騎軍致師於陌鄉設伏於村塢間令三百騎以壓汴營王景仁悉其衆結陣而來德威轉戰而退汴軍因而乘之至於高邑南時步軍未成列德威陳騎河上以抗之亭午兩軍皆陣莊宗問戰時德威曰汴軍氣盛可以逸制勞造次較力殆難與敵古者師行不踰一舍蓋慮糧餉不給士有飢色今賊遠來決戰縱挾糗糒亦不遑食晡晚之後飢渴內侵戰陣外迫士心旣倦將必求退乘其勞弊以生兵制之縱不大敗偏師必喪以臣所籌利在晡晚諸將皆然之時汴軍以魏博之人爲右廣宋汴之人爲左廣自未至申陣勢稍却德威麾軍呼曰汴軍走矣塵埃漲天魏人收軍漸退莊宗

與史建瑋安金全等因衝其陣夾攻之大敗汴軍殺戮殆盡王景仁李思安僅以身免獲將較二百八十八人八月劉守光僭稱大燕皇帝十二月遣德威率步騎三萬出飛狐與鎮州將王德明定州將程巖等軍進討九年正月收涿州降刺史劉知溫五月七日劉守光令驍將單廷珪督精甲萬人出戰德威遇於龍頭岡初廷珪謂左右曰今日擒周楊五旣臨陣見德威廷珪單騎持槍窮追德威垂及德威側身避之廷珪少退德威奮槌擊墜其馬生獲廷珪賊黨大敗斬獲三千級獲大將李山海等五十二人十二日德威自涿州進軍良鄉大城守光旣失廷珪自是奪氣德威之師屢收諸郡降者相繼十年十一月擒守光父子幽州平十二月授德威簡較侍中幽州盧龍等軍節度使德威性忠孝感武皇獎遇嘗思臨難亡身十二月汴將劉鄩自洹水乘虛將寇太原德威在幽州聞之徑以五百騎馳入土門聞鄩軍至樂平不進德威徑至南宮以候汴軍初劉鄩欲據臨清以扼鎮定轉餉之路行次陳宋口德威遣將擒數十人皆停刃於背繫而遣之旣至謂劉鄩曰周侍中已據宗城矣德威其夜急騎扼臨清劉鄩乃入貝州是時德威若

不至則勝負未可知也十五年我師營麻口渡將大舉以定汴州德威自幽州率本軍至十二月二十三  
日軍次胡柳詰旦騎報曰汴軍至矣莊宗使問戰備  
德威奏曰賊倍道而來未成行伍我營柵已固守備  
有餘旣深入賊疆須決萬全之策此去大梁信宿賊  
之家屬盡在其間人之甞情孰不以家國爲念以我  
深入之衆抗彼激憤之軍不以方畧制之恐難必勝  
王但接軍保柵臣以騎軍疲之使彼不得下營際晚  
糧爨不給進退無據因而乘之勝之道也莊宗曰河  
上終日挑戰恨不遇賊今款門不戰非壯夫也乃率  
親軍成列而出德威不獲已從之謂其子曰吾不知  
其死所矣莊宗與汴將王彥章接戰大敗之德威之  
軍在東偏汴之遊軍入我輜重衆駭奔入德威軍因  
紛擾無行列德威兵少不能解父子俱戰歿是夜收  
軍德威不至莊宗慟哭謂諸將曰喪吾良將吾之咎  
也同光初追贈太師

符存審陳州宛丘人初歸武皇署右職令典義兒軍  
賜姓李存審性謹厚寵遇日隆自是武皇四征存審  
嘗從所至立功改左右廂步軍都指揮使天祐三年  
授蕃漢馬步副指揮使與李嗣昭降丁會於上黨從

周德威破賊於夾城以功授忻州刺史領蕃漢馬步  
 都指揮使七年充漢副總管莊宗擊汴人於柘鄉留  
 存審守太原九年梁祖攻菑縣存審與史建瑋李嗣  
 昭赴援屯下博橋汴人驚亂燒營而遁以功遙領邢  
 洛磁團練使十二年魏博歸款於莊宗莊宗遣存審  
 率前鋒據臨清以俟進取莊宗入魏存審屯魏縣以  
 抗劉鄩十二年六月鄩營莘縣存審與鎮定之師營  
 莘西三十里一日數戰八月率師攻張源德於貝州  
 十三年二月劉鄩自莘悉眾來襲我魏州存審以大  
 軍踵其後戰於故元城大敗汴人從收澶衛磁洛等

州秋邢州閻寶降授存審安國軍節度使邢洛磁等  
 州觀察使十月戴思遠棄滄州毛璋以城降授存審  
 橫海軍節度使兼領魏博馬步軍都指揮使明年就  
 加平章事十四年八月將兵援周德威於幽州敗契  
 丹之眾冬破汴將安彥之於楊劉諸軍進營麻口時  
 梁將謝彥章營行臺村莊宗勇於接戰每以輕騎當  
 之遇窘者數四存審每俟其出必叩馬諫曰王將  
 復唐宗社室為天下自愛舉於挑戰一劍之任無益  
 聖德請責效於臣古人不以賊遺君父臣雖不武敢  
 不代君之憂莊宗即時迴駕十二月戰於胡柳晡時



之後存審引所部銀槍效節軍敗梁軍於土山下是日辰巳間周德威歿一軍逗曉梁軍四集存審與其子彥圖冒刃血戰出沒賊陣與莊宗軍合午後師復集擊敗汴人十六年春爲內外蕃漢馬步總管於德勝口築南北城以據之七月汴將王瓚自黎陽渡河寇澶州存審拒戰瓚退營於楊村渡控我上游自是日與交鋒對壘經年大小凡百餘戰十七年汴將劉鄩攻同州朱友謙求援於我遣存審與李嗣昭將兵赴之九月次河中進營朝邑時河中久臣於梁衷持兩端及諸軍大集鄩粟暴貴嗣昭懼其翻覆將急戰以定勝負居旬日梁軍逼我營會望氣者言西南有黑氣如鬪雞之狀當有戰陣存審曰我方欲決戰而形於氣象得非天贊歟是夜閱其衆詰旦進軍梁軍來逆戰大敗之追斬二千餘級自是梁軍保壘不出存審謂嗣昭曰吾初懼劉鄩據渭河偏師旣敗彼若退歸懼我踵之獸窮持人勿謂無事可開其歸路然後追奔乃令王建及牧馬於沙苑劉鄩尹皓知之保衆退去遂解同州之圍存審略地至奉先謁諸帝陵乃班師十八年王師討張文禮於鎮州李嗣昭李存進相次戰歿十九年遣存審率師進攻師於城下文

禮之將李再豐陰送款於存審我師中夜登城擒文禮之子處球等露布以獻鎮州平以功加簡較太傅兼侍中二十年正月師旋於魏州莊宗出城迎勞就第宴樂居無何契丹犯燕薊郭崇韜奏曰汴寇未平李繼韜背叛北邊遮虜非存審不可帝遣中使諭之存審臥病羸瘠附奏曰臣効忠稟命靡敢爲辭但病恙纏綿不堪抵役旣而詔存審以本官充幽州盧龍節度自鎮州之任同光初加開府儀同三司簡較太師中書令邑千戶賜號忠烈扶天啓運功臣

郭崇韜代州鴈門人也武皇用爲典謁奉使鳳翔稱旨署教練使崇韜臨事機警應對可觀莊宗嗣位尤器重之天祐十四年用爲中門副使專典機務艱難戰伐靡所不從十八年從征張文禮於鎮州契丹引衆至新樂王師大恐諸將咸請退還魏州莊宗猶豫未決崇韜曰阿保機爲王郁所誘本利貨財非敦隣好苟前鋒小衄遁走必矣况我新破汴寇威振北蕃乘此驅攘往無不捷且事之濟否亦有天命莊宗從之王師果捷莊宗卽位於魏州崇韜加簡較太保守兵部尙書充樞密使是時衛州陷於梁澶相之間寇鈔日至民流地削軍儲不給羣情惴惴以爲霸業終

不能濟崇韜寢不安席俄而王彥章陷德勝南城敵勢滋蔓汴人急攻楊劉城明宗在鄆音驛斷絕莊宗登城四望計無從出崇韜啓曰段凝阻絕津路苟王師不南鄆州安能保守臣請於博州東岸立柵以固通津但慮汴人偵知徑來薄我請陛下募敢死之士日以挑戰如三四日間賊軍未至則柵壘成矣崇韜率毛璋等萬人夜趨博州視矛戟之端有光崇韜曰吾聞火出兵刃破賊之兆也至博州渡河版築晝夜不息崇韜于葭葦間據胡牀假寐覺袴中冷令左右視之乃蛇也其忘疲勵力也如是居三日梁軍果至城壘低痺沙土散惡戰具不完汴將王彥章杜晏球率衆攻擊軍不得休息崇韜身先督衆四面拒戰有急卽應城垂陷俄報莊宗領親軍次西岸梁軍聞之退走因解楊劉之圍未幾汴將康延孝來奔崇韜延于臥內訊其軍機延孝曰汴人將四道齊舉以困我軍莊宗憂之召諸將謀進取之策宣徽使李紹宏請棄鄆州與汴人盟以河爲界無相侵寇莊宗不悅獨臥帳中召崇韜謂曰計將安出對曰臣不知書不能徵比前古請以時事言之且陛下十五年起義圖霸爲雪家讐國恥甲冑生蟣虱黎人困輸輓今旣集大

號河朔士庶日望盪平纔得汝陽尺寸之地不能保  
守况盡有中原乎將來歲賦不充物議咨怨設若割  
河爲界誰爲陛下守之臣自延孝言事已來晝夜籌  
度料我兵力筭賊事機不出今年雌雄必決聞汴人  
決河自滑至鄆非舟楫不能濟又聞精兵盡在段凝  
麾下王彥章日寇鄆境彼旣以大軍臨我南鄙又憑  
恃決河謂我不能南渡志在收復汝陽此汴人之謀  
也臣謂段凝保據河壩苟欲持我臣但請留兵守鄴  
保固楊劉陛下親御六軍長驅倍道直指大梁汴城  
無兵望風自潰旣若僞主授首賊將自然倒戈半月  
之間天下必定如不決此計傍採浮譚臣恐不能濟  
也今歲秋稼不登軍糧纔支數月決則成敗未知不  
決則坐見不濟臣聞作舍道邊三年不成帝王應運  
必有天命成敗天也在陛下獨斷莊宗蹶然而興日  
正合吾意大丈夫得則爲王失則爲虜行計決矣卽  
日下令軍中家口竝還魏州莊宗送劉皇后與聖宮  
使繼岌至朝城西野亭泣別日事勢危蹶今須一決  
事苟不濟無復相見乃留李紹宏及租庸使張憲守  
魏州大軍自楊劉濟河是歲擒王彥章誅梁氏降段  
凝皆崇韜贊成其謀也

安金全代北人世爲邊將少驍果便騎射武皇時爲騎將屢從征伐莊宗之救潞州及平河朔皆有戰功累爲刺史

安審通金全之猶子也幼事莊宗累有戰功轉先鋒指揮使同光初爲北京右廂廐軍都指揮使屯奉化軍四年春赴明宗急召軍趨夷門爲前鋒天成初授單州刺史改齊州防禦使兼諸道先鋒馬軍都指揮使

安元信字子言代北人元信以將家子便騎射幼事武皇從平巢蔡唐僖宗光啓中吐渾赫連鐸寇雲州武皇使元信拒之信兵敗於居庸關武皇性嚴急元信不敢還遂奔定州王處存待之甚厚用爲突騎都較昭宗乾寧中處存卒子郜嗣時梁軍攻河朔三鎮奔命不暇梁將張存敬軍奄至城下旣無宿備郜懼挈其族奔太原元信從之武皇待之如初用爲鐵林軍使梁將氏叔琮之攻河東也別將葛從周白馬嶺入元信伏于榆次挫其前鋒梁將李思安之攻上黨也王師將壁高河爲梁軍所逼別將秦武者尤爲難敵元信與鬪斃之繇是梁軍解去城壘得立武皇賜所乘馬及細鎧仗遷突騎都將莊宗嗣晉王位元信

從救上黨破夾寨復澤潞以功授簡較司空遼州刺史賜玉鞍名馬栢鄉之役日晚戰酷元信重傷莊宗自臨傅藥其年改授簡較司徒武州刺史充內衙副都指揮使山北諸州都團練副使從莊宗定魏博移爲州刺史與梁軍對壘得勝渡元信爲右廂排陣使未幾爲大同軍節度使

劉訓字遵範隰州永和人也出身行間初事武皇爲馬軍隊長漸至散將屬河中王氏昆仲有尋戈之役訓從史儼攻陝州武皇討王行瑜以訓爲前鋒後隸河中爲隰州守禦都將居無何殺刺史以郡歸莊宗

歷瀛州刺史

劉彥琮字比德雲中人也事武皇累從征役先是絳州刺史王瓘叛武皇言於彥琮意欲致之無幾從畋於汾晉之郊彥琮奔絳瓘以爲附已待之甚厚因命爲親騎會瓘出獵於驅馳之際彥琮刃瓘之首來獻武皇甚奇之

袁建豐自武皇破黃巢時得於華陰年方九歲愛其精神爽俊俾收養之漸長列於左右復習騎射補鐵林都虞侯從破邠州王行瑜以功遷左親騎軍使轉突騎指揮使從莊宗解圍上黨破栢鄉陣累功加右

僕射左廂馬軍指揮使明宗爲內衙指揮使建豐爲副北討劉守光嘗身先士伍轉都教練使權蕃漢副總管莊宗入鄴以心腹幹能選爲魏府都巡簡使破劉鄩下衛磁洛三郡有功加簡較司空授洛州刺史於臨洛西敗梁將王遷數千人生獲將領七十餘人俄拜相州刺史徵赴河上預戰於柳陂建豐領相州軍士行營在外委州事於小人失於撫馭指揮使孟守謙據城以叛建豐引兵討平之改隰州刺史

夏魯奇字邦傑青州人也初事宣武軍爲軍較與主將不協遂歸於莊宗以爲護衙指揮從周德威攻幽州燕將有單廷珪元行欽時稱驍勇魯奇與之鬪兩不能解將士皆釋兵從觀幽州平魯奇功居多梁將劉鄩在洹水莊宗深入致師鄩設伏於魏縣西南蔭蘆中莊宗不滿千騎汴人伏兵萬餘大譟而起圍莊宗數重魯奇遂與王門關烏德兒等奪命決戰自午至中俄而李存審兵至方解魯奇持槍攜劍獨衛莊宗手殺百餘人烏德兒等被擒魯奇傷痍徧體自是莊宗尤憐之歷磁州刺史中都之戰汴人大敗魯奇見王彥章識之單馬追及槍擬其頸彥章顧曰爾非余故人乎卽擒之以獻莊宗壯之賞絹千疋梁平授

鄭州防禦使四年授河陽節度

張廷裕代北人也幼事武皇於雲中從平黃巢討王  
行瑜自行間漸昇爲小將莊宗定魏補天雄軍左廂  
馬步都虞侯歷蔚慈隰三州刺史

康義誠字信臣代北三部落人也少以騎射事武皇  
從莊宗入魏博補突騎軍使累遷本軍都指揮使

索自通字得之太原清源人也自通少能騎射嘗於  
山墅射獵莊宗鎮太原時遇之於野訊其姓名卽補  
右番廳直軍使後因從獵射中走鹿轉指揮使佐周

德威攻燕軍於涿州擒燕將郭在均從莊宗定魏博  
改突騎指揮使明宗卽位自隨駕左右廂馬軍都指

揮使授忻州刺史歲餘召還後典禁兵領韶州刺史  
漢史弘肇鄭州滎澤人也弘肇少游俠無行拳勇健  
步日行三百里走及奔馬梁末每七戶出一兵弘肇

在籍中後隸本州開道都入禁軍嘗在晉祖麾下遂  
留爲親從及踐祚用爲控鶴偏將高祖鎮太原奏請  
從行用爲牙隊大將後起置武節左右指揮以弘肇

爲都將代州王暉叛以城歸契丹弘肇征之身先士  
卒一鼓而拔加簡較太保領雷州刺史漢國建王守  
恩以上黨來附虜主命大將耿崇美率衆上太行欲



取上黨高祖命弘肇率軍應接守恩軍至潞州契丹退去翟令奇以澤州迎降會河陽武行德遣人迎弘肇遂率眾南下與行德合故高祖繇蒲陝赴雒如歸弘肇前鋒之功也

周何福進漢高祖乾祐中為曹州防禦使時太祖出鎮於鄴將謀北伐奏以福進自隨及太祖入平內難以輔佐功拜忠武軍節度使

冊府元龜

巡按福建監察御史臣李嗣京 訂正

知 閩 縣 事 臣 曹鼎臣 參閱

知 建 陽 縣 事 臣 黃國琦 較釋

將帥部 九

立功第一

夫受命於朝受賑於社推轂以遣鑿門而出衽金革而不厭聽鼙鼓而忘身者將帥之事也蓋五材並設未嘗去兵四征弗庭於是用武自三五之世乃有威讓之訓原野之罰焉春秋戰國革車交驚故其握成

著攻城略地之績成斬將奪旗之効者比比有之楚漢競逐勳策可舉繇是之後或內平亂畧外攘夷寇奉辭以討有罪勵兵而翦勅敵乃能戡夷兇醜謚清邊圉鹵獲之數無等追北之威靡亢關疆以益地平國而弔民紀功於竹帛稱伐於鐘鼎斯所謂折衝之虎臣殿邦之良帥者也

孫武為吳將西破強楚入郢北威齊晉顯名諸侯孫子與有力焉

司馬穰苴為齊景公將軍將兵扞燕晉之師晉師聞之為罷去燕師聞之度水而解於是追擊之遂取所亡邦內故境

孫臏武之後也為齊威王師宣王二年與齊將田忌田嬰俱伐魏敗之馬陵虜太子申而殺魏將龐涓

吳起為魯將攻齊大破之魯君疑之謝起起於是聞魏文侯賢而事之文侯以為將擊齊拔五城

趙奢為趙將秦伐韓軍於闕與趙王令趙奢將救之大破秦軍秦軍解而走遂解闕與之圍而歸

李牧為趙將居代鴈門大破殺匈奴十餘萬騎滅襜

都甘 切 路談切徐廣曰一作臨崔駰又案如淳曰胡明也在代地破東胡降林胡

單于奔走其後十餘歲匈奴不敢近趙邊城趙悼襄

王元年廉頗既亡入魏趙使李牧攻燕拔武遂方城  
居二年龐煖破燕軍殺劇卒後七年秦破趙殺將扈  
輒於武遂城斬首十萬趙乃以李牧為大將軍擊秦  
軍於宜安大破秦軍走秦將栢齮封李牧為武安君  
居三年秦攻番吾李牧擊破秦軍南距韓魏

廉頗者為趙將惠文王十六年伐齊大破之取晉陽  
拜為上卿自邯鄲圍解五年而燕用栗腹之謀舉兵  
擊趙趙使廉頗將大破燕軍於鄗殺栗腹遂圍燕割  
五城請和乃聽之二十年廉頗東攻齊破其一軍居  
二年廉頗復伐齊幾拔之

幾邑名也案趙世家惠文王二十三年廉頗將攻魏

之幾邑取之而趙世家及年表無伐齊幾拔之事實  
幾是邑名屬齊或云屬魏耳田丹在齊不得至於拔  
也後三年廉頗攻魏之防陵安陽拔之

樂毅為燕亞卿昭王使毅約趙惠文王別使連楚魏  
令趙囑秦囑進說之意以伐齊之利諸侯害齊潛王之驕

暴皆爭合從與燕伐齊毅還報昭王悉起兵使樂毅  
為上將軍趙惠文王以相國印授毅毅於是并護趙  
楚韓魏燕之兵伐齊破之濟西諸侯兵罷歸而燕軍  
獨追至于臨淄齊潛王之敗濟西亡走保於莒毅獨  
留徇齊齊皆城守毅攻入臨淄盡取齊寶財物祭器  
輸之燕昭王大悅親至濟上勞軍行賞饗士封毅於

昌國屬齊號為昌國君於是昭王收齊鹵獲以歸而使  
毅復以兵平齊城之不下者毅留徇齊五歲下齊七  
十餘城皆為郡縣以屬燕

秦商鞅孝公時為大良造將兵圍魏安邑降之又襲  
虜魏公子卯因攻其軍盡破之

樗里子名疾惠王弟也惠王八年使將而伐晉曲沃  
盡出其人取其城地入秦二十五年伐趙虜趙將軍

莊豹拔蘭明年助魏章攻楚敗楚將屈丐取漢中地  
秦封樗里子號為嚴君

甘茂惠王時為將佐魏章畧定漢中地惠王卒武王  
立張儀魏章去東之魏蜀侯煇相壯反秦使甘茂定

蜀還而以甘茂為左丞相  
魏冉封穰侯為秦將攻魏魏獻河東方四百里拔魏

之河內取城大小六十餘昭王三十二年為相國將  
兵攻魏走芒卯芒莫卯切 卯陌飽切入北宅三十三年魏背秦

與齊從親秦使穰侯伐魏斬首四萬走魏將暴鸞得  
魏三縣明年穰侯與白起客卿胡陽復攻趙韓魏破

芒卯於華陽下斬首十萬取魏之卷立權也蔡陽長社  
趙氏觀津

白起郿人也昭王十三年為左庶長將西擊韓之新

城明年為左更攻韓魏於伊闕斬首二十四萬又虜

其將公孫喜拔五城起遷為國尉涉河取韓安以東

到乾

音河

今河東聞喜縣北有乾河口因名乾河里但有故溝處無復水也

明年起

為大良造攻魏拔之取城大小六十一明年起與客

卿錯攻垣城拔之

河東垣縣

後五年攻趙拔光狼城後七

年攻楚拔鄢鄧五城

昭王二十八年

其明年攻楚拔郢燒夷

陵遂東至竟陵楚王亡去郢東走徙陳秦以郢為南

郡起遷為武安君因取楚定巫黔中郡昭王三十四

年攻魏拔華陽走芒卯而虜三晉將斬首十三萬與

趙將賈偃戰沈其卒二萬人於河中昭王四十三年

攻韓陘城拔五城斬首五萬四十四年攻南陽太行

道絕之

北南陽河內脩武是也

四十五年伐韓之野王降

秦王齧為左庶長昭王四十七年秦使齧

音核

攻韓取

上黨民走趙趙軍長平

在法氏

以按據上黨民四月齧

因攻趙趙使廉頗將趙軍士卒犯秦斥兵秦斥兵斬

趙裨將茄六月陷趙軍取二鄣四尉七月趙軍築壘

壁而守之秦又攻其壘取二尉敗其陣奪西壘壁廉

頗堅壁以待秦秦數挑戰趙軍不出趙王數以為讓

九月趙卒不得食四十六日皆內陰相殺食求攻秦

壘欲出為四五隊四五復之不能出其將軍趙括出

川府志 立功一

銳卒自博戰秦軍射殺趙括括軍敗前後斬首虜四十五萬人趙人大震四十八年十月秦復定上黨郡秦分軍為二王齧攻皮牢拔之司馬梗定太原王翦為秦將始皇十一年翦將攻趙闕與破之拔九城十八年攻趙歲餘遂拔趙趙王降盡定趙地為郡明年燕使荆軻為賊於秦秦王使王翦攻燕燕王喜走遼東翦遂定燕薊而還翦後將六十萬人擊荆大破荆軍至蘄南殺其將軍項燕荆兵遂敗走秦因乘勝畧定荆地城邑歲餘虜荆王負芻竟平荆地為郡縣因南征百越之君

翦子賁為秦將擊荆秦諱楚故云荆荆兵敗還擊魏魏王降

遂定魏地後與李信破定燕齊地始皇二十六年盡并天下王氏蒙氏功為多名施於後世

蒙鶩為上卿莊襄王元年為秦將伐韓取成臯滎陽作置三川郡二年攻趙取三十七城始皇三年蒙鶩攻韓取十三城攻魏取二十城作置東郡

鶩子武始皇二十三年為秦裨將軍與王翦攻楚大破之殺項燕二十四年攻楚虜楚

武子恬因家世得為秦將始皇二十六年攻齊大破之拜為內史秦已并天下乃使蒙恬將二十萬眾北

逐戎狄收河南築長城因地形用險制塞起臨洮屬

西至遼東延袤萬餘里於是渡河至陽山五原西安陽縣北有

陰山陰山在河內陽山在河北

李信為將嘗以兵千人逐燕太子丹於行水中卒破

得丹

漢周勃高帝六年以將軍從擊燕王臧荼破之易下

今易縣臣欽若等曰勃漢五年以前從攻項籍並具將帥佐命門韓彭英盧皆放此所將卒當

馳道為多當高祖所七年以將軍從高帝擊韓王信

於代降下霍人以前至武泉縣屬雲中擊胡騎破之武泉

北轉攻信軍銅鞮破之還降太原六城擊韓信胡騎

晉陽下破之下晉陽復擊信軍於砮石地名砮石音坐破之

追北八十里還攻樓煩三城因擊胡騎平城下所將

卒當馳道為多十年以太尉擊陳豨屠馬邑將卒斬

豨將軍乘去聲馬姓乘馬名豨也轉擊韓王信陳豨趙利軍

於樓煩破之得豨將宋最鴈門守圜圜音下頓切鴈門守之名因

轉攻得雲中守遼丞相箕肆將軍博遼古速字肆音離二切博者亦

豨將之名定鴈門郡十七縣雲中郡十二縣因復擊豨靈

丘破之斬豨丞相程縱將軍陳武都尉高肆定代郡

九縣十三年燕王盧綰反勃以相國代樊噲將擊下

薊音計幽州縣名得綰大將丞相偃守陘音刑盧綰郡守陘其名也太尉

丹守七通將帥部卷之三十四

弱御史大夫施屠渾都姓施屠名渾都破綰軍上關

後擊綰軍沮陽沮音阻縣名屬上谷追至長城定上谷十二縣

右北平十六縣遼東二十九縣漁陽二十二縣最從

高帝得相國一人最者凡也摠言其丞相二人將軍

二千石各三人別破軍二下城三定郡五縣七十九

得丞相大將各一人

樊噲高帝六年以將軍從攻臧荼於燕虜荼定燕地

七年以將軍從攻韓王信於代自霍人以往至雲中

與絳侯周勃共定之十年擊陳豨與曼丘臣軍戰襄國

破栢人先登降之定清河恒山凡二十七縣殘東垣

殺傷也遷為左丞相破得綦母卯尹潘軍於無終廣

昌姓綦母名卯綦音其破豨別將胡人王黃軍於代南因擊韓

王信軍參合軍所將卒斬信擊豨胡騎橫谷斬將軍

趙旣虜代丞相馮梁守孫奮大將軍王黃將軍大將

一人太僕解福等十人與諸將共定代鄉邑七十三

後燕王盧綰反噲以相國擊綰破其丞相抵薊南抵

禮切至也一說抵者其丞相之名也定燕縣十八鄉邑五十一噲從高

帝斬首百七十六級虜二百八十八人別破軍七下

城五定郡六縣五十二得丞相一人將軍十三人二

千石以下至三百石十二人



酈商高帝六年以將軍從擊臧荼戰龍脫地名破荼軍

易下卻敵遷為右丞相別定上谷因攻代受趙相國

印與絳侯等定代郡鴈門得代丞相程縱守相郭同

守相謂為相而居守者將軍以下至六百石十九人後以右丞

相擊豨殘東垣又從擊黥布攻其前垣謂攻其壁陷壘之前垣

兩陣得以破布軍凡別破軍三降定郡六縣七十二

得丞相守相大將軍各一人小將軍二人二千石以

下至六百石十九人

夏侯嬰高帝七年以太僕從擊韓王信軍胡騎晉陽

大破之又從擊胡騎句注北大破之又擊胡騎平城

南三陷陳功為多從擊陳豨黥布陷陳卻敵

灌嬰高帝七年以車騎將軍從擊韓王信於代至馬

邑別降樓煩以北六縣斬代左將破胡騎將於武泉

北復從擊信胡騎晉陽下所將卒斬胡白題將一人

胡名也又從擊陳豨別攻豨丞相侯敞軍曲逆下破之

卒斬敞及特將五人卒謂所將之卒特獨也各獨為也降曲逆盧奴

上曲陽安國安平攻下東垣黥布反以車騎將軍先

出攻布別將於相破之斬亞將樓煩將三人又進擊

破布上柱國及大司馬軍又進破布別將肥銖嬰貞

生得左司馬一人所將卒斬其小將十人追北至淮

上凡從所得二千石二人別破軍十六降城四十六  
定國一郡二縣五十二得將軍二人柱國相各一人  
二千石十人

斬欵

音翁

高帝七年以騎都尉從擊韓王信於平城下

還軍東垣有功遷為車騎將軍并將梁趙齊燕楚車

騎別擊陳豨丞相敞破之

侯敞

因降曲逆從擊黥布有

功凡斬首九十級虜一百四十二人破別軍十四降

城五十九定郡國各一縣二十二得上柱國各一人

二千石以下至五百石三十九人

郭蒙為將軍高帝十年代相國陳豨反帝在邯鄲豨

將侯敞將萬餘人遊行王黃將騎千餘軍曲逆張春

將卒萬餘人渡河攻聊城蒙與齊將擊大破之

周亞夫景帝三年以中尉為太尉東擊吳楚會兵滎

陽

會集也

吳方攻梁亞夫東北走昌邑

走音奏

使輕騎兵

弓高侯等絕吳楚兵後食道吳楚既餓廼引而去亞

夫出精兵追擊大破吳王濞

音匹備切

吳王濞棄其軍與

壯士數千人亡走保於江南丹徒漢兵因乘勝遂盡

虜之降其縣月餘越人斬吳王頭以告凡相守攻三

月而吳楚破平是時欒布衛綰程嘉公孫渾邪

渾音胡温

切邪音

蘇息直不疑皆以將軍擊吳楚有功封侯

衛青武帝元光六年以車騎將軍擊匈奴出上谷至

籠城籠讀與龍同斬首虜數百賜爵關內侯元朔元年秋

復將三萬騎出鴈門斬首虜數千明年復出雲中西

至高闕高闕山名一曰塞名在朔方之北遂至于隴西捕首虜數千

畜百餘萬走白牟樓煩王遂取河南地為朔方郡當北

地之北黃河之南也以三千八百戶封青為長平侯五年春令

青將二萬騎出高闕衛尉蘇建為游擊將軍左內史

李沮為彊弩將軍沮音且門太僕公孫賀為騎將軍代相

李蔡為輕車將軍皆領屬車騎將軍俱出朔方大行

李息岸頭侯張次公為將軍俱出右北平匈奴右賢

王當青等兵以為漢兵不能至此飲醉漢兵夜至圍

右賢王右賢王驚夜逃獨與其愛妾一人騎數百馳

潰圍北去漢輕騎校尉郭成等追數百里弗得得右

賢禪王十餘人眾男女萬五千餘人畜數十百萬于

是引兵而還至塞天子使使者持大將軍印即軍中

拜青為大將軍諸將皆以兵屬立號而歸明年春青

以大將軍出定襄合騎侯公孫敖為中將軍太僕公

孫賀為左將軍翁侯趙信為前將軍衛尉蘇建為右

將軍郎中令李廣為後將軍左內史李沮為彊弩將

軍咸屬大將軍斬首數千級而還月餘悉復出定襄

斬首虜萬餘人是歲趙信奔降單于元符四年帝與諸將議曰翁侯趙信為單于畫計嘗以為漢兵不能

度幕輕留今大發卒其勢必得所欲乃令青與驃騎

將軍霍去病驃音頻 妙切各五萬騎步兵轉者踵軍數十

萬轉者謂運轉 車也踵接也而敢力戰深入之士皆屬去病去病

始為出定襄當單于捕虜虜言單于東廼更令去病

出代郡令青出定襄郎中令李廣為前將軍太僕公

孫賀為左將軍主爵趙食其為右將軍食音異 其音基平陽

侯曹襄為後將軍皆屬大將軍趙信為單于謀曰漢

兵即度幕人馬罷罷讀 日疲匈奴可坐收虜耳廼悉遠北

其輜重者以精兵待幕北而適直青軍出塞千餘里

直讀 日值見單于兵陳而待於是青令武剛車自環為營

而縱五千騎往當匈奴匈奴亦從萬騎會日且入而

大風起沙礫擊面兩軍不相見漢益縱左右翼繞單

于單于視漢兵多而士馬尚彊戰而匈奴不利薄暮

單于遂乘六羸壯騎可數百直冒漢圍西北馳去冒 犯

也音莫 克切昏夜匈奴相紛拏殺傷大半漢軍左校捕虜

言單于未昏而去漢軍因發輕騎夜追之青因隨其

後匈奴兵亦散走會明行二百餘里不得單于頗捕

斬首虜萬餘級遂至寘顏山趙信城趙信降匈奴匈奴為築城居之

得匈奴積粟食軍食音嗣軍留一日而還悉燒其城餘

粟以歸青軍入塞凡斬首虜萬九千級青凡七出擊

匈奴斬捕首虜五萬餘級一與單于戰收河南地置

朔方郡其裨將及校尉侯者九人護軍都尉公孫敖

為合騎侯都尉韓說龍頗侯騎將軍公孫賀南窳侯

窳亦作卯音普教切輕車將軍李蔡樂安侯校尉李朔陟軹侯

趙不虞隨成侯公孫戎奴從平侯張騫博望侯上谷

太守郝賢眾利侯將軍李沮李息及校尉豆如意中

郎將綰皆有功賜爵關內侯

霍去病為票姚校尉票姚音飄搖一說票音類妙切姚音羊召切再從大

將軍與輕勇騎八百直棄大將軍數百里斬首捕虜

二千二十八級得相國當戶斬單于大父行籍若侯

產籍若胡侯也產名也此人單于祖父之行也行音胡良切捕李父羅姑比再冠

軍羅姑名也亦單于之季父也此音頻寐切廼以二千五百戶封去病為

冠軍侯元狩三年春以去病為驃騎將軍將萬騎出

隴西過焉耆山千餘里得胡首虜八千餘級得休屠

王祭天金人匈奴祭天處本在栗陽甘泉山下秦擊奪其地後徙之休屠王右地故休屠有祭天金人象也作金人以為天神之主而祭之今佛像是其遺法具夏驃騎將軍復

與合騎侯數萬騎出隴西北地二千里過居延祁連

山得胡首虜三萬餘級裨小王以下十餘人其後匈

將帥部

十三

奴渾邪王休屠王欲降漢武帝恐其詐乃令去病將兵往迎之去病將兵渡河渾邪裨王見漢兵多不欲降頗遁去去病馳入與渾邪王相見斬其欲亡者八千人先遣渾邪王詣行在去病盡將其眾渡河眾號十萬廼分處降者於邊五郡故塞外而皆在河南因其故俗為屬國乃以千七百戶益封去病四年大將軍衛青出定襄去病出代右北平二千餘里直左方兵也直當所斬捕功多於青以五千八百戶封去病去

病凡六出擊匈奴其四出以將軍再出為崇姚拔尉也斬首虜

十一萬餘級渾邪王以眾降數萬開河西酒泉之地

西方益少胡寇其較吏司馬趙破奴封從票侯較尉

高不識宐寇侯僕多輝渠侯輝音許韋切右北平太守路

博德邳離侯北地都尉衛山義陽侯匈奴歸義復陸

支復音芳日切杜侯伊即鞞音若言切眾利侯

趙食其以主爵都尉從大將軍斬首六百六十級元

狩三年賜爵關內侯

楊僕元鼎五年秋以主爵都尉為樓船將軍與伏波

將軍邳離侯路博德平南粵樓船將軍出豫章下橫

浦將精卒先陷尋陘破石門得粵船粟因推而前挫

粵鋒以粵數萬人待伏波將軍伏波將軍將罪人道

遠後期與樓船會廼有千餘人遂俱進樓船居前至  
番禺粵王建德與其相呂嘉皆城守樓煩自擇便處  
居東南面伏波居西北面會暮樓船攻敗粵人縱火  
燒城遲旦城中皆降伏波呂嘉建德以夜與其屬數  
百人亡入海伏波又問降者知嘉所之遣人追故騎  
較司馬蘇弘得建德粵郎都稽得嘉  
越中所置南粵也稽音雞  
平伏波將軍益封樓船將軍以摧鋒陷堅為將梁侯  
又封蘇弘為海嘗侯

韓說音悅元鼎六年秋以待詔為橫海將軍與樓船將

軍楊僕中尉王溫舒平東粵說出句章會稽之縣浮海從

東方在僕出武林溫舒出梅嶺元封元年冬咸入東

粵自兵未往故粵衍侯吳陽前在漢漢使歸諭東粵

王餘善不聽及橫海軍至陽以其邑七百人反攻粵

軍於漢陽及故粵建成侯敖與繇王居股謀俱殺粵

王餘善以其眾降橫海將軍為案道侯較尉劉福為

繇嬰侯繇音遼嬰音嬰

李廣利太初四年為貳師將軍擊大宛宛兵迎擊漢

兵漢兵射敗之宛兵入保其城攻之四十餘日宛貴

人殺其王毋寡毋寡宛王名殺漢使者故誅之廼出其馬令漢自擇

漢軍取其善馬數十匹中馬以下牝牡三千餘匹而

立宛貴人故時遇漢善者名昧察為宛王昧音未察音干曷切

貳師將軍之東出謂旋軍東出所過小國聞宛破皆使其

子弟從入貢獻因為質焉封廣利為海西侯食邑八

千戶初貳師起燉煌為人多道上國不能食起發也道上國

近道諸國也分為數軍從南北道較尉王申生故鴻

臚壺充國等千餘人別至郁成城守不肯給食申生

去大軍二百里負而輕之負恃也持大軍之威而輕敵人攻郁成急

郁成窺知申生軍少晨用二千人攻殺申生等數人

脫亡走貳師走音奏貳師令搜粟都尉上官桀往攻破

郁成郁成降其王亡走康居桀追至康居康居聞漢

已破宛出郁成王與桀桀令四騎士縛守詣大將軍

時多利將故謂二師為大將軍上邽騎士趙弟拔劍擊斬郁成王桀

等遂追及大將軍封趙弟為新時侯軍正趙始成功

最多為光祿大夫上官桀敢深入為少府李哆有計

謀為上黨太守多音君野切軍官吏為九卿者三人諸侯

相郡守二千石百餘人千石以下千餘人

范明友昭帝元鳳三年以中郎將為度遼將軍將二

萬騎出遼東擊烏桓斬首六千餘級獲三王首還封

為平陵侯

趙充國昭帝時以大將軍護軍都尉將兵擊武都反



氏音丁 奚切定之還為水衡都尉擊匈奴獲西祁王匈奴

宣帝本始中為蒲類將軍征匈奴斬虜數百級神爵

元年先零諸羌反充國以後將軍引兵至先零所在

虜久屯聚解池解亭解池放也望見大軍棄車重欲度湟水

重音直 用切道阨狹充國徐行驅之虜赴水溺死者數百

降及斬首五百餘人鹵馬牛羊十萬餘頭車四千餘

兩音諒又與彊弩將軍許壽擊西羌充國所降復將五

千餘人

嘗惠本始二年以光祿大夫使烏孫公主及昆彌皆

遣使因惠言匈奴連發大兵擊烏孫取車延惡師地

收其人民去使使脅求公主欲隔絕漢昆彌發國半

精兵自給人馬五萬騎盡力擊匈奴為天子出兵以

救公主昆彌於是漢大發十五萬騎五將軍分道出

五將軍謂祁連將軍田廣明蒲類將軍趙充國 武牙將軍田順度遼將軍范明友前將軍韓增以惠

為校尉持節護烏孫兵昆彌自將翎侯以下五萬餘

騎翎即翕字也翎侯烏孫官號也從西方入至右谷蠡庭谷音鹿 蠡音黎單

于父行及嫂居次匈奴女號若言公 王也行胡浪切名王騎將以下

三萬九千人得馬牛驢羸橐佗五萬餘匹羊六十餘

萬頭烏孫皆自取鹵獲

陳湯為西城副校尉與都護甘延壽破郅支單于斬

關氏太子名王以下千五百一十八級生虜百四十五人降虜千餘人

段會宗成帝時為左曹中郎將烏孫小昆彌末振將

其名也殺大昆彌會病死漢恨誅不加元延中遣會宗

發戍已校尉諸國兵即誅末振將太子番丘會宗恐

大兵入烏孫驚番丘亡逃不可得即留所發兵墊婁

地選精兵三千弩徑至昆彌所在召番丘責以末振

將骨肉相殺殺漢公主子孫未伏誅而死使者受詔

誅番丘即手劔擊殺番丘官屬以下驚恐馳歸天子

賜會宗爵關內侯

後漢鄧禹光武建武元年以大司徒與積弩將軍馮

愔驍騎將軍樊崇車騎將軍宗歆建威將軍鄧尋赤

眉將軍耿訢軍師將軍左于西討赤眉既渡汾陰河

入夏陽更始中郎將左輔都尉公乘歆引其眾十萬

與左馮翊兵共拒禹於衛禹復破走之

馮異建武二年以孟津將軍引擊陽翟賊嚴終趙根

破之時赤眉延岑暴亂三輔郡縣大姓各擁兵眾大

司徒鄧禹不能定乃遣異代禹討之所至皆布威信

弘農群盜稱將軍者十餘輩皆棄眾降異異與赤眉

遇于華陰相拒六十餘日戰數十合降其將劉始王

宣等凡五千餘人三年春拜異爲征西大將軍破赤  
眉於嶠底降男女百萬人餘衆尚十餘萬東走宜陽  
時延岑據藍田王歆據下邳芳丹據新豐芳作蔣震  
據霸陵張邛據長安公孫守據長陵楊周據谷口呂  
鮪據陳倉角閔據汧路蓋延據盩厔任良據槐里各  
稱將軍擁兵多者萬餘少者數千人轉相攻擊異且  
戰且行屯軍上林苑中延岑旣破赤眉自稱武安王  
拜置牧守欲據關中引張邛任良共攻異異擊破之  
斬首千餘級諸營保守附岑者皆來降歸異岑走攻  
析異遣復漢將軍鄧曄輔漢將軍于匡要擊岑大破  
之降其將蘇臣等八千餘人岑遂自武關走南陽異  
乃稍誅擊豪傑不從令者褒賞降附有功勞者悉遣  
其渠帥詣京師散其衆歸本業威行關中唯呂鮪張  
邛蔣震遣使降蜀其餘悉平明年公孫述遣將程焉  
將數萬人就呂鮪出屯陳倉異與右扶風趙匡迎擊  
大破之焉退走漢川異追戰於箕谷復破呂鮪營保  
降者甚衆其後蜀復數遣將間出異輒挫之六年朝  
京師是時諸將上隴爲隗囂所敗乃詔異軍徇邑未  
及至隗囂乘勝使其將王元行巡將二萬餘人下隴  
因分遣巡取徇邑異卽馳兵乘其不意卒擊鼓建旗

而出巡軍驚亂奔走追擊數十里大破之征虜將軍

祭遵亦破王元於汧於是使異進軍義渠北地并領縣名

北地太守事青山胡率萬餘人降異異又擊盧芳將

賈覽匈奴真鞬日逐王破之上郡安定皆降異復領

安定太守事九年春祭遵卒詔異守征虜將軍并將

其營及隗囂死其將王元周宗等復立囂子純猶摠

兵據冀公孫述遣將趙匡等救之帝復令異行天水

太守事攻匡等且一年皆斬之

岑彭建武二年行大將軍事擊荊州下犍葉等十餘

城是時南方尤亂南郡人秦豐據黎丘自稱楚黎王

畧十有二縣董訢起堵鄉許邲起杏南陽復陽縣有聚杏又更

始諸將各擁兵據南陽諸城彭破杏降訢邲遷征南

大將軍三年夏卷之三十四將南征至葉董訢別將數千

人遮道車騎不可得前彭奔擊大破之車駕既還令

彭率傅俊臧宮劉寵等三萬餘人南擊秦豐拔黃郵

豐與其大將蔡宏拒彭等於鄧數月不得進帝怪以

讓彭彭懼於是夜勒兵馬申令軍中使明旦西擊山

都乃緩所獲虜令得逃亡歸以告豐豐即悉其軍西

邀彭彭乃潛兵渡沔水擊其將張楊於阿頭山大破

之從川谷間伐木開道直襲黎丘擊破諸屯兵豐聞

大驚馳歸救之彭與諸將依東山為營豐與蔡宏夜

攻彭彭豫為之備出兵逆擊之豐敗走追斬蔡宏更

封彭為舞陰侯秦豐相趙京舉宣城降拜為成漢將

軍與彭共圍豐於黎丘時田戎擁眾夷陵

東觀記曰田戎西城

人與同郡人陳義客夷陵為羣盜更始元年義戎將

兵陷夷陵義自稱黎丘大將軍戎自稱歸地大將軍

襄陽者舊記曰戎號周成王義稱臨江王

而妻兄辛臣諫戎曰今四方豪傑各據郡國雒陽地

如掌耳不如按甲以觀其變戎曰以秦王之彊猶為

征南所圍豈况吾邪降計決矣四年春戎乃留辛臣

守夷陵自將兵沿江沂沔止黎丘刻期日當降而幸

臣於後盜戎珍寶從間道先降於彭而以書招戎戎

疑必賣已遂不敢降而反與秦豐合彭出兵攻戎數

月大破之其大將伍公詣彭降戎亡歸夷陵帝幸黎

丘勞軍封彭吏士有功者百餘人彭攻秦豐三歲斬

首九萬餘級豐餘兵裁千人又城中食且盡帝以豐

轉弱令朱祐代彭守之使彭與傅俊南擊田戎大破

之遂拔夷陵追至秭歸戎與數十騎亡入蜀盡獲其

妻子士眾數萬人十一年春彭與大司馬吳漢及誅

虜將軍劉隆輔威將軍臧宮驍騎將軍劉歆發南陽

武陵南郡兵又發桂陽零陵長沙委輸棹卒凡六萬

餘人

棹卒持棹行船者一作權音直教切

騎五千匹皆會荆門吳漢以

三郡棹卒多費糧穀欲罷之彭以爲蜀兵盛不可遣上書言狀帝報彭曰太司馬習用步騎不曉水戰荆門之事一繇征南公爲重而已彭乃令軍中募攻浮橋先登者上賞於是偏將軍魯奇應募而前時天風狂急彭奇船逆流而上直衝浮橋而攢柱鉤不得去奇等乘勢殊死戰因飛炬焚之風怒火盛橋樓摧燒彭復悉軍順風竝進所向無前蜀兵大亂溺死者數千人斬任滿生獲程汎而田戎亡保江州彭上劉隆爲南郡太守自率臧宮劉欽長驅入江關令軍中無得虜掠所過百姓皆奉牛酒迎勞彭見諸耆老爲言大漢哀愍巴蜀久見虜役故興師遠伐以討有罪爲人除害讓不受其牛酒百姓皆大悅爭開門降詔彭守益州牧所下郡輒行太守事彭到江州以田戎食多難卒拔留馮駿守之自引兵乘利直指墊江攻破平曲收其米數十萬石公孫述使其將延岑呂鮪王元及其弟恢悉兵拒廣漢及資中又遣將侯丹率二萬餘人拒黃石彭乃多張疑兵使護軍楊翕與臧宮拒延岑等自分兵浮江下還江州泝都江而上襲擊侯丹大破之因晨夜倍道兼行二千餘里徑拔武陽

使精騎馳廣都去成都數十里勢若風雨所至皆奔散

賈復建武元年以執金吾先渡河攻更始將朱鮪於  
維陽與白虎公陳僑戰連破降之二年與騎都尉陰  
識驍騎將軍劉植南度王社津擊更始郎王尹尊連  
破之月餘尊降盡定其地引東擊更始淮陽太守暴  
汎汎降屬郡悉定其秋南擊召陵新息平定之明年  
春遷左將軍別擊赤眉於新城澠池間連破之

吳漢爲太司馬以建武二年率太司空王梁建義大  
將軍朱祐大將軍杜茂執金吾賈復揚化將軍堅鐔

偏將軍王霸騎都尉劉隆馬武陰識共擊檀鄉賊於

鄴東漳水上大破之降者十餘萬人復率諸將擊鄴

西山賊黎伯卿等及河內脩武悉破諸屯聚復進兵

南陽擊宛涅陽鄗穰新野諸城皆下之引兵南與秦

豐戰黃郵水上破之又與偏將軍馮異擊昌城五樓

賊張文等又攻銅馬五幡於新安皆破之明年春率

建威大將軍耿弇虎牙大將軍蓋延擊青犢於軹西

大破降之明年又率陳俊及前將軍王梁擊五較賊

於臨平追至東郡箕山大破之北擊清河長直及平

原五里賊皆平之

長直一作長植在河南不得  
言北擊當是賊號或地名也時高

縣五姓共逐守長據城而反

高音革縣各屬平原郡五姓蓋當土疆宗豪右

也漢大破其衆因追討餘黨至無鹽

縣名屬東平

進擊勃

海皆平之又從征董憲圍朐城明年春拔朐斬憲東

方悉定十一年春率征南大將軍岑彭等伐公孫述

及彭破荆門長驅入江關漢留夷陵裝露橈船

橈短楫也

音人連切

將南陽兵及馳刑募士三萬人泝江而上會岑

彭為刺客所殺漢并將其軍十二年春與公孫述將

魏黨公孫永戰於魚涪津大破之十五年復率揚武

將軍馬成捕虜將軍馬武北擊匈奴徙鴈門代郡上

谷吏人六萬餘口置居庸嘗關以東十八年蜀郡守

將史歆反於成都自稱大司馬攻太守張穆穆踰城

走廣都歆遂移檄郡縣而宕渠楊偉胸聰徐容等起

兵各數千人以應之帝以歆昔為岑彭護軍曉習兵

事故遣漢率劉尚及大中大夫臧宮將萬餘人討之

漢入武都乃發廣漢巴蜀三郡兵圍成都百餘日城

破誅歆等漢乃乘桴沿江下巴郡楊偉徐容等惶恐

解散漢誅其渠帥二百餘人徙其黨與數百家於南

郡而還

蓋延建武二年以虎牙將軍南擊敖倉轉攻酸棗封

丘皆拔其夏督駙馬都尉馬武騎都尉劉隆護軍都



尉馬成偏將軍王霸等南伐劉永先攻拔襄邑進取

麻鄉

縣名故城在今陽山縣東北

遂圍劉永於淮陽數月盡收野

麥夜梯其城入永驚懼引兵走出東門延追擊大破

之永棄軍走譙延進攻拔薛斬其魯郡太守而彭城

扶陽杼秋蕭皆降又破永沛郡太守斬之永將蘇茂

佼彊周建等三萬餘人共攻延延與戰於沛西大破

之永軍亂遁沒溺死者大半永棄城走湖陵蘇茂奔

廣樂延遂定沛楚臨淮三年睢陽復反城迎劉永延

復率諸將圍之百日收其野穀永乏食突走延追擊

盡得輜重永為其將所殺永弟防舉城降四年春延

又擊蘇茂周建於斬進與董憲戰留下皆破之因率

平敵將軍龐萌攻西防拔之復追敗周建蘇茂於彭

城茂建亡奔後從征董憲於昌慮皆破平之六年春

遣屯長安九年隗囂死延西擊街泉略陽青水諸屯

聚皆定

陳俊建武五年以琅邪太守行大將軍事將兵擊董

憲於贛榆

贛榆縣名屬東海郡贛音貢

進破胸賊孫陽平之八年

張步畔還琅邪俊追討斬之帝美其功詔俊得專征

青徐

臧宮為騎都尉建武二年將突騎與征虜將軍祭遵

擊更始將左防韋顏於沮陽韋一作韓酈悉降之三年將  
 兵徇江夏擊代鄉鍾武竹里皆下之光武使大中  
 夫持節拜宮爲輔威將軍七年擊梁郡濟陰皆平之  
 十一年與諸將伐公孫述軍至平陽鄉蜀將王元舉  
 衆降進拔緜竹破涪城斬公孫述弟恢復攻繁郾前  
 後收得節五印綬千八百是時太司馬吳漢亦乘勝  
 進營逼成都宮連屠大城兵馬旌旗甚盛乃乘兵入  
 小雒郭門歷成都城下至吳漢營飲酒高會漢見之  
 甚歡謂宮曰將軍向者經虜城下震揚威靈風行電  
 照然窮寇難量還營願從他道矣宮不從復路而歸  
 賊亦不敢近之進軍成門與吳漢並滅公孫述

册府元龜  
 卷之三十四  
 立功一

册府元龜

巡按福建監察御史臣李嗣京 訂正

知甌窰縣事臣孫以敬叅閱

知建陽縣事臣黃國琦較釋

將帥部

立功第二

後漢耿弇建武初以建威大將軍與驃騎大將軍景丹彊弩將軍陳俊攻厭新賊於敖倉皆破降之三年延岑自武關出攻南陽下數城穰人杜弘率其眾以從岑弇與岑等戰於穰大破之斬首三千餘級生獲

其將士五千餘人得印綬三百杜弘降岑與數騎遁走東陽四年與建義大將軍朱祐漢忠將軍王常等擊望都故安西山賊十餘營皆破之五年與太司馬吳漢擊富平獲索賊於平原大破之降者四萬餘人因詔弇進討張步弇悉收集降卒結部曲置將吏率騎都尉劉歆泰山太守陳俊引兵而東從朝陽橋濟河以度朝陽縣名屬濟南郡攻祝阿臨淄皆拔之令軍中毋得妄掠劇下須張步至乃取之以激怒步步聞大笑曰以尤來大彤十餘萬衆吾皆卽其營而破之今大耿兵少於彼又皆疲勞何足摧乎乃與三弟藍弘壽及

故大槍渠帥董異等兵號二十萬至臨淄大城東將

攻弇弇先出淄水上與董異遇突騎欲縱弇恐挫其

鋒令步不敢進故示弱以盛其氣乃引歸小城陳兵

於內步氣盛直攻弇營與劉歆等合戰弇升王宮瓌

臺望之臨淄本齊國所都卽齊王宮中有瓌臺池視歆等鋒交乃自出精

兵以橫突步陳城下大破之飛矢中弇股以佩刀截

之左右無知者至暮罷弇明旦復勒兵出大戰自旦

及昏復大破之殺傷無數城中溝塹皆滿弇知步困

將退豫置左右翼爲伏以待之兩旁伏兵如鳥之翼人定時步

果引去伏兵起縱擊追至鉅脰水上鉅脰水名一名巨洋水在今青

州壽光縣西

八九十里僵尸相屬收得輜重三千餘兩步

還劇兄弟各分兵散去後數日車駕至臨淄自勞軍

弁因復追步步奔平壽乃肉袒負斧鑕於軍門弁傳

步詣行在所而勒兵人據其城樹十二郡旗鼓令步

兵各以郡人詣旗下眾尚十餘萬輜重七千餘兩皆

罷遣歸鄉里弁復引兵至城陽降五校餘黨齊地悉

平振旅還京師六年西拒隗囂屯兵於漆八年從上

隴明年與中郎將來歙分部狗安定北地諸營堡皆

下之弁凡所平郡四十六屠城三百未嘗挫折

姚期建武元年以魏郡太守行大將軍事擊更始將

卓京於鄴城破之斬首六百餘級京亡入山追斬其

將較數十人獲京妻子進擊檀鄉五較賊於繁陽內

黃復斬數百級

祭遵建武二年以征虜將軍與驃騎將軍景丹建義

大將軍朱祐漢忠將軍王常騎都尉王梁臧宮等入

箕關南擊弘農厭新伯華蠻中賊伯華聚名大破之時新

城蠻中山賊張滿新城縣名今伊關縣屯結險隘為人害詔遵

攻拔生獲之遵引兵南擊鄧奉弟終於杜衍破之杜衍

縣名屬南陽郡涿郡太守張豐執使者舉兵反自稱無上大將軍與彭寵連兵四年遵與朱祐及建威大將軍耿

弇驍騎將軍劉喜俱擊之遵兵先至急攻豐豐功曹

孟宏執豐降

左音古弘切

諸將皆引還遵受詔屯良鄉拒

彭寵因遣護軍傅玄襲擊寵將李豪於潞大破之斬

首千餘級相拒歲餘數挫其鋒黨與多降者及寵死

遵進定其地六年春光武遣諸將伐公孫述以遵為

前行隗囂使其將王元拒隴坻遵進擊破之追至西

關及諸將到與囂戰竝敗引退下隴乃詔遵軍沂耿

弇軍漆征西大將軍馮異軍柁邑大司馬吳漢等還

屯長安自是後遵數挫隗囂

耿純建武四年以東郡太守將兵擊更始東平太守

范荆荆降進擊泰山濟南及平原賊皆平之

朱祐建武三年以建義大將軍擊新野隨皆平之

隨縣

名屬南陽郡故城在今隨州隨縣

延岑自敗於穰遂與秦豐將張成

合祐率征虜將軍祭遵與戰於東陽大破之

東陽聚名在南

陽臨陣斬成延岑敗走歸豐祐收得印綬九十七進

擊黃郵降之四年率破姦將軍耿植代征南大將軍

岑彭圍秦豐於黎丘破其將張康於蔡陽斬之明年

夏城中窮困豐乃將其母妻子九人肉袒降祐祐還

與騎都尉臧宮會擊延岑餘黨陰鄣筑陽三縣賊悉

平之

建義大將軍朱祐執金吾賈復偏將軍馮異彊弩將軍

軍陳俊左曹王常騎都尉臧宮等從擊破五較於蕩

陽聚名降其眾五萬人

王梁建武二年以中郎將行執金吾事北守箕關擊

赤眉別較降之三年春轉擊五較追至信都趙國破

之悉平諸屯聚四年春擊肥城文陽拔之肥城縣名屬泰山郡

文音汶故城在堯州泗水縣西進與驃騎大將軍杜茂擊佼彊蘇茂

於楚沛間拔大梁齧桑縣名或曰城名而捕虜將軍馬武偏

將軍王霸亦分道竝進歲餘悉平之

杜茂建武二年以大將軍與中郎將王梁擊五校賊

於魏郡清河東郡悉平諸營堡降其持節大將三十

餘人三郡清靜明年以驃騎大將軍擊沛郡拔芒芒縣名復名臨睢

時西防復反迎佼彊五年春率捕虜將軍馬

武進攻西防數月拔之

馬成建武四年以揚武將軍督誅虜將軍劉隆振威

將軍宋登射聲較尉王常發會稽丹陽九江六安四

郡兵擊李憲圍憲於舒歲餘城中食盡乃攻之遂屠

舒斬李憲追擊其黨與盡平江淮地九年代來歙守

中郎將率武威將軍劉尚等破河池遂平武都河池今鳳

將帥部

將帥部

將帥部

將帥部

州縣一  
名九池

劉隆建武四年以誅虜將軍討李憲平之十七年以

中郎將副伏波將軍馬援擊交趾蠻夷徵側等隆別

於禁谿口破之

交趾郡麓泠縣有金溪穴相傳音訛謂之禁溪側等所敗處也其地今岑

州新昌縣也麓音鹿泠音零

獲其帥徵貳

徵側之妹

斬首千餘級降者

二萬餘人

傅俊建武三年以積弩將軍與征南大將軍岑彭擊

破秦豐因將兵徇江東楊州悉定

堅鐔建武元年以揚化將軍與諸將攻雒陽而朱鮪

別將守東城者為反間私約鐔晨開上東門

之東門雒陽故

城東面北頭第一門

鐔與建義大將軍朱祐乘朝而入與鮪大

戰武庫下

雒陽建始殿東有六倉倉東有武庫藏兵之所

殺傷甚衆至旦食

乃罷朱鮪繇是遂降又別擊內黃平之

馬武建武四年以騎都尉與虎牙將軍蓋延等討劉

永武別擊濟陰下成武楚丘拜捕虜將軍明年雁門

反攻桃城武先與戰破之

李通建武六年以前將軍領破姦將軍侯進捕虜將

軍王霸等十營擊漢中賊公孫述遣兵救通等與戰

於西城破之

王常建武二年以漢忠將軍北擊河間漁陽平諸屯



聚五年秋攻拔湖陵又別率騎都尉王霸共平

賊苗虛也七年為橫野大將軍別擊破隗囂將高峻於

朝那縣名屬安定郡囂遣將邊烏氏常要擊破之轉降保塞

羌諸營壁皆平之九年擊內黃賊破之

來歙建武八年以中郎將與征虜將軍祭遵襲隗囂

之略陽遵道病還分精兵隨歙合二千餘人伐山開

道從番須回中番音船番須回中並地名徑至略陽徑直也斬隗囂

守將金梁因保其城及隗囂平詔歙率征西大將軍

馮異建威大將軍耿弇虎牙大將軍蓋延揚威將軍

馬成武威將軍劉尚入天水擊破公孫述將田弇

匡明年攻拔落門聚名隗囂之黨周宗趙恢及天水屬

縣皆降歙又率蓋延劉尚及大中大夫馬援等進擊

羌於金城大破之斬首虜數千人獲牛羊萬餘頭穀

數十萬斛

竇融建武六年以河西大將軍率諸郡守將兵入金

城初更始時先零羌封何諸種殺金城太守居其郡

隗囂使使賂遺封何與共結盟欲發其眾融等因軍

出進擊封何大破之斬首千餘級得牛馬羊萬頭穀

數萬斛因並河揚威武音蒲浪切同候車駕時大兵未

進融乃引還

將帥部

王霸建武八年以討虜將軍屯函谷關擊滎陽中牟盜賊皆平之十年與吳漢等四將軍六萬人出高柳擊賈覽詔霸與漁陽太守陳訢將兵爲諸軍鋒匈奴左南將軍將數千騎救覽霸等連戰於平城下破之追出塞斬首數百級

張宗爲大中大夫建武八年潁川桑中盜賊羣起宗將郡兵擊定之後青冀盜賊屯聚山澤宗以謁者督諸郡兵討平之十六年琅邪北海盜賊復起宗督二郡兵討之乃設方略明購賞皆悉破散於是沛楚東海臨淮郡賊懼其威武相捕斬者數千人青徐震慄

劉尚建武九年以武威將軍從征西大將軍馮異入天水擊公孫述將田弇等明年與中郎將來歙擊羗於金城大破之十八年夷渠帥棟蠶與姑復牒榆楨棟連然滇池建伶昆明諸種反叛殺長吏益州太守繁勝與戰而敗退保朱提十九年遣尚發廣漢犍爲蜀郡人及朱提夷合萬三千人擊之尚軍遂度瀘水入益州界群夷聞大兵至皆棄壘奔尚獲其羸弱穀畜二十年進兵與棟蠶等連戰數月皆破之明年正月追至不韋斬棟蠶帥凡首虜七千餘人得生口五千七百人馬三千匹牛羊三萬餘頭諸夷悉平

馬援建武十一年以隴西太守發步騎三千人擊破先零羗於臨洮斬首數百級獲馬牛羊萬餘頭守塞諸羗八千餘人詣援降諸種有數萬屯聚寇鈔拒浩壘隘援與揚武將軍馬成擊之羗因將其妻子輜重移阻於允吾谷援乃潛行間道掩赴其營羗大驚潰復遠徙唐翼谷口援復追討之羗引精兵聚北山上援陳軍向山而分遣數百騎繞襲其後乘夜放火擊鼓叫譟虜遂大潰凡斬首千餘級援以兵少不得窮追收其穀糧畜產而還十三年武都三狼羗與塞外諸種爲寇殺長吏援將四千餘人擊之至氐道縣羗在山援軍據便地奪其水草不與戰羗遂窮困豪帥數十萬戶亡出塞諸種萬餘人悉降於是隴右清靜十七年交趾女子徵側及女弟徵貳反攻沒其郡九真日南合浦蠻夷皆應之寇略嶺外六十餘城側自立爲王於是璽書拜援伏波將軍以扶樂侯劉隆爲副督樓船將軍段志等南擊交趾軍至合浦而志病卒詔援并將其兵遂緣海而進隨山刊道千餘里刊除也十八年春軍至浪泊上與賊戰破之斬首數千級降者萬餘人援追徵側等至禁谿數敗之賊遂散走明年正月斬徵側徵貳傳首洛陽又將樓船大小二

千餘艘戰士二萬餘人進擊九真賊徵側餘黨都羊

等自無功至居風

無功居風二縣並屬九真郡居風今受州

斬獲五千餘

人嶠南悉平

援至交趾立銅柱為漢之極界也

二十五年春擊武陵

五溪蠻夷至臨鄉

屬武陵

遇賊攻縣援迎擊破之斬獲

二千餘人皆散走入竹林中

實固明帝永平十五年以奉車都尉與騎都尉耿忠

屯涼州明年固與忠率酒泉敦煌張掖甲卒及盧水

羌胡萬二千騎出酒泉塞至天山

即祁連山也在西州交河縣東

呼衍王斬首千餘級呼衍王走追至蒲類海

今名婆悉海在

定州蒲昌明年復出玉門擊西域固遂破白山降車

師

耿秉永平十七年以駙馬都尉與奉車都尉實固合

兵萬四千騎出白山擊車師後王縱兵抄掠斬首數

千級收馬牛十餘萬頭後王安得震怖從數百騎出

迎秉其前王亦歸命遂定車師而還章和二年以征

西將軍副車騎將軍實憲擊北匈奴大破之封美陽

侯

馬防為城門較尉章帝建初二年金城隴西保塞羌

皆反拜防行車騎將軍事以長水較尉耿恭副將北

軍五較兵及諸郡積射士三萬人擊之軍到冀而羌

豪布矯等圍南部都尉於臨洮防欲救之臨洮道險  
 車騎不得方駕防乃別使兩司馬將數百騎分爲前  
 後軍去臨洮十餘里爲大營多樹幡幟揚言大兵旦  
 當進羌候見之馳還言漢兵盛不可當明旦遂鼓譟  
 而前羌虜驚走因追擊破之斬首虜四千餘人遂解  
 臨洮圍防開以恩信燒當種皆降唯布矯等三萬餘  
 人在臨洮西南望曲谷十二月羌又敗耿恭司馬及  
 隴西長史於和羅谷死者數百人明年春防遣司馬  
 夏駿將五千人從大道向其前潛遣司馬馬彭將五  
 千人從間道衝其心腹又令將兵長史李調等將四

千人繞其西三道俱擊復破之斬獲千餘人得牛羊

十餘萬頭羌退走夏駿追之反爲所敗防乃引兵與

戰於索西又破之

索西縣名在岷州和政縣東亦名臨洮東城

布矯迫急

將種人萬餘降還拜車騎將軍

班超建初八年以將兵長史假鼓吹幢麾鎮西域

鼓吹

幢麾皆大將所有

超非大將故云假後四年超發于寘諸國兵二萬五

千人擊莎車追斬五千餘級大獲其馬畜財物莎車

遂降威震西域永元三年以超爲都護六年秋超遂

發龜茲鄯善等八國兵合七萬人及吏士賈客千四

百人討焉耆焉耆王廣尉黎王汎及北鞬支等三千

人詣超降超收廣汎等於陳睦故城斬之傳首京師  
因縱兵抄掠斬首五千餘級獲生口萬五千人馬畜  
牛羊三十餘萬頭更立右侯元孟為焉耆王超留焉  
耆半歲慰撫之於是西域五十餘國悉皆納貢內屬  
焉明年封超為定遠侯邑千戶

張紆章和元年以隴西太守代傅育為護羌校尉將  
萬人屯臨羌是時迷吾既殺傅育徃伏邊利復與諸  
種步騎七千人入金城塞紆遣從事司馬防將千餘  
騎及金城兵會戰於大乘谷迷吾兵敗走因譯使欲  
降紆納之遂將衆人詣臨羌縣紆設兵大會施毒酒

中羌飲醉紆因自擊伏兵起誅殺酋豪八百餘人斬  
迷吾等五人頭以祭冢復故兵擊在山谷間者斬  
首四百餘級得生口二千餘人

寶憲和帝永元元年以車騎將軍與執金吾耿秉各  
將四千騎及南匈奴左谷蠡王師子師子其名萬騎出朔

方鷄鹿塞南單于屯屠河屯屠河單于名將萬餘騎出滿夷

谷度遼將軍鄧鴻禹少子及綠邊義從羌胡八千騎與

左賢王安國萬騎出柘陽塞柘音固在皆會涿邪山

憲分遣副校尉閻盤司馬耿譚耿夔將左谷蠡王師

子右呼衍王須訾等今呼延姓是其後須訾名也精騎萬餘與北

單于戰於稽落山大破之虜眾奔潰單于遯走追擊

諸部遂臨私渠北鞬海匈奴繇海名也斬名王已下萬三千

級獲生口馬牛羊橐駝百餘萬頭於是温犢須日逐

温吾夫渠王柳鞬等八十一部率眾降者前後二十

餘萬憲與耿秉遂登燕然山刻石勒功而還詔拜憲

大將軍

耿夔永元三年以大將軍左校尉將精騎八百出居

延塞直奔北單于庭于金微山斬闕氏名王已下五

千餘級單于與數騎脫亡盡獲其匈奴珍寶財畜去

塞五千餘里而還自漢出師所未嘗至也乃封夔粟

邑侯故城在今同州白水西北永初三年南單于檀反畔夔以遼

東太守率鮮卑及諸郡兵屯鴈門與車騎將軍何熙

共擊之熙推夔為先鋒而遣其司馬耿溥劉祉將二

千人與夔俱進到屬國故城單于遣奠鞬日逐王三

千餘人遮漢兵夔自擊其左令鮮卑攻其右虜遂敗

走追斬千餘級殺其名王六人獲穹廬車重千餘兩

馬畜生口甚眾

梁懂殤帝延平元年以西域副校尉行至河西會西

域諸國反叛攻都護任尙於疏勒尙上書求救詔懂

將河西四郡羌胡五千騎馳赴之懂未至而尙已得

丹元 立功二

解會徵尚還以騎都尉段禧為都護西域長史趙博為騎都尉禧博守它乾城它乾城小懂以為不可固乃請說龜茲王白霸欲入共保其城白霸許之吏人固諫白霸不聽懂既入遣將急迎禧博合軍八九千人龜茲吏人竝叛其王而與温宿姑墨數萬兵反共圍城懂等出戰大破之連兵數月胡眾敗走乘勝追擊凡斬首萬餘級獲生口數千人駱駝畜產數萬頭龜茲乃定二年春還至燉煌會眾羗反叛朝廷大發兵西擊之逆詔懂留為諸軍援懂至張掖日勒羗諸種萬餘人攻亭侯殺畧吏人懂進兵擊大破之乘勝

追至昭武虜遂散走其能脫者十二三及至姑臧羗

大豪三百餘人詣懂降竝慰譬遣還故地河西郡復

安懂受詔當屯金城聞羗轉寇三輔迫近園陵即引

兵赴擊之轉戰武功美陽關

縣名在武功縣北

懂臨陣被創

不願連破走之盡還得所掠生口獲馬畜財物甚眾

羗遂奔散朝廷嘉之數璽書勞勉委以西方事令為

諸軍節度三年詔懂行度遼將軍事與中郎將龐雍

共擊匈奴真鞬日逐王破之

鄧遵為度遼將軍安帝元初六年秋鮮卑入馬城塞

殺長吏遵發積射士三千人及中郎將馬續率南軍

冊守元 將帥部 十四



于與遼西右北平兵馬會出塞追擊鮮卑大破之獲生口及牛羊財物甚衆

馬賢為護羌校尉永寧元年上郡沈氏種羌五千餘

人復寇張掖賢與戰破之斬首千八百級獲生口千

餘人牛馬羊以萬數餘虜悉降時當前煎種大豪飢五

等以賢兵在張掖乃乘虛寇金城賢還軍追之出塞

斬首數千級而還燒當燒何種聞賢軍還率二千餘

人復寇張掖殺長吏初飢五同種大豪盧忽忍良等

千餘戶別留允而首施首施猶首鼠也兩端建光元年春賢

率兵召盧忽斬之因放兵擊其種人首虜二千餘人

掠馬牛羊十萬頭忍良等皆亡出塞璽書封賢安亭

侯食邑千戶陽嘉三年種羌良封等寇隴西漢陽詔

拜賢為謁者鎮撫諸種較尉馬續遣兵擊良封斬首

千八百級獲馬牛羊五萬餘頭良封親屬竝詣賢降

賢復進擊羌且呂且呂等率諸種十餘萬詣涼州刺

史降

班勇延光二年以西域長史將兵五百人出屯柳中

明年正月勇至樓蘭以鄯善歸附特加三綬而龜茲

王白英猶自疑未下勇開以恩信白英乃率姑墨温

宿自縛詣勇降勇因發其兵步騎萬餘人到車師王

前庭擊走匈奴伊蠡王於伊和谷收得前部五千餘

人於是前部始復開通還屯田柳中四年秋勇發敦

煌張掖酒泉六千騎及鄯善疏勒車師前部兵擊後

部王軍就

軍就名也

大破之首虜八千餘人馬畜五萬餘

頭捕得軍就及匈奴持節使者將至索班沒處斬之

以報其恥

元初六年敦煌太守曹宗遣長史索班將千餘人屯伊吾數月北單于與車師後部

攻沒班

傳首京師永建元年更立後部故王子加特奴

為王勇又使別較誅斬東且彌王亦更立其種人為

王

且音子余反

於是車師六國悉平其冬勇發諸國兵擊

匈奴呼衍王呼衍王亡走其眾二萬餘人皆降捕得

單于從兄勇使加特奴手斬之以結車師匈奴之隙

北單于自將萬餘騎入後部至金且谷勇使假司馬

曹俊馳救之單于引去俊追斬其貴人骨都侯於是

呼衍王遂徙居梧河上是後車師無復虜跡城郭皆

安

耿臯為烏桓較尉順帝永建二年遼東鮮卑六千餘

騎寇遼東玄菟畢發緣邊諸郡兵及烏桓率眾王出

塞擊之斬首數百級大獲其生口牛馬什物鮮卑乃

率種眾三萬人詣遼東乞降

張奐桓帝永壽元年為屬國都尉初到職而南匈奴

左莫鞬臺者且渠伯德等七千餘人寇美稷東羗復  
 舉種應之與進屯長城收集兵士遣將王衛招誘東  
 羗據龜茲共擊莫鞬等連戰破之伯德惶恐將其衆  
 降郡界以寧延熹元年鮮卑寇邊與率南單于擊之  
 斬首數百級後為度遼將軍數載間幽并清靜九年  
 春徵拜大司農鮮卑聞與去遂招結南匈奴烏桓數  
 道入塞或五六千騎或三四千騎寇掠緣邊九郡殺  
 畧百姓秋鮮卑復率八九千騎入塞誘引東羗與共  
 盟詛於是上郡沈氏安定先零諸種共寇武威張掖  
 緣邊大被其毒朝廷以為憂復拜與為護匈奴中郎

將以九卿秩督幽并涼三州及度遼烏桓二營

明帝置度

遼將軍屯五原曼相縣漢官人烏桓較尉也名寧之故曰二營

兼察刺史二千石能

否賞賜甚厚匈奴烏桓聞與至因相率還降凡二十  
 萬口與但誅其首惡餘皆慰納之唯鮮卑出塞去永  
 康元年春東羗先零五六千騎寇關中圍殺翊掠雲  
 陽夏復攻沒兩營殺千餘人冬羗岸尾麾螿等  
 反脅同種復鈔三輔與遣司馬尹端董卓並擊大破  
 之斬其首豪首虜萬餘人三州清定

螿音必薛

段熲字紀明永壽二年以中郎將擊琅邪賊東郭寶  
 公孫舉等三萬人大破斬之獲首萬餘級餘黨皆降

散封紀明為列侯延熹二年遷護羌較尉會燒當燒

何當煎勒姐等八種羌姐紫寇隴西金城塞紀明將

兵及湟中義從羌萬二千騎出湟谷擊破之追討南

度河使軍吏田晏夏育募先登懸索相引復戰於羅

亭大破之斬其酋豪以下二千級獲生口萬餘人虜

皆奔走明年春餘羌復與燒何大豪寇張掖攻沒鉅

鹿場殺屬國吏民又招同種千餘落并兵晨奔紀明

軍紀明下馬大戰至日中刀折矢盡虜亦引退紀明

追之且鬪且行晝夜相攻割肉食雪四十餘日遂至

河首積石山出塞二千餘里斬燒何大帥首虜五千

餘人又分兵擊石城羌斬首溺死者千六百人燒當

種九千餘口詣紀明降又雜種羌屯聚白石紀明復

進擊首虜三千餘人冬勒姐零吾種圍允街殺畧吏

民紀明排營救之斬獲數百人五年遷并州刺史滇

郡等諸種羌五六千人寇武威張掖酒泉燒人廬舍

六年寇勢轉盛涼州幾亡冬復以紀明為護羌較尉

秉鐸之職七年春羌封僂良多滇那等僂良遂反酋

豪三百五十六人率三千落詣紀明降當煎勒姐種

猶自屯結冬紀明將萬餘人擊破之斬其酋豪首虜

四千餘人八年春復擊勒姐種斬首四百餘級降者

二千餘人夏進軍擊當煎種於湟中紀明兵敗被圍  
 三日用隱士樊志張策潛師夜出鳴鼓還戰大破之  
 首虜數千人紀明遂窮追展轉山谷間自春及秋無  
 日不戰虜遂飢困敗散北畧武威間紀明凡破西羌  
 斬首二萬三千級獲生口數萬人馬牛羊八百萬頭  
 降者萬餘落封紀明都鄉侯邑五百戶永康元年當  
 煎諸種復反合四千餘人欲攻武威紀明復追擊於  
 鸞鳥大破之殺其渠帥斬首三千餘級西羌於此弭  
 定建寧元年春紀明將兵萬餘人齎十五日糧從彭  
 陽直指高平與先零諸種戰於逢義山虜兵盛紀明

象恐乃令軍中張鏃利刃長矛三種挾以彊弩列輕  
 騎為左右翼激怒兵將曰今去家數千里進則事成  
 走必盡死努力共功名因大呼衆皆應聲騰赴紀明  
 馳騎於傍突而擊之虜衆大潰斬首八千餘級獲馬  
 牛羊二十八萬頭夏紀明復追羌出橋門谷門至走馬  
 水上尋聞虜在奢延澤即上延縣乃將輕兵兼行一

日一夜二百餘里晨及賊擊破之餘虜走向落川復  
 相屯結紀明乃分遣騎司馬田晏將五千人出其東  
 假司馬夏育將二千繞其西羌分六七千人攻圍晏  
 等與戰羌潰走紀明急進與晏等共追之於今鮮水

上水名在其州士卒飢渴乃勒衆推方奪其水推方謂才

進也頭競虜復走紀明遂與相連綴且鬪且引及於靈武

谷靈武縣名有谷紀明乃被甲先登士卒無敢後者羗遂大

敗棄兵而走追之三日三夜士皆重繭繭足下傷既起形如繭

到涇陽餘寇四千落悉散入漢陽山谷間二年詔遣

謁者馮禪說降漢陽散羗紀明以春農百姓布野羗

雖暫降而縣官無廩必當復為盜賊不如乘虛放兵

勢必殄滅夏紀明自進營去羗所屯凡亭山四十五

里遣田晏夏育將五千人據其山上羗悉衆攻之厲

聲曰田晏夏育在此湟中義從羗悉在河西今日欲

決死生軍中恐晏等勸激兵士殊死大戰遂破之羗

衆潰東奔復聚射虎谷分兵守諸谷上下門紀明規

一舉滅之不欲復令散走乃遣千人於西縣結木為

柵廣二十步長四十里遮之西縣屬天水郡分遣晏育等將

七千人銜枚夜上西山結營穿塹去虜一里許又遣

司馬張愷等將三千人上東山虜乃覺之遂攻晏等

分遮汲水道紀明自率步騎進擊水上羗却走因與

愷等挾東西山縱兵擊破之羗復敗紀明追至谷上

下門窮山深谷之中處處破之斬其渠帥以下萬九

千級獲牛馬騾驢氊裘廬帳什物不可勝數馮禪等

所招降四千人分置安定漢陽隴西三郡於是東羌悉平凡百八十戰斬三萬八千六百餘級獲牛馬羊騾驢駱駝四十二萬七千五百餘頭費用四十四億軍士死者四百餘人更封新豐縣侯邑萬戶

皇甫規延熹四年以中郎將持節監關西兵討叛羌零吾等破之斬首八百級先零諸種羌慕規威信相觀降者十餘萬

皇甫嵩靈帝中平元年以左中郎將持節與右中郎將朱雋共發五較三河騎士及募精兵四萬人嵩雋各統一軍共討潁川黃巾大破之斬首數萬級封嵩

都鄉侯嵩雋乘勝進討汝南陳國黃巾追波才於陽翟擊彭脫於西華竝破之餘賊降散三郡悉平又進擊東郡黃巾卜巳於倉亭生禽卜巳斬首七萬餘級是時北中郎將盧植東中郎將董卓討張角竝無功而還乃詔嵩進兵討之嵩與張角弟梁戰於廣宗

州字

梁衆精勇嵩不能尅明日乃閉營休士以觀其

變知賊意稍懈乃潛夜勒兵雞鳴馳赴其陳戰至晡時大破之斬梁獲首三萬級赴河死者五萬許人焚車重三萬餘兩悉虜其婦子擊獲甚衆角先已病死乃剖棺戮屍傳首京師嵩復與鉅鹿太守馮翊郭回

攻角弟寶於下曲陽又斬之斬獲十餘萬人築京觀於城南卽拜嵩為左車騎將軍領冀州牧封槐里侯百姓歌曰天下亂今市為墟母不保子今妻失夫賴得皇甫今復安居

朱雋中平元年以右中郎將持節與左中郎將皇甫嵩討潁川汝南陳國諸賊悉破平之封西鄉侯遷鎮賊中郎擊南陽黃巾趙引于宛斬之賊餘帥韓忠復據宛雋又擊大破之乘勝逐北數十里斬首萬餘級忠等遂降而南陽太守秦頡積忿忠遂殺之餘眾懷不自安復以孫夏為帥還屯宛中雋急攻之夏走追

至西鄂精山又破之

西鄂故城在鄧州向城縣南精山在其南

復斬萬餘

級賊遂解散明年使者持節拜雋右車騎將軍

公孫瓚中平中以遼東屬國長史督烏桓突騎將軍

張溫討涼州賊會烏桓反畔與賊張純等攻擊薊中

瓚率所領追討純等有功累遷騎都尉降虜較尉初

平二年青徐黃巾三十萬眾入勃海界欲與黑山合

瓚率步騎二萬人擊於東光南大破之斬首三萬餘

級賊棄其車重數萬兩奔走渡河瓚因半濟薄之賊

復大破死者數萬流血丹水收得生口七萬餘人車

甲財物不可勝筭威名大震拜奮武將軍封薊侯



魏龐德漢建安中以較尉從馬騰征伐太祖討袁譚於黎陽譚遣郭援高幹等畧取河東太祖使鍾繇率關中諸將討之德隨騰子超拒援幹於平陽德為軍鋒進攻援幹大破之親斬援首拜中郎將封都亭侯後張白騎叛于弘農德復隨騰征之破白騎於兩穀間後為立義將軍封關門亭侯音衛開等以宛叛德將所領與曹仁共攻拔宛斬之郭淮漢延康元年行征羌護軍左將軍張郃冠軍將軍楊秋討山賊鄭甘盧水叛胡皆破平之關中乃定民得安業黃初五年為真安定羌大帥辟蹠反討破

降之

滿寵延康元年以揚武將軍破吳於江陵有功更拜伏波將軍

樂進為陷陣都尉從擊呂布於濮陽張超於雍丘橋隄於苦皆先登有功封廣昌亭侯文聘黃初元年以討逆將軍假節與夏侯尚圍江陵使聘別屯沔口止石梵自當一隊禦賊有功遷後將軍封新野侯孫權以五萬衆自圍聘于石陽甚急聘堅守不動權住二十餘日乃解去聘追擊破之田豫為護烏丸較尉山賊高艾衆數千人寇鈔為幽

冀害豫誘使鮮卑素利部斬艾傳首京都封豫長樂亭侯加殄夷將軍太和六年帥衆討吳將周賀於成山遂殺賀

夏侯尚黃初三年爲征南將軍領荊州刺史時車駕幸宛使尚率諸軍與曹真共圍江夏吳將諸葛瑾與尚軍對江瑾渡入江中潛而分水軍于江中尚夜多持油船將步騎萬餘人於下涉潛渡攻瑾諸軍夾江燒其舟船水陸並攻破之

王陵黃初中以兗州刺史與張遼等至廣陵討吳臨江夜大風吳將呂範等船漂至北岸陵與諸將逆擊捕斬首虜獲舟船有功正始初爲征東將軍假節鉞都督揚州諸軍事二年吳大將全琮數萬衆寇芍陂陵率諸軍逆討與賊爭牛塘力戰連日賊退走進封南鄉侯

張邨明帝卽位初以左將軍南屯荊州與司馬宣王擊吳別將劉阿等追至祁口交戰破之諸葛亮出祁山加邨位特進遣督諸軍拒亮將馬謖於街亭謖依山阻南山不下據城邨絕其汲道擊大破之南安天水安定郡反應亮邨皆破平之

又破隴西名羌唐阨於抱罕加建威將軍

徐邈明帝時爲護羌校尉蜀相諸葛亮出祁山隴右

三郡反邈輒遣參軍及金城太守等擊南安賊破之以討叛羌柯吾有功封都亭侯

母丘儉青龍中以度遼將軍隨司馬宣王卒數萬討公孫淵定遼東以功進封安邑侯正始中儉以高句驪數侵叛督諸軍事步騎萬人出玄菟從諸道討之句驪王宮將步騎二萬人進軍沸流水上大戰梁口

梁音過

宮連破走儉遂東馬懸車以登先都屠句驪所

都斬獲首虜以千數宮將妻子逃竄奔沃沮六年復進師擊之沃沮邑落皆破之斬獲首虜以千餘級宮奔北沃沮

王昶齊王嘉平二年以征南將軍詣江陵兩岸引竹緮爲橋渡水擊吳賊賊奔兩岸鑿七道竝來攻於是昶使積弩同時俱發賊大將施績夜遁入江陵城追斬數百級遷征南大將軍

王基嘉平二年以揚烈將軍荊州刺史隨征南王昶擊吳基別襲步協於夷陵協閉門自守基示以攻形而實分兵取雄父即間收米三十餘萬解虜安北將軍譚正納降數千口賜爵關內侯

鄧艾高貴鄉公甘露二年以鎮西將軍都督隴右諸軍事拒蜀將姜維於長城維退還遷征西將軍景元

三年又破維於侯和維却保沓中四年秋詔諸軍在蜀大將軍司馬文王皆指授節度使艾與維相綴連雍州刺史諸葛緒要維令不得歸艾遣天水太守王頎等直攻維營隴西太守牽弘等邀其前金城太守楊欣等詣甘松維聞鍾會諸軍已入漢中引退還欣等追躡於強川口大戰維敗走聞雍州已塞道屯橋頭從孔函谷入北道欲出雍州後諸葛緒聞之却還三十里維入北道三十餘里聞緒軍却尋還從橋頭過緒趨截維較一日不及維遂東引還守劔閣冬十月艾自陰平道行無入之地七百餘里鑿山通道造作橋閣山高谷深至爲艱險又糧運將匱頻于危殆艾以氍自裹推轉而下將士皆攀木緣崖魚貫而進先登至江油蜀守將馬邈降蜀衛將軍諸葛瞻自治還縣竹列陣待艾艾遣子惠唐亭侯忠等出其右司馬師纂等出其左忠纂戰不利竝退還曰賊不可擊艾怒曰存亡之分在此一舉何不可之有乃叱忠纂出將斬之忠纂馳還更戰大破之斬瞻及尚書張遵等首進軍到雒劉禪遣使奉皇帝璽綬爲箋詣艾請降詔以艾爲太尉增邑二萬戶

鍾會陳留王景元四年以鎮西將軍統十萬衆攻蜀

兵至劍閣時鄧艾追姜維到陰平簡選精銳欲從漢德陽入江油左僖道詣縣竹趣成都與諸葛緒共行緒以奉授節度邀姜維西行非本詔遂進軍前向白水與會合會遣將軍田章等從劍閣西徑出江油未至百里章先破蜀伏兵三較艾使章先登遂長驅而前劉禪詣艾降蜀皆平

蜀諸葛亮後主建興三年春以丞相領益州牧率衆征南中諸郡其秋悉平遂至滇池皆卽其渠帥而用之六年冬出散關圍陳倉魏將曹真拒之亮糧盡而還魏將王雙率騎追亮亮與戰破之斬雙七年亮還陳式攻武都陰平魏雍州刺史郭淮率衆欲擊式亮自出至建威淮退還遂平二郡

李恢爲庾降都督建興三年丞相諸葛亮南征恢與亮聲勢相連南土平定恢軍功居多封漢興亭侯加安漢將軍還南夷復叛殺害守將恢身往撲討鋌盡惡類徙其豪帥於成都

張嶷建興五年以都尉將兵討廣漢縣竹山賊張慕等嶷身率左右因斬慕等五十餘級渠賊悉殄尋其餘類旬日清泰其後爲牙門將受兵三百人隨馬忠討叛羗至他邑里或迎軍出降或奔竄山谷放兵攻

擊軍以克捷十一年南夷劉胃反馬忠督庾降討胃  
疑復屬馬忠遂斬胃平南專訖牂牁與古獠種復反  
忠令疑領諸營往討疑內招降得二千人悉詣漢中  
魏延建興八年以丞相司馬領涼州刺史時諸葛亮  
使延西入羌中魏後將軍費瑤雍州刺史郭淮與延  
戰于陽谿大破淮等遷爲前軍征西大將軍假節進  
封南鄭侯

馬忠建興十一年代張翼爲庾降都督討南夷豪帥  
劉胃斬之平南土遷奮威將軍封博陽亭侯先是建  
寧寧殺太守王昂縛太守張裔於吳故都督常駐平  
夷縣至忠乃移治味縣處民夷之間又越嶲郡亦久  
失土地忠率太守張疑開復舊郡繇此就加安南將  
軍封彭鄉亭侯

王平建興十二年以討虜將軍領丞相諸葛亮參軍  
統五部事亮卒於武功軍退還征西大將軍魏延作  
亂一戰而敗平之功也

姜維延熹十年以衛將軍率衆討汶山平康夷定之  
十七年加都督中外諸軍事復出隴西守狄道長李  
簡舉城降進圍襄武與魏將徐質交鋒斬首破敵魏  
軍敗退維乘勝多所降下拔河間狄道臨洮三縣民

十八年復與車騎將軍夏侯霸等俱出狄道大破魏雍州刺史王經於洮西經衆死者數萬人

霍弋景曜六年爲安南將軍于時蜀并於魏弋遂降拜南中都督委以本任後遣將兵救援呂興平交趾

日南九真三郡功封列侯

吳朱然爲臨川太守授兵二千人會山賊盛起然平

討旬月而定漢建安二十四年從大帝討關羽別與

潘璋到臨沮禽羽遷昭武將軍黃武元年劉備攻空

都然別攻破備前鋒斷其後道備遂破走赤烏九年

以車騎將軍右護軍復征魏祖中祖音租在上黃界去襄陽一百五十

魏將李典善聞然深入率步騎六千斷然後道然夜出逆之軍以勝返

呂據黃龍初以安軍中郎將數討山賊諸深惡劇地

所擊皆破隨太常潘濬討五谿復有功朱然攻樊據

與朱異破城外圍還拜偏將軍右將軍魏出東興據

赴討有功孫峻殺諸葛恪遷爲驃騎將軍平西宮事

五鳳二年假節與峻等襲壽春還遇魏將曹真破之

於高亭

潘濬爲輔軍中郎將爲荊州治中時武陵部從事樊

伸誘導諸夷圖以武陵屬蜀濬將兵五千斬平之黃

龍中以太常假節督諸軍討五谿蠻夷斬首獲生蓋以萬數自是羣蠻衰弱一方寧靜

呂岱嘉禾三年以鎮南將軍屯蒲圻四年廬陵賊李

桓路合會稽東治賊隨春南海賊羅厲等一時竝起

詔岱督劉纂唐咨等分部討擊春即時首降桓厲等

皆見斬獲傳首詣都後領荊州督蒲圻頃之廖式作

亂攻圍城邑零陵蒼梧鬱林諸郡搔擾岱自表輒行

星夜兼路遣諸將唐咨等絡繹相繼攻討一年破之

斬式及遣諸僞署臨賀太守費揚等并其支黨郡縣

悉平

吳粲嘉禾五年以中郎將與將軍唐咨討廬陵賊李

桓羅厲等平之粲獲李桓咨獲羅厲等

陸遜嘉禾五年以上大將軍與諸葛瑾攻魏襄陽斬

首獲生凡千餘人

陸凱赤烏中為儋耳太守討朱崖斬獲有功遷建武

校尉五鳳二年討山賊陳毖於零陵斬毖克捷拜巴

丘督偏將軍

朱異赤烏四年以騎都尉隨朱然攻魏樊城建計破

其外圍還拜偏將軍廬江太守文欽營在六安多設

屯砦置諸道要以招誘亡叛為邊寇害異乃身率二



千人掩破欽七屯斬首數百遷揚武將軍建興元年  
遷鎮南將軍是歲魏遣胡遵諸葛誕等出東興異督  
水軍攻浮梁壞之魏軍大破

諸葛恪廢帝建興元年以太傅會衆於東興更作大  
隄左右結山峽築兩城魏以吳軍入其疆土恥于受  
侮命大將胡遵諸葛誕等率衆七萬欲攻圍兩塢圖  
壞隄遏恪恪與軍四萬晨夜赴救遣將軍劉贊呂據  
唐咨丁奉爲前部鼓譟亂斫魏軍驚擾死者萬數獲  
車乘牛馬驢騾各數千資器山積振旅而歸加荆楊  
州牧督中外諸軍事

丁奉爲冠軍將軍建興元年魏遣諸葛誕胡遵等攻  
東興諸葛恪率軍拒之奉與將軍唐咨呂據劉贊等  
俱從山西上奉縱兵斫之大破敵前屯會據等至魏  
軍遂潰遷滅寇將軍魏將文欽來降以爲虎威將軍  
從孫峻至壽春迎之與敵追軍戰於高亭奉跨馬持  
矛突入其陣中斬首數百獲其軍器進封安豐侯太  
平二年魏大將軍諸葛誕據壽春來降魏人圍之遣  
朱異唐咨等往救復使奉與黎斐解圍奉爲先登屯  
於黎漿力戰有功拜左將軍

陸抗建興二年拜奮威將軍太平二年魏將諸葛誕

舉壽春降拜抗爲柴桑督赴壽春破魏牙門將偏將軍遷征北將軍

虞汜爲散騎中嘗侍永安初以討扶巖功拜交州刺史冠軍將軍

鍾離牧永安六年以平魏將軍領武陵太守時蜀并于魏武陵五谿夷與蜀接界魏遣漢髮縣長郭純試守武陵太守率涪陵民入蜀遷陵界屯于赤沙誘致諸夷邑君或起應純又進攻西陽縣郡中震懼牧卽率所領晨夜進道緣山險行垂二千里從塞上斬惡民懷異心者魁帥百餘人及其支黨凡千餘級純等散五谿平遷公安督揚武將軍封都鄉侯

薛珣後主建衡元年以爲南將軍與監軍虞汜蒼梧太守陶璜等擊交趾三年汜璜破交趾禽殺晉所置守將九真日南皆還屬

... 巡按福建監察御史臣李嗣京等訂正萬  
... 知建陽縣事臣黃國琦較釋  
... 將帥部 十一  
... 立功第三

冊府元龜

巡按福建監察御史臣李嗣京等訂正萬

新建縣舉人臣戴國士參閱

知建陽縣事臣黃國琦較釋

將帥部 十一

立功第三

晉胡奮初仕魏為較尉匈奴中部帥劉猛叛使驍騎  
路蕃討之以奮為監軍假節頓軍經北為蕃後繼擊  
猛破之猛帳下將李恪斬猛而降以功累遷征南將  
軍假節都督荊州諸軍事

將帥部

石苞初仕魏爲奮武將軍監青州軍事及諸葛誕舉兵淮南苞統青州諸軍督兗州刺史周泰徐州刺史胡質簡銳卒爲游軍以備外寇吳遣大將朱異丁奉等來迎誕等留輜重於都陸輕兵渡黎水苞等逆擊大破之太山太守胡烈以奇兵詭道襲都陸盡焚其委輸異等收餘衆而退壽春平拜苞鎮東將軍封東光侯

馬隆武帝泰始中爲司馬督涼州爲虜所沒乃以隆爲武威太守討之隆西渡温水虜樹機能等以衆萬計或乘險以遏隆前或設伏以斷隆後隆依八陣圖地狹偏箱車地廣則鹿角車營路狹則爲木屋於車上且戰且前弓矢所及應弦而倒奇謀間發出敵不意或夾道累磁石賊負鐵鎧行不能前隆卒悉被犀甲無所留礙賊咸以爲神轉戰千里殺傷以千數隆到武威虜大人猝跋韓且高能等率萬餘落歸降前後誅殺及降附者以萬計又率善戎没骨能等與樹機能大戰斬之涼州遂平

王渾泰始中以安東將軍都督揚州諸軍事鎮壽春吳人大備皖城圍爲邊害渾遣揚州刺史應綽督淮南諸軍攻破之并破諸別屯焚其積穀百八十餘萬

斛稻苗四千餘頃船六百餘艘渾遂陳兵東疆視其地形險易歷觀敵城察攻取之勢及大舉伐吳渾率師出橫江遣參軍陳慎都尉張喬攻尋陽賴鄉又擊吳牙門將孔忠皆破之獲吳將周興等五人又遣殄吳護軍李純據高望城討吳將俞恭破之多所斬獲吳厲武將軍陳代平虜將軍朱明懷懼而來降吳丞相張悌大將軍孫震等率衆數萬指城陽渾遣司馬孫疇揚州刺史周浚擊破之臨陣斬二將及首虜七千八百級吳人大震吳司馬何植建威將軍孫晏送印節詣渾降既而王濬破石頭降孫皓明日渾始濟江登建鄴宮以功增封八千戶進爵爲公吳濬以陳騫秦始末以大將軍攻拔吳枳里城破涂中屯戍獲吳立信校尉莊祐

王濬太康元年正月以龍驤將軍率巴東監軍廣武將軍唐彬攻吳丹陽尅之擒其丹陽監盛紀二月庚申尅吳西陵獲其鎮南將軍劉憲征南將軍成據安都太守虞忠壬戌尅荆門夷道二城獲監軍陸晏乙丑尅樂都乙亥詔進濬爲平東將軍假節都督益梁諸軍事濬自發巴蜀兵不血刃攻無堅城夏口武昌無相支抗于是順流鼓棹征造三山孫皓遣游擊將

軍張象率舟軍萬人禦濬象望旗而降皓用光祿勳薛瑩中書令胡冲計送降表于濬壬寅濬入于石頭收其圖籍領州四郡四十三縣三百一十三戶五十二萬三千吏三萬二千兵二十三萬男女口二百三十萬米穀二百八十萬斛舟船五千餘艘

杜預太康元年以鎮南大將軍都督荊州諸軍事陳兵於江陵遣參軍樊顯尹林鄧封襄陽太守周奇等率衆循江而上授以節度旬日之間累尅城邑又遣牙門管定周音伍巢等率奇兵八百汎舟夜渡以襲樂鄉虜吳都督孫歆而還于是進逼江陵吳督將伍延僞請降而列兵登陴預攻尅之既平上流于是沅湘以南至於交廣吳之州郡皆望風歸命奉送印綬預杖節稱詔而撫之凡所斬及生獲吳都督監軍十四牙門郡守百二十餘人孫皓既平振旅凱入以功封當陽侯

周浚太康元年以折衝將軍射陽侯領揚州刺史隨王渾伐吳攻破江西屯戍與孫皓中軍大戰斬僞丞相張悌等首級數千俘馘萬計進軍屯于橫江孫皓既降于王濬浚乃濟江與王渾共行吳城壘綏撫新附以功進封武成侯食邑六千戶明年移鎮秣陵時

吳初平屢有逃亡者頻討平之

孟觀惠帝時爲積弩將軍氏帥齊萬年反于關中衆數十萬諸將覆敗相繼以觀沈毅有文武材用乃啓觀討之觀所領宿衛皆趨健勇悍并統關中士卒身當矢石大戰十數皆破之生擒萬年威懼氏羌轉東羌校尉

李矩爲征西將軍梁王彤牙門將伐氏帥齊萬年有殊功封東明亭侯及雒陽不守太尉荀藩奔陽城衛將軍華蒼奔成臯時大饑賊帥侯都等略人而食之藩蒼部曲多爲所啖矩討都等滅之乃營護藩蒼各爲立屋宇輸穀以給之及藩承制建行臺假矩榮陽太守矩招懷離散遠近多附之石勒親率大衆襲矩矩遣老弱入山令所在散牛馬因設伏以待之賊爭取牛馬伏發齊呼聲動山谷遂大破之斬獲甚衆勒乃退

索緄爲鷹揚將軍南陽王模從事中郎劉聰侵掠關東以緄爲奮威將軍以禦之斬聰將呂逸又破聰黨劉豐遷新平太守愍帝立緄領太尉擊破劉曜將日逐王呼延莫劉曜入關芟麥苗緄又擊破之自長安伐劉聰聰將趙染染仗其累捷有自矜之色帥精騎

數百與緄戰大破之染單馬而走  
魏允爲尚書左僕射領軍持節西戎校尉時劉曜設  
凱趙染數萬衆逼長安允擊破之擒凱于陣  
苟晞以北軍中候行兗州刺史汲桑之破鄴也東海  
王越出次官渡以討之命晞爲前鋒桑素憚之於城  
外爲柵以自守晞將至頓軍休士先遣單騎示以禍  
福桑衆大震弃柵宵遁嬰城固守晞陷其九壘遂定  
鄴而還西討呂朗等滅之後高密王泰討青州賊劉  
根破汲桑故將公師藩敗石勒于河北威名甚盛時  
人擬之韓白進位撫軍將軍假節都督青兗諸軍事  
封東平郡侯邑萬戶

劉弘太安中以南蠻校尉荊州刺史率前將軍趙驥  
等討賊帥張昌自方城至新野所向皆平及新野王  
歆之敗也以弘代爲鎮南將軍都督荊州諸軍事弘  
遣長史陶侃爲大都護叅軍蒯嘗爲義軍督護牙門  
將皮初爲都帥進據襄陽張昌并軍圍宛敗趙驥軍  
弘退屯梁侃初等累戰破昌前後斬首數萬級及到  
宛西昌懼而逃其衆悉降荆土平弘遣軍討昌于下  
雋山斬之悉降其衆進拜侍中鎮南大將軍  
周玘太安中右將軍陳敏反于揚州以玘爲安豐太



守加四品將軍玘稱疾不行密遣使告鎮東將軍劉準令發兵臨江玘為內應準遣督護衡彥率衆而東時敏弟昶為廣武將軍歷陽內史以吳興錢廣為司馬玘密諷廣殺昶玘與顧榮甘卓等以兵攻敏敏衆奔潰單馬北走追獲之于江乘界斬之於建康張光為順陽太守陵江將軍討陳敏之亂時江夏太守陶侃與敏大將錢端相拒於長岐將戰襄陽太守皮初為步軍使光設伏以待之武陵太守苗光為水軍藏舟艦於沔水皮初等與賊交戰光發伏兵應之水陸同奮賊衆大敗

王浚為安北將軍懷帝永嘉三年九月石勒寇恒山浚使鮮卑騎救之大破勒于飛龍山

應詹愍帝時為南平太守假督南平天門武陵三郡軍事天門武陵谿蠻竝反詹討降之鎮南將軍山簡復假詹督五郡軍事會蜀賊杜疇作亂來攻詹郡力戰摧之尋與陶侃破杜弢于長沙明帝時王敦作逆帝以詹為護軍將軍假節都督朱雀橋南賊從竹格渡江詹與建威將軍趙喬等擊敗之斬賊帥杜發梟首數千級賊平封觀陽縣侯食邑千六百戶

甘卓元帝初渡江授卓前鋒都督揚威將軍後討周

馥征杜弼屢經苦戰多所擒獲以前後功進爵南鄉侯

周訪爲揚烈將軍領兵一千二百屯尋陽鄂陵與其  
卓趙誘討華軼軼所統武昌太守馮逸來攻訪訪率  
衆擊破之逸遁保柴桑訪乘勝進討軼遣其黨王約  
傅禮等萬餘人助逸大戰于湓口約等又敗訪與其  
卓等會於彭澤與軼水軍將朱矩等戰又敗之軼將  
周廣燒城以應訪軼衆潰訪執軼斬之遂平江州以  
爲振武將軍尋陽太守又與諸軍共征杜弼弼歸湘  
州訪復以舟師造湘城軍達富池而弼遣杜弘出海  
昏時湓口騷動訪步上柴桑偷渡與大戰斬首數百  
賊退保廬陵訪追擊敗之賊嬰城自守尋而軍糧爲  
賊所掠退任巴丘糧廩旣至復圍弘於廬陵弘大擲  
財物于城外軍人競拾之弘因陣亂突圍而出訪率  
軍追之獲鞍馬鎧仗不可勝數弘入南康太守將率  
兵逆擊又破之奔于臨賀進龍驤將軍武關賊帥杜  
曾聚兵數萬大爲人害威震江沔帝命訪擊之曾攻  
訪左右甄皆敗訪選精銳八百人以進賊未至三十  
步親鳴鼓將士皆騰躍奔赴曾遂大潰殺千餘人曾  
遁走訪部將蘇溫收曾赴軍送王敦斬之

祖約爲平西將軍豫州刺史及王敦舉兵約歸衛京都率衆次壽陽遂敦所署淮南太守任台以功封五等侯進號鎮西將軍

蘇峻爲奮威將軍臨淮內史及王敦舉兵渡竹格渚拔柵將戰峻率其將韓晃于南塘橫截大破之又隨庾亮追沈充進使持節冠軍將軍歷陽內史加散騎嘗侍封邵陵公

溫嶠爲中壘將軍王敦逼京師嶠自率衆與賊夾水戰擊王含敗之復督劉遐追錢鳳於江寧事平封建寧縣開國公進號前將軍

朱伺爲綏夷都尉陳敏作亂陶侃鎮江夏以伺能水戰曉作舟艦乃遣作大艦署爲左甄據江口摧破敏前鋒敏兄恢稱荊州刺史在武昌侃率伺及諸軍進討破之敏恢旣平伺以功封亭侯領騎督隨陶侃討杜濩有殊功加威遠將軍又以平蜀賊龍高之功加廣威將軍

毛寶爲南中郎將督隨義陽二郡鎮上明隨庾亮討郭默默平與亮司馬王愆期等救桓宣于章山擊賊將石遇破之

鄧嶽爲西陽太守及蘇峻反平南將軍溫嶠遣嶽與

督護王愆期鄱陽太守紀睦等率舟軍赴難峻平還郡郭默之叛大司馬陶侃使嶽率西陽之衆討之默平遷督交廣二州軍事建武將軍領平越中郎將廣州刺史假節錄前後勳封宐城縣伯咸寧三年嶽遣軍伐夜郎破之

劉遐爲龍驤將軍下邳內史初沛人周堅一名撫與同郡周默因天下亂各爲塢主以寇抄爲事及默降祖逖撫怒遂襲殺默以彭城叛石勒遣騎援之詔遐領彭城內史與徐州刺史蔡豹太山太守徐龕共討撫戰于寒山撫敗走

荀羨爲徐州刺史監青州軍事慕容儁攻段簡於青州詔使羨救之儁將王騰趙盤寇瑯邪郵城北境騷動羨討之擒騰盤迸走軍次瑯邪而簡已沒羨退還下邳留將軍諸葛攸高平太守劉莊等三千人守瑯邪參軍戴逖蕭鎋二千人守泰山是時慕容蘭以數萬衆屯汴城甚爲邊害羨自光水引汶通渠至於東阿以征之臨陣斬蘭

陶侃爲龍驤將軍元帝使侃擊杜弢令振威將軍周訪廣武將軍趙誘受侃節度令二將爲前鋒兄子與爲左甄擊賊破之侃後爲平南將軍時交州刺史王

諒爲賊梁碩所陷陶侃遣將高寶進擊平之錄前後  
功封次子夏爲都亭侯

王舒爲假節都督行揚州刺史討蘇峻時吳國內史  
庾冰棄郡奔舒舒移告屬郡以吳王帥虞駿爲軍司  
御史中丞謝藻行龍驤將軍監前鋒征討軍事率衆  
一萬與庾冰俱渡浙江前義興太守顧衆護軍將軍  
顧颺等皆起義軍以應舒舒假衆揚威將軍督護吳  
中軍事颺監晉陵軍事于御亭築壘峻聞舒等兵起  
乃赦庾亮諸弟以悅東軍舒率衆次郡之西江爲冰  
藻後繼冰颺等遣前鋒進據無錫遇賊將張健等數  
千人交戰大敗奔還御亭復自相驚擾冰颺等竝退  
於錢塘藻守嘉興賊遂入吳燒府舍掠諸縣所在塗  
地舒以輕進奔敗斬二軍王者免冰颺督護吳晉陵  
軍屯兵章埭吳興太守虞潭率所領討健屯烏苞亭  
竝不敢進時暴雨大水賊管商乘船旁出襲潭及衆  
潭等奔敗潭還保吳興衆退守錢塘舒更遣將軍陳  
孺率精銳千人增戍海浦所在築壘或勸舒定還郡  
使謝藻守西陵扶海立柵舒不聽留藻錢塘使衆嚴  
守紫壁於是賊轉攻吳興潭諸軍復退賊復掠東遷  
餘杭武康諸縣舒遣子允之行揚烈將軍與將軍徐

遜陳孺及揚烈司馬朱燾以精銳三千徑邀賊于武康出其不意遂破之斬首數百級賊委舟步走允之收其器械進兵助潭時賊韓晃旣破宣城轉入故鄣長城允之遣朱燾何準等擊之戰於乾湖潭以彊弩射之晃等退走斬首千餘級納降二千人潭繇是得保郡是時臨海新安諸山縣竝反應賊舒分兵悉討平之會陶侃等至京都潭等竝以屢戰失利移書盟府自貶去節侃遣使敦喻不聽及侃立行臺上舒監浙江東五郡軍事允之都護吳郡義興晉陵三郡征討軍事旣而晃等南走允之追躡於長塘湖復大破之賊平以功封彭澤縣侯

庾冰爲吳國內史蘇峻作逆遣兵攻冰冰不能禦便棄郡奔會稽會稽內史王舒以冰行奮武將軍距峻別率張健於吳中健黨甚衆諸將莫敢先進冰率衆擊健走之于是乘勝西進赴于京都又遣司馬滕舍攻賊石頭城拔之冰勳爲多

庾懌爲左衛將軍以討蘇峻功封廣饒男

顧衆爲揚威將軍蘇峻反王師敗績衆還吳潛圖義舉時吳國內史庾冰奔于會稽峻以蔡謨代之前陵江將軍張哲爲峻收兵於吳衆遣人喻哲哲從之衆

乃遣郎中徐機告謨曰衆已潛合家兵待時而奮又與張哲尅期効節謨乃檄衆爲本國督護揚威將軍仍舊衆從弟護軍參軍颺爲威遠將軍前鋒督護吳中人士同時響應峻遣將弘徽領甲卒五百鼓行而前衆與颺哲要擊徽戰於高祚大破之收其軍實謨以冰當還任故使去郡衆遣颺率諸軍屯無錫冰至鎮御亭恐賊從海虞道入衆自往備之而賊帥張健馬流攻無錫颺等大敗庾冰亦失守健等遂據吳城衆自海虞繇婁縣東倉與賊別率交戰破之義軍又集進屯烏苞會稽內史王舒吳興內史虞潭竝檄衆爲五郡護統諸義軍討健潭遣將姚休爲衆前鋒與賊戰沒衆還守紫壁時賊黨方銳義軍沮退人咸勸衆過浙江衆曰不然今保固紫壁可得全錢塘以南五縣若越他境便爲寓軍控引無所非長計也臨平人范明亦謂衆曰此地險要可以制寇不可委也衆乃拔明爲參軍明率宗黨五百人合諸軍凡四千人復進討健健退于曲阿留錢弘爲吳令軍次路丘卽斬弘首衆進任吳城遣督護朱祈等九軍與蘭陵太守李闔共守凌亭健遣馬流陶陽等往攻之闔與祈等逆擊大破之斬首二千餘級峻平論功衆以承檄

奮義推功于謨謨以衆唱謀非已之力俱表相讓論者美之封鄱陽縣伯

周撫爲征虜將軍督寧州諸軍事穆帝永和初桓溫征蜀進撫督梁州之漢中巴西梓潼陰平四郡軍事鎮彭模撫擊破蜀餘寇隗文鄧定等斬僞尚書僕射王誓平南將軍王潤以功遷平西將軍隗文鄧定等復反立范賢子賁爲帝初賢爲李雄國師以左道惑百姓人多事之賁遂有衆一萬撫與龍驤將軍朱肱擊破斬之以功進爵封建城縣公

桓溫爲安西將軍永和二年伐蜀蜀李勢衆大潰溫乘勝直進焚其小城勢遂夜遁九十里至晉壽葭萌城其將鄧嵩督堅勸勢降乃而縛輿櫬請命溫解縛焚櫬送于京師溫停蜀三旬舉賢旌善僞尚書僕射王誓中書監王瑜鎮東將軍鄧定散騎常侍嘗璩等皆蜀之良也竝以爲參軍百姓咸悅軍未旋而王誓鄧定隗文等反溫復討平之振旅還江陵十二年姚襄入于許昌溫以太尉爲大都督討之戰于伊水大敗之襄走平陽徙其餘衆三千餘家於江漢之間執降賊周成而歸太和四年率衆伐慕容暉暉將慕容垂帥衆拒溫溫擊敗之九月戊寅溫裨將鄧遐宋序



遇暉將傅末波於林渚又大破之

溫弟豁爲建威將軍督沔中七郡軍事擊慕容屈塵破之進號右將軍監荆揚雍州軍事領護南蠻校尉時梁州刺史司馬勳以梁益叛豁使其參軍桓熊討之而南陽督護趙弘趙憶等逐太守桓淡據宛城以叛豁與竟陵太守羅崇討破之又攻僞南中郎將趙盤于宛盤退走豁追至魯陽獲之送于京師置戍而還

豁弟冲爲鷹揚將軍鎮蠻護軍西陽太守從其兄溫征伐有功遷都督荊州之南陽襄陽新野義陽順陽雍州之京兆揚州之義城七郡軍事寧朔將軍鎮襄陽又從溫破姚襄及虜周成進爵豐城公溫之破姚襄也獲襄將張駿楊凝等徙於尋陽冲在江陵未及之職而駿率其徒五百人殺江州督護趙毗掠武昌府庫將妻子北叛冲遣將討獲之遽還所鎮豁卒冲領護南蠻校尉荊州刺史符堅遣其將符融寇樊鄧石越寇魯陽姚萇寇南鄉韋鍾寇魏興冲率前將軍劉汲及兄子振武將軍石民冠軍將軍石虔等伐之拔堅筑陽攻武當走堅兖州刺史張宗又使石虔伐堅襄陽太守閻震擒之及大小帥二十九人送於京

師堅使其將赦貴守襄陽冲使揚威將軍朱綽討之  
遂焚燒河北稻田拔六百餘戶而還又遣上庸太守  
郭寶伐堅魏興太守褚垣上庸太守段方竝降之新  
城太守麴嘗遁走三郡皆平

豁子石虔爲寧遠將軍領南頓太守帥諸將攻袁真  
于壽陽尅其南城又擊符堅將王鑒于石橋獲馬五  
百匹後爲冠軍將軍領南平太守會符堅荊州刺史  
梁成襄陽太守閻震率衆入寇竟陵石虔與弟石民  
距之賊阻激水屯管城石虔設計夜渡水旣濟賊始  
覺力戰破之進尅管城擒震斬首七千級俘獲萬人  
馬數百匹牛羊千頭具裝鎧三百領成以輕騎走保  
襄陽石虔復領河北太守進據樊城逐堅兗州刺史  
張崇納降二千家而還

石虔弟石民爲衛將軍謝安參軍叔父冲上疏拔石  
民振武將軍戍夏口與兄石虔攻符堅荊州刺史梁  
成等於竟陵明年又與隨郡太守夏侯澄之破符堅  
將慕容垂姜成等於漳口復領譙國內史梁郡太守  
冲薨詔以石民監荊州軍事西中郎將荊州刺史石  
民遣將軍晏謙伐弘農賊東中郎將慕容夔降之始  
置胡陝二戍獲關中檐僮伎以充太樂時符堅子丕

僭號於河北謀襲雒陽石民遣將軍馮該討之臨陣  
斬丕及其左僕射王孚吏部尚書荀操等傳首京都  
時乞活黃淮自稱并州刺史與翟遼共攻長社衆數  
千人石民復遣南平太守郭銓松滋太守王遐之擊  
淮斬之遼走河北以前後功進左將軍

石民弟石康爲振威將軍荊州刺史以討庾亮功封  
武陵王

朱序爲鷹揚將軍江夏相興寧末梁州刺史司馬勳  
反桓温表表序征討都護往討之以功拜征虜將軍  
封襄平子

桓宣爲南平中郎將江夏相石勒荊州刺史郭敬戍  
襄陽陶侃使其子平西參軍斌與宣俱攻樊城拔之  
竟陵太守李陽又破新野敬懼遁走宣與陽遂平襄  
陽侃使宣鎮之後庾亮爲荊州將謀北伐以宣爲都  
督沔北前鋒征討軍事平北將軍司州刺史假節鎮  
襄陽石季龍使騎七千渡沔攻之亮遣司馬王愨期  
輔國將軍毛寶救宣賊三面爲地窟攻城宣募精勇  
出其不意殺傷數百人多獲鎧馬賊解圍退走

桓伊爲建威將軍督豫州之十二郡揚州之江西五  
郡軍事與謝玄共破苻堅別將王鑒張蚝等以功封

宣城縣子又進都督豫州諸軍事西中郎將豫州刺史及符堅南寇伊與冠軍將軍謝玄輔國將軍謝琰俱破堅於淝水以功封永修縣侯進號右將軍

謝尚爲建威將軍鎮壽春時符堅將楊平戍許昌尚遣兵襲破

謝安尚從弟也爲侍中都督揚豫徐兗青州五州幽州之燕國諸軍事假節時符堅強盛疆場多虞諸將敗退相繼安遣弟石及兄子玄等應機征討所在尅捷拜衛將軍開府儀同三司封建昌縣公堅後率衆號百萬次于淮淝京師震恐加安征討大都督指授

將帥各當其任玄等旣破堅安以摠統功進拜太保安子琰爲侍中符堅之役安以琰有軍國才用出爲輔國將軍以精卒八千與從兄玄俱陷陣破堅以勳封望蔡公王恭舉兵假琰節都督前鋒軍事恭平遷衛將軍徐州刺史假節孫恩作亂加督吳興義興二郡軍事討恩至義興斬賊許允之迎太守魏郡還郡進討吳興賊丘延破之

謝玄安兄子也爲南郡相監北征討軍事于時符堅疆盛邊境數被侵寇玄以建武將軍兗州刺史領廣陵相監江北諸軍事符堅遣軍圍襄陽車騎將軍桓

冲禦之詔玄發三州人丁遣彭城內史何謙游軍淮  
泗以爲形援堅將彭超進軍南侵句難毛當自襄陽  
來會超圍幽州刺史田洛于三阿有衆六萬詔征虜  
將軍謝石率水軍次徐中右衛將軍毛安之游擊將  
軍河間王曇之淮南太守楊廣宣城內史丘準次堂  
邑旣而盱眙城陷高密內史毛藻沒安之等軍人相  
驚遂各散退朝廷震動玄於是自廣陵西討難等何  
謙解田洛圍進據白馬與賊大戰破之斬其僞將都  
督顏因復進兵又破之斬其僞將邵保超難引退玄  
率何謙戴遠田洛追之戰於君川復大破之玄參軍  
劉牢之攻破浮航及白船督護諸葛侃單父令李都  
又破其運艦難等相率北走僅以身免於是罷彭城  
下邳二戍詔遣殿中將軍慰勞進號冠軍加領徐州  
刺史還於廣陵以功封東興縣侯及符堅自率兵次  
于項城衆號百萬而涼州之師始達成陽蜀漢順流  
幽并繼至先遣符融慕容暉張蛙符方等至潁口梁  
成王先等屯雒澗詔以玄爲前鋒都督徐兗青三州  
楊州之晉陵幽州之燕國諸軍事與叔父征虜將軍  
石從弟大國將軍琰中郎將桓伊龍驤將軍檀玄建  
威將軍戴熙揚武將軍陶隱等拒之衆凡八萬玄先

遣廣陵相劉牢之五千人直指雒澗卽斬梁成及成弟雲步騎奔潰爭赴淮水牢之從兵追之生擒堅僞將梁化王顯梁悌慕容屈氏等收其軍實堅進屯壽陽列陣臨淮水玄軍不得渡玄使謂符融曰君遠涉吾境而臨水爲陣是不欲速戰諸軍稍却令將士得周旋僕與諸君緩轡而觀之不亦樂乎堅衆皆曰宐阻肥水莫令得上我衆彼寡勢必萬全堅曰但却軍令得過而我以大騎數十萬向水逼而殺之融亦以爲然遂麾使却陣衆因亂不能止於是玄與琰伊等以精銳八千涉肥水石軍距張蚝小退玄琰乃進決戰肥水南堅中流矢臨陣斬融堅衆奔潰自相蹈藉投水死者不可勝計肥水爲之不流餘衆棄甲宵遁聞風聲鶴唳皆以爲王師已至草行露宿重以飢凍死者十七八獲堅乘輿雲母車儀服器械軍資珍寶山積牛馬驢騾駝十萬餘玄已破符堅復率衆次于彭城遣叅軍劉襲攻堅兗州刺史張崇于鄆城走之使劉牢之守鄆城兗州旣平遣淮陵太守高素以三千人向廣固降堅青州刺史符朗又進伐冀州遣龍驤將軍劉牢之濟北太守丁正據碭礮濟陽太守郭滿據滑臺奮武將軍顏雄渡河立營堅子丕遣將

柔據屯黎陽玄命劉襲夜襲據走之丕惶遽欲降玄許之丕告飢玄饋丕米二千斛又遣晉陵太守滕恬之渡河守黎陽三魏皆降以兗青司豫平加玄都督徐兗青司冀幽并七州軍事玄上疏以方平河北幽冀宐須摠督司州懸遠應統豫州以勳封康樂縣公復遣寧遠將軍吳演伐申飢于魏郡破之

謝石爲尚書僕射征句難以勳封興平縣子淮肥之被詔石解僕射以將軍假節征討大都督與兄子女琰破符堅堅之敗也雖功始劉牢之而成于玄琰然石時實爲都督焉遷中軍將軍尚書令

劉牢之爲謝玄前鋒符堅將句難南侵玄率何謙等拒之牢之破難輜重于盱眙獲其運船遷鷹揚將軍廣陵相時車騎將軍桓冲擊襄陽宣城內史胡彬率衆向壽陽以爲冲聲援牢之領卒三千爲彬後繼淮肥之役符堅遣其弟融及驍將張蚝攻陷壽陽玄使彬與牢之拒之師次碓石不敢進堅將梁成又以二萬人屯雒澗玄遣牢之以精卒五千距之去賊十里成阻澗列陣牢之率參軍劉襲諸葛求等直進渡水臨陣斬成及其弟雲又分兵斷其歸津賊步騎奔潰爭赴淮水殺獲萬人又收其器械堅尋亦敗歸長安

餘黨所在屯結牢之進平譙城使戴寶戍之遷龍驤將軍彭城內史以功詔賜爵武岡縣男復守淮陰後進戍彭城領太守妖賊劉黎僭尊號于皇丘牢之討滅之符堅將張遇遣兵擊破金鄉圍泰山太守牟邁牢之遣參軍何欽之擊走之會慕容垂叛將翟釗救遇牢之引還釗還牢之進平泰山追釗于鄆城釗走河北用獲張遇以歸牢之鎮京口孫恩攻陷會稽牢之遣將桓寶帥師救三吳復遣子敬宣爲寶後繼北至曲阿吳郡內史桓謙已棄郡走牢之乃率衆東討拜表輒行至吳與衛將軍謝琰擊賊屢勝殺傷甚衆徑臨浙江進拜前將軍都督吳郡諸軍事時謝琰屯烏程遣司馬高素助牢之牢之率衆軍濟浙江恩懼逃于海牢之還鎮恩復入會稽爲害謝琰牢之進號鎮北軍都督會稽五郡率衆東征屯上虞分軍戍諸縣恩復攻破吳國殺內史袁山松牢之使參軍劉裕討之恩復入海頃之恩浮海奄至京口戰士十萬樓船千餘牢之在山陰使劉裕自海鹽赴難牢之率大衆而還裕兵不滿千人與賊戰破之恩聞牢之已還京口乃走郁州又爲敬宣劉裕等所破及恩死牢之威名轉振



楊佺期少仕軍府咸康中領衆屯城固苻堅將潘猛距守康回壘佺期擊走之其衆悉降拜廣威將軍河南太守戍雒陽苻堅將竇衝率衆攻平陽太守張元熙于皇天塢佺期擊走之佺期自湖城入潼關累戰皆捷斬獲千計降九百餘家歸於雒陽進號龍驤將軍

虞丘進少時隨謝玄討苻堅有功封關內侯中從劉裕征孫恩戍句章城被圍數十日無日不戰身被數鎗至餘姚呵浦破賊張驃追至海鹽故治及婁縣于滿濤口與孫恩水戰又被重傷追恩至壽州又至石鹿頭還海鹽大狂頻戰有功

劉毅爲桓弘中兵參軍屬桓玄篡位毅與劉裕何無忌魏詠之等起義兵討玄裕率毅等至竹里玄使其將皇甫敷吳甫之北距義軍遇之于江乘臨陣斬甫之進至羅落橋又斬敷首玄大懼使桓謙何澹之屯覆舟山毅等軍至蔣山裕使羸弱登山多張旗幟玄不之測益以危懼謙等士卒多北府人素懼伏裕莫敢出鬪裕與毅等分爲數隊進突謙陣皆殊死戰無不一當百時東北風急義軍放火煙塵張天鼓譟之音震駭京邑謙等諸軍一時奔敗玄旣西走裕以毅

爲冠軍將軍青州刺史與何無忌劉道規躡玄毅與道規及下邳太守孟懷玉等追及玄戰于崢嶸州毅乘風縱火盡銳爭先玄衆大潰燒輜重夜走玄將郭銓劉雅等襲陷尋陽毅遣武威將軍劉懷肅討平之毅復與劉道規追桓玄至尋陽桓亮自號江州刺史毅遣劉敬宣擊走之毅軍次夏口桓振黨馮該戍大岸孟山圖據魯城桓山客守偃月壘衆合萬人連艦二岸水陸相援毅督衆軍進討未至夏口遇風飄沒千餘人毅與劉懷肅索超等攻魯城道規攻偃月壘何無忌與檀祗列艦于中流以防越逸毅躬貫甲胄

陵城半日而二壘俱潰生擒山客而馮該遁走毅進平巴陵南陽太守魯宗之起義襲襄陽破桓蔚毅等詣軍次江陵之馬頭桓振擁乘輿出營江津宗之又破僞將溫楷振自擊宗之毅因率無忌道規等諸軍破馮該於豫章口摧鋒而進遂入江陵振聞城陷與謙北走乘輿反正毅執玄黨下範之半僧壽夏侯崇之桓道恭等皆斬之桓振復與苻宏自郢城襲陷江陵與劉懷肅相持毅遣部將擊振殺之并斬僞輔國將軍桓珍毅又攻拔遷陵斬玄太守劉叔祖於臨嶂其餘擁衆假號以十數皆討平之二州旣平以毅爲

撫軍將軍時刁豫等作亂屯於湘中毅遣將分討皆滅之詔以毅爲都督豫州揚州諸軍事梁州刺史劉雅反毅遣將討擒之

諸葛長民劉裕建義初爲揚武將軍從討桓玄以功拜輔國將軍宣城內史於時桓歆聚衆向歷陽長民擊走之又與劉敬宣破歆於芍陂封新淦縣公督淮北諸軍事鎮山陽城義熙初慕容超寇下邳長民遣部將徐琰擊走之

何無忌爲輔國將軍瑯邪內史以會稽王道子所部精兵悉配之南追桓玄與振武將軍劉道規俱受冠軍將軍劉毅節度玄留其龍驤將軍何澹之前將軍郭銓江州刺史郭昶之守湓口無忌等次桑洛州道規乘勝徑進無忌又鼓譟赴之澹之遂潰進據尋陽遣使奉送宗廟主及護武康公主瑯邪王妃還京都又與劉毅劉道規破走桓玄于崢嶸州無忌進據巴陵玄從兄謙從子振乘間陷江陵無忌道規進攻謙於馬頭攻桓蔚於龍泉皆破之旣而爲桓振所敗退還尋陽無忌與毅道規復進討振尅夏口三城遂平巴陵進次馬頭桓謙請割荆江二州奉送天子無忌不許進軍破江陵謙等敗走無忌侍衛安帝還京師

復以興復之功封安城郡開國公

册府元龜

